

NATIONAL ASSEMBLY OF SEYCHELLES

Friday 25th February, 2022

The Assembly met at 9am

National Anthem

Moment of Reflection

Mr Speaker is the Chair

MR SPEAKER

Bonzour tou Manm Onorab. I en plezir pou avek zot ankor enn fwa, pou komans nou bann sesyon regilye sa lannen.

Bonzour nou piblik e byenveni tou dimoun ki pe swiv nou. Nou pe rankontre pou byensir pou repons e deba lo mesaz lo Leta Lanasyon. E pou komanse, mon envit Onorab Sebastien Pillay, *Leader Lopozisyon* pou pran laparol.

HON SEBASTIEN PILLAY

Mersi Mr Speaker. Bonzour Mr Speaker e bonzour tou koleg Onorab. E byensir bonzour tou dimoun ki a lekout.

Frer ek ser Seselwa, i en loner, e en privilez pou mwan donn mon reaksyon lo diskour Leta nou Nasyon, fer par Prezidan Larepublik Mardi dan nou Lasamble.

Pou tou Seselwa SONA i moman tre enportan, kot en Sef Deta i prezant son pep en analiz lo Leta Lanasyon; setadir kote nou ete, kote nou pe ale, e son azanda pour nou bouz devan.

Malerezman Prezidan pa'n kapab, pandan sa plis ki 2erdtan ki in koze dir nou kote nou ete, e dan lopinyon lamazorite Seselwa, in *fail* pou li konekte avek sa ki Seselwa pe santi. E i tre difisil pou vwar kote nou pe ale.

Son diskour in plito retourn nou an 2020. E prezant nou en seri leskiz, akoz, ki li ek son Gouvernman pa kapab fer desann pri lavi. E ki mannyer Seselwa isi Sesel, pa travay ase dir e ki li son konklizyon-son konklizyon, napa problemm dan Sesel.

Mon pa vwar li drol si i pa'n donn nou en bon apersi lo Leta nou Nasyon. Akoz pandan sa 16 mwan, ki'n dan lofis, in pas plis letan aletranze, e servi larzan piblik pour vwayaze, dan en moman kot li menm in demann Seselwa pour fer sakrifis!

I kler ki li menm, i pa konn Leta son Nasyon e pa'n ni prepare pour delivre sa Ladres devan nou Lasamble. Mon pa oule ofans personn. Me selman i paret ki sa diskour in ganny fer oubyen in ganny ekrir dan

first class Emirates, pasan par *five-star Dubai, Brest oubyen lot pei la, Belgique.*

Alors, mon ava demann li pou ekout mwan pou 45 minit, an pasan par Les Mamelles, Plaisance, Roche Caiman. Annou sot en kou Praslin ek La Digue - an bref, en pe partou dan Sesel, lo ki vre Leta nou Nasyon.

Sa i mon responsabilite konman en Dirizan ki'n akote Seselwa, pandan sa dernyen 16 mwan.

Pandan sa 16mwan keksoz ki pe pli preokip lamazorite Seselwa, se pri lavi. Pri lavi pe kontinyelman ogmante. E bokou fanmir, larealite Leta Sesel ozordi, bokou fanmir pe *struggle* pou fer de bout zwenn. E lapovrete i en realite dan ... nou ... pei !

Statistik i montre ki pri manze in mont par pres 14pourasan zis o konmansman lannen. E lamazorite Seselwa pe santi sa. Leta nou Nasyon i ki lavi in vin pli ser dan Sesel. E li menm Prezidan, in koz lo pri lavi. Nou'n vwar Legliz antre pou donn manze zanfan lekol. Nou'n vwar Caritas antre, pou donn manze zanfan lekol. Nou'n vwar Knights of Malta, osi vin donn sipor. Plizyer dimoun i ankor pe al kot Red Cross.

Lakantite dimoun ki'n ekri mon lofis, ouswa telefonnen pou demann led, i kontinyen ogmante. E bokou dimoun ki ou koz avek i dir ou ki zot in al rod led, avek zot bann MNA.

Alors mon pa ganny en konpran ki mannyer Prezidan dan son diskour lo Leta nou Nasyon, i pa koz ditou lo size lapovrete. Me i plito kritik Seselwa, lo lefe ki Gouvernman pa la pou fer tou pou nou.

Selman i admet ki pri lavi i tre o, e ki saler Seselwa par rapor ek pri lavi i tro ba. Ki mannyer ou kapab ganny en konpran? Pa blyie ki koman Dirizan Lopozisyon Prezidan Ramkalawan pa ti mank okenn sans, pou koz lo sa 40pourasan lapovrete dan Sesel.

Alors mon etonnen pou vvar, sa mank konpasyon, en nouveau latitud blanm sa enn ki dan bezwen, ki par rapor avek ler nou ti pe rod vot, in konpletman sanze.

La mon annan en mesaz pou nou pep ; konpasyon ek en lespri kominoter ki'n fer nou avanse. Si ozordi ou trouv ou dan en meyer pozisyon, ou pe kapab fer fas ek sityasyon pri lavi, sa i akoz progre ki nou pei in fer, travay ki nou'n fer ansanm.

Ler en manman i dir ou i pa kapab aste kommisyon pou

son de zanfan, malgre i pe fer son mye, sa i devret konsern pou ou. Akoz sa ti kapab ou manman, sa de zanfan ti kapab ou zanfan.

Ler en granmoun aze i dir ou, i pa kapab aste son latizann, ki napa dan lopital, sa i devret konsern ou, akoz sa ti kapab ou granmanman, sa ti kapab ou granpapa. Ler en fanmir pa kapab pey zot bil kot lakaz. Sa i devret konsern ou, akoz sa ti kapab ou fanmir.

Nou bezwen realize ki koezyon sosyal, i depa lo sipor ki Leta i bezwen donn son pep dan bann moman difisil. Napa de Sesel e nou tou sa ki annan, sa ki napa, nou reste lo menm zil.

Se sa rezon ki toulstan en Gouvernman US ti fer sir, ki kan kondisyon otour ou i sanze, si pri lavi i ogmante, i siport ou. Ki malgre lenpak sa bann sanzman, ou pa viv en lavi san dinyite.

Annou rapel byen ki ti arive an 2008. Ler nou ti antre dan Programm Reform Ekonomik, Gouvernman US ti *step-in*, pou ed e soulaz tou Seselwa. Me nou pe vit konpran, ki pa tou Gouvernman ki fer parey.

Mon oule fer zot rapel ki *LDS* ti dir dan son Manifesto. Dan son Manifesto, *LDS* i dir ek

nou koumsa poudir li i pou pran bann mezir pou fer desann pri lavi.

I pou sanz biznes *practice STC*. Son bann target prensipal se pou anmenn bann prodwi, ki pli bon marse. E pou fer sir ki kou pri delo, elektrisite e bann servis banker i desann. Sa promes ... pa'n ... ganny ... garde! I paret mwan i ti annan solisyon pour sa problem pri lavi, ler i ti dan Lopozisyon.

Premye i ti dir fodre nou retir *middlemen*.

Dezyenm nou pou met pano soler lo *STC* e la pri lavi pour bezwen desann. Ankor desepsyon. Komodite *STC* in defons plafon e pep pe kriy o sekour, ki zis tonm lo en zorey sourd. E alors nou bezwen demann li. Eski sa *middlemen* i ankor la? Pano solar, eski i pe rod en *sponsor* dan bann voyaz ki i fer? Se sa bann kestyon ki li i bezwen reponn.

E fotespere ler zournalis i demann sa bann kestyon, zot pa ganny dir, ki zot pe al tro lwen. Akoz ki *STC* ozordi, i kapab fer vini tes *COVID*, i kapab fer vini tou lezot keksoz, me i pa kapab fer vini komodite esansyel parey ponmdeter?

Akoz ki nou pe menm vwar ki lafarin i ganny rasyonnen ozordi kot *STC*? La ler mon pe koze, diri *long grain*

pres pou napa. *Sorry* be mwan mon bezwen koz fran. Se sa ki arive ler nou le fer plezir aktivis e le donn nou bann sponsor pozisyon dan Gouvernman.

Nou pa'n ganny okenn statistik lo vre leta nou pep an sa ki konsern lapovrete. Okenn lanons lo mekanizm pou adres inegalite ki egziste, okenn konpasyon pou ou ki bezwen sipor adisyonnal.

Lo lot kote nou'n ganny tou statistik lo bann leskiz ki Gouvernman pa kapab fer desann pri lavi. *Container, fuel* nouveau leskiz pou vini. Alors mazisyen in fini travay, sa baton mazik ki ti la an 2020 in disparet. Larealite in pran plas, pri lavi pe pet plafon. Dezapwental!

Me dan en *about turn* enkrwayab, e mon pa konnen akoz ki sa msye i krwar ki nou pa ekout li, Prezidan i dir nou zis en logmantasyon saler ki pou re-balans pri lavi. E sa i konpletman diferan, lo sa ki li in toultan dir ler i ti dan Lopozisyon.

E i ti toultan blanm Gouvernman US pou donn logmantasyon saler dimoun. Li i ti dir, sey fer desann pri lavi. So ler in fel fer desann pri lavi, i koz lo logmantasyon saler.

Me ki mannyer Prezidan pe koz lo en logmantasyon saler

pou 2022, kan son Minis ti dir ki legzersis i ankor ganny fer. E ki sa logmantasyon pou arriv an 2023! Napa larzan pou en logmantasyon saler, dan Bidze 2022.

Alor ki Prezidan pe dir nou, e lekel ant son Minis ek son Prezidan ki pe koz laverite? E dan en nouveau devlopman, Gouverner Labank Santral in repet egzakteman sa ki US, ti demande dan deba Bidze 2020.

E sa se ki bann travayer ek saler pli ba, i ganny en logmantasyon sa lannen 2022. Akoz, se zot ki pe soufer plis logmantasyon dan pri lavi. An se moman nou pa konn ditou, kwa ki'n arive lo sa lanaliz ki Gouvernman pe fer an sa ki konsern ou saler pep Seselwa.

Nou pa konnen si pou rann ou, ou *long service allowance* ki pa ankor pey ou. Nou pa konnen si i pou donn ou en logmantasyon, 15poursan, 10poursan. Tousala nou pa konnen.

Gouvernman pa kapab kontinyen zwe avek nou. Pran li en desizyon. Ki kalite lanaliz zot pe fer. Eski zot pou donn tou travayer logmantasyon, eski zot pou ogmant *minimum wage*? Tousala nou bezwen konnen.

Me en lot keksoz ki pli enteresan, ler mon tann Prezidan kritik bann travayer

dan servis piblik. I ti dir ki li, dan son Gouvernman zot annan en komitman pou zot *improve* tou saler dan servis piblik. E i ti menm dir, ki travayer dan sekter servis piblik pa pou perdi zot louvraz lo baz politik.

Me ki nou'n vwar? In arive apre eleksyon? En dezapwentman total, kot bokou travayer in vwar zot perdi zot louvraz, zis pou fer plezir bann aktivis. E si ou pa siport Gouvernman ozordi dan en travay, ou ganny problem.

Akoz menm aktivis i *call* ou, pou *take ou to task*. Mon pa tro ganny en konpran akoz Prezidan pa pe realize se sa vre Leta son Nasyon ozordi.

Larealite i annan lakoler parmi travayer Seselwa. Zot pe konmans perdi pasyans ek sa Gouvernman. E travayer pou desann dan semen, e reklam zot drwa!

E sa Gouvernman i bezwen met antet, ler sa i arive, fotespere novo lamannman pou met larne lo semen pa ava ganny servi pou entimid dimoun e anpes zot eksprim zot drwa.

Mr Speaker, mon vin lo sa pwen distribisyon larises ki enportan pou nou konsidere ozordi. Akoz i enteresan. An menm tan ki Prezidan i dir nou

logmantasyon saler, pou vin ler lekonomi pe fer byen, in fini aras nou lespwar nou pou ganny ogmantasyon la.

I dir ek nou, nou rezerv i pli o ki zanmen in ete. Konklizyon la lamazorite Seselwa la deor, se ki si ou annan sa ta larzan dan rezerv. Akoz ou pa kapab donn nou en logmantasyon? Akoz ou pa kapab, donn nou en keksoz an plis?

Tou sa koze lo sa 528milyon, si ou annan sa ta larzan, akoz ou pa anmenn en distribisyon larises, ki zis ? Sa konmsi Gouvernman Sesel in vin parey en paran. I prefere anmas larzan e les son zanfan mars nipy e dormi vant vid. Tou sa larzan, tou sa depans, me selman ou zanfan, i napa goute lekol.

Be la mon envit zot, pou konpran vre *mindset* sa Gouvernman. Bann Minis dan L'Egzekitiv, swivan kestyon ki mon ti fer zot vin reponn isi dan Lasamble, in nobou trouv larzan pou donn zot lekor en logmantasyon R35mil. Ti napa lanaliz, ti napa restriksyon saler, ti napa koze lo lekonomi.

Realite tou sa koze lo rezerv pe zis vin sey anbet nou. Sa ki Prezidan pa'n dir nou, i se ki dan rezerv nou annan \$60 milyon *loan* avek IMF.

Nou'n ganny ankor \$30 milyon anba sa ki nou apel sa *Special Drawing Rights*. Nou'n ganny \$44milyon prete ek *World Bank* e \$20milyon sorti kot Labank Devlopman Afriken. Ou pret larzan, ou met dan rezerv, apre ou koz nou rezerv.

E sa ki i pa oule aksepte, kantmenm i vin dir nou Seselwa isi Sesel, nou pa travay ase parey bann ki deor, se gras a nou, ki *Central Bank* ti kapab dan milye lannen aste tou sirplis dan lekonomi. E sa *move* ti fer, ki komodite ti mont ankor plis. E pri lavi ti mont ankor plis. Sanmenm i pa kapab fer nanryen. Sa bann koze lo rezerv i zis en bat latet.

Prezan ler i ti pran pei, i ti koz kales kase, i ti koz kof vid. Sa ki i par dir se ki ti annan 400 ekek milyon Dolar, ki Gouvernman US, ti'n kit ek li dan rezerv pei. Sa i pa koze lo la.

I pa ase pou nou dir, nou pe anmas plis larzan dan *tax*, e ou annan rezerv. Ou pep pe vin pli mizer. Rezon ou pe anmas plis larzan dan *tax*, se akoz ou pep pe pey keksoz pli ser!

Alors ler ou anmas plis larzan. Planifye depans Gouvernman pli byen, e repas sa benefis avek ou pep la deor. Aret fer lekstravagans lo zil pou al *retreat*. Rekalibre depans

bann gro proze kapital. E anmenn plis latansyon lo ki mannyer ou amelyor lavi ou pep.

Se sa ki ou bezwen fer pou amelyor Leta nou Nasyon. Gouvernman fodre i vin fran. E aret konpar Seselwa isi, ek Seselwa aletranz. Mon pe koz fran avek zot mon bann frer ek ser.

Si mon konpran li byen, dapre li Leta nou Nasyon, i ki en kantite nou Seselwa pa oule pran zot responsabilite, debourye parey bann Seselwa ki i zwenn aletranz, in zwenn sa bann *Brest*, *Belgique*, eksetera, *Paris* partou kot i ale.

Mwan personnelman mon annan plizyer fanmir ki'n etablir zot aletranz. E mon aplodir sikse, ki zot in fer. Mon aplodi tou sikse ki nou bann frer ek ser aletranz in fer.

Me ou pa pou vin dir mwan, poudir Seselwa pa travay. Ou pa pou vin dir mwan tou Seselwa i pares. Mwan mon viv dan enn bann pli zoli pei omonn. E mon partaz mon pei avek mon bann frer ek ser ki travay dir pou fer sa ki pli byen pou zot fanmir.

Mon pa pou ziz mon Nasyon, lo de ou trwa dimoun ki ou'n fer dezord lo lans, oubyen pa oule travay. Sorry mon pa pou fer sa. E si Prezidan

i fer sa, i pa etonan ki son Minis
ler i al deor lo tiket ki nou'n
peye pour li glorifye lezot pei.

E la nou pa'n ganny
okenn leksplikasyon lo la.
Mwan mon konn en msye ki fer
louvraz *painter*. A laz 63an, i
pran son bis pou al fer son
travay 6er bomaten. Mon konn
etidyan ki'n *study*, zis pou zot
sorti konman *best student*.
Seselwa i fer biznes, Seselwa i
fer sakrifis pou sonny zot
fanmir.

Fodore nou respe sa.
Prezidan i drwa bann travayer
Seselwa, bann *businessman*
Seselwa en *apology*. I annan
zonm ek fanm ki travay dir la
ater. In annan in akonplir
mervey avek loportinite, ki zot
in gannyen.

Me mon krwar i annan en
rezon, Prezidan pe glorifye e
montre son gran lapresyasyon
pou nou bann frer ek ser
aletranze. Akoz i pe rod semen
pase pou fer Seselwa ki reste a
aletranze vin vote.

Rezon pour sa, i akoz la
ater, la deor i annan en bon pe
mekontantman avek lafason ki
son Gouvernman pe performen.
Anyway, sa set avek li ki nou
pou konnen. Oule dir mwan
napa en landrwa travay isi
Sesel kot Prezidan in ale kot in
vwar en profesyonnel pe
performen?

Me si i pe vwar malez dan
servis piblik mon pou dir li
akoz. I ti dir lo paz 14 zot
Manifesto ki *LDS* i garanti ki tou
travayer dan servis piblik, pou
gard zot louvraz. I pou tire *once
and for all*, sa zafer met politik
dan travay. E i pou fer sir ki tou
bann promosyon e lavansman i
vin lo profesyonnalizm, e lo
merit.

Me ki nou'n vwar? Zis
apre zot in antre dan lofis, zot
in komans pouz dimoun. Zot pa
renouvele kontra bann
profesyonnel, e fer zot
redundant.

Pa renouvele kontra in vin
en lot fason pou met ou deor. La
ankor en mansonz e desepsyon
par sa Gouvernman *LDS*.
Promosyon pe ganny donnent,
parey zot pe dir - promosyon
pou ganny donnent a zot bann
aktivis ek *sponsor*, parey dan
STC. E post pe ganny kree pour
serten zot bann aktivis. Zot
bann aktivis, pe pran plas bann
ki'n ganny fer *redundant*.
Sanmenm ki i apel pou napa
politik dan landrwa travay?

Manifesto *LDS* lo paz 15 i
kontinyen; zot Gouvernman
pou formil bann *Scheme of
Service*, ki kler, avek lavansman
baze lo performans. E bokou
nou profesyonnel in tonm
ladan. Zot ti krwar poudir sa

pou en laverite, me sa i ankor en lot desepsyon.

Bann travayer dan servis piblik, akoz zot fristre akoz zot bann benefis, ki Gouvernman *US* ti met dan zot *Scheme*, zot in perdi tou. Gouvernman *LDS* in koup tou. *performance allowance, long service allowance, tousala* in ganny tire.

Alor i pa etonan ki travayer, i demotive ler zot vwar ki pou zot devouman e zot travay dir, zot pa pe ganny *rewarded*. E promosyon, al get dan servis piblik la. Promosyon pa pe ganny donnen pa lo merit. Me plito be baz, lo baz politik e bann ki aktivman siport Gouvernman, pe pas par devan bann ki pli kalifye.

Gouvernman *LDS* ti dir fodre fer servis piblik pli pti. Sa pa vre! Akoz sak fwa i tir en dimoun dan Gouvernman lo giz ki i per servis piblik pli pti, landmen enn son aktivis i ganny apwente dan sa *post*!

Sa *SONA*, pep Seselwa i en desepsyon. Akoz anba sa Gouvernman *LDS*, zis en pti group byen eze ek son bann siporter ki pe benefisy. Nou pa sirprann ki bann Minis i donn son lekor logmantasyon.

Me ler ou ganny en Minis i vin lo *Tête à Tête*. E annou konpran *mindset* sa *leadership*.

I dir ou ler son revey i sonnen 5er bomaten, i get son saler, pa demann li leve pou al dan sa biro. Si en Minis, i ganny pres R80mil pe dir sa, be ki ou ekspekte *civil servant* ki ganny pli ba dir? Ki ou ekspekte sa ki dan *minimum wage* i dir

Ou menm ou, ou al fer sa bann *statement*. Ou *leadership*, i fer sa bann *statement*, apre ou blanm travayer ou pa le travay? Sa i apel en *lack of leadership*, apre ou vin blanm travayer? E ladan menm - e sa i trazik - in ariv en staz, kot profesyonnel dan zot bann louvraz pe pran lord avek aktivis prezanz. Aktivis an deor ki pe dir profesyonnel ki pou fer. E sa i ariv dan militer, i ariv dan Lapolis. *File* i trennen lo latab Minis.

E si profesyonnel i konplent, *telling-off*. E i enteresan sa. Konparab ek bann Minis *US* dan lepase, ki ti toultan pare pou *take zot Minis to task*, an piblik, Prezidan de lannen konsekitiv tou son Minis, i *above reproach*. E tou sa ki zot fer i byen !

Travayer pa kapab konplent e ou a dir nou. Mr Speaker mon pa ganny en konpran. E la sa klima latolerans, ki ti annan lontan in perdi. In vin avek en klima entimidasyon. Wi Mr Prezidan i

annan en klima entimidasyon, ek lafreyer dan nou pei.

Ler ou, ou vin dir nou napa telefonn ki pe ganny *bug*. I akoz ou konnen, ki annan telefonn ki pe ganny *bug*. E ou konnen Seselwa, i konnen, Seselwa pe dir telefonn pe ganny *bug*!

E kontrerman avek sa ki ou oule fer nou krwar ozordi. Nou bann frer ek ser i per pou koz lo telefonn. Atraver *Airtel* oubyen *Cable and Wireless*. Dimoun i prefere pou *call* ou lo *WhatsApp*.

Malgre deta pli ser, dimoun i prefere pey deta pli ser pou li *call* ou lo *WhatsApp*. Me sa ki enteresan, mon tann ou koz lo limite, be mwan mon dir i annan en labsans tolerans Sesel - mon tann ou koz lo limite, i tre byen mon apresye ou'n koz lo limite. Me si sa i en lapel senser mon napa problemm avek.

Me selman ou bezwen konpran, mwan mon pa kapab debout nanryen fer. Vin riye, bwar dite, ler mon tande enn mon frer pe perdi son louvraz. Son kontra pa pe ganny renouvre, akoz i pa siport Gouvernman, oubyen akoz in konplent en keksoz.

Ou pa kapab koz limite, ler ou parti atraver son *Leader* dan Lasamble, i refize les nou

Lopozisyon lib pou koze. Ou pa kapab koz lo limite, ler ou sey fer tou fason touy sa parti ki mon reprezante, par anpes son *leadership* koz lo *behalf* son bann siporter.

Ou parti in menm *back down* dan programm politik. Akoz dapre li, sa bann programm pa avans zot. Me nou pa kapab nou tou tonm dakor lo tou keksoz. Prezidan si fodre mon kritik Gouvernman, mon pou fer li! Si fodre mon koz lo saler Seselwa, e ki mon pa dakor ek ou lanaliz. E ki travayer Seselwa i *deserve a better deal*, mon pou fer li !

Realize, si ou vin koz lo lekonomi ozordi ki pe fer byen, sa lekonomi in fer byen akoz lekel? Seselwa aletranze. Non! Sa in ganny fer par nou bann frer ek ser Seselwa ki'n leve e debourye dan sa moman difisil isi dan sa pei !

Si fodre mon koz lo *behalf teachers*, met anba mikroskop problem dan Minister Ledikasyon, mon bezwen fer li! Si fodre mon koz lo *behalf* bann *graduates*, ki mekontan lafason ki *ANHRD* avek Minister Ledikasyon pe *deal* ek sa size *scholarship*, mon pou fer li.

Si fodre koz lo *behalf carers*. Ki mannyer ou bann Polisi, pe ganny enplimante mon pou fer li. Si fodre mon koz

lo behalf sekter prive, wi sekter prive. E zot dezapwentman ozordi ki ou Gouvernman pa oule ekout zot.

E pa pe angaz zot ase dan dyalog, pou *improve* lekonomi pei, mon pou fer li. Si fodre mon koz lo mekontantman fermye, malgre ou vin dir nou Minister Lagrikiltir pe byen travay. Kot ou'n dir nou prodiksyon in monte san donn nou menm, en sif ki mannyer prodiksyon in monte, mon pou fer li.

Si fodre mon dir, ki mon pa dakor ler en Minis lo en *visit funded by tax payers money*, i glorifye en lot pei, mon pou fer li. Si fodre mon dir ki mon konsernen avek sa *constant use of force*, oubyen demonstrasyon lafors dan sa pei, mon pou fer li.

Tousala mon bezwen fer akoz mon responsabilite. E linite pou vin ler ou, ek ou Gouvernman i aksepte kritik e annan latolerans pou permet lavwa dimoun ganny tande. Apre tou "fer tande ou lavwa", sete ou moto, oubyen ou ek ou lekip, zot in bliye?

Konman Dirizan Lopozisyon ou, ou ti kapab eksprim ou lekor libreman. Ou ti ankouraz travayer dan servis piblik pou fer li, ou ti ankouraz travayer sekter prive pou fer li. Kwa ki'n sanze ozordi? Mon

note apresye sa lapel kot ou dir zournalist demann kestyon.

Ou anvi ki tou dimoun i kestyon sa ki Gouvernman pe fer, i byen. Me eski ler, nou kestyon Gouvernman zot pou pare pou vin reponn?

Mon swete, ki bann Minister osi i a reponn lapel bann zournalist, ler zot pe rod leklersisman. Linite Prezidan i demann en lapros senser - en lapros ki permet Lopozisyon ganny trete avek respe dan sa Lasanble e an deor sa Lasanble.

Ki bann Minis a vin devan nou e reponn kestyon ki zot ganny demande, e personn pa ava rod fason anpes zot reponn sa bann kestyon. Linite pou vin ler ou ek ou bann aktivis, i aret fer *character assassination* lo en dimoun ler i donn son pwennvi lo en keksoz ki Gouvernman pa kontan.

Linite pou vin ler ou annan en *leadership* Lasanble ki separe, avek *leadership* ou parti. *I am truly sorry Mr President, but unity cannot happen in the absence of tolerance!*

Ou demann pou linite i osi depann lo aksyon ki demonstre en vre lentansyon senser. Zis en zour apre ki ou'n koz lo lamannman Konstitisyon, nou tande *Cabinet*, in aprouv en lamannman, pou permet

Lafors Defans asiste okenn Lotorite piblik an relasyon avek sekirite piblik, proteksyon lanvironnman, sekirite maritim ouswa *zone maritim*.

Mon ti a kontan konnen ki ou vre lentansyon la! Atraver sa lamannman? Nou kapab konpran sekirite maritim, me sekirite piblik i ozordi rol Lapolis anba Konstitisyon. Lartik 161 nou Konstitisyon, i fer sa kler.

Ou fek dir nou, ou apresye ki ou annan nou konfyans, dan travay lafors Lapolis. Ou'n menm felisit Komisyoner. Be eski sa lamannman pe dir en lot keksoz? Seselwa nou bezwen reste vizilan. Gouvernman i bezwen vin fran e dir nou ki son vre lentansyon atraver sa lamannman.

Prezidan ou en dimoun ki ti deza dir dan sa Lasanble menm, akfer Sesel i bezwen en larme. Me ozordi i paret mwan, ou byen kontan ou larme, parey Medaris Mussard i dir. Mon bezwen dir ki sa i en desizyon ki sok mwan.

Sa lapros servi lafors pou rezourd tou problem in konmans vin en norm dan nou pei. E sa i en lot rezon, akoz Seselwa pe santi en klima mank tolerans e entimidasyon. Se sa Leta nou Nasyon. I pa etonan ozordi pou vwar larestasyon

gran piblik ganny fer dan en fason agresiv.

E prezans militer en pe partou dan nou pei. E parfwa kot menm bann manm ou sekirite, i paret pe enplike. Mon'n vwar plis lenstans kot fizi in ganny servi pou demontre lafors anba ou Gouvernman, ki anba sa Gouvernman US pandan sa dernyen 4ans.

E la mon pa krwar lafot i antyerman avek nou bann zofisyen liniform, zot pe swiv lord. Eski demen zot osi zot pou al reponn kestyon, devan en *TRNUC*?

Mon leksperyans travay dan Gouvernman, in anmenn mwan pou konpran ki ler nou koz, ler nou poz nou latet lo nou zorye aswar, i annan en zonm ek en fanm ki pe fer sir nou propriete i an sekirite.

I annan en zonm, oubyen en fanm ki pe patrole lo en bato pou anpeste ki nou resours maritim i ganny vole. I annan en zonm ek en fanm ki pe veye pou anpes drog antre pou anpwazonn nou zanfan.

Me nou bann lafors, i demann plis respe. Fodre napa lenterferans dan zot travay. Ler ou dir nou ki pou napa dimoun ki ganny arete e zot fanmir pa konnen, Prezidan ou konn tre byen, sa in arive anba ou Gouvernman ! E mon kontan

ou pe donn nou ou langazman ki sa pa ariv ankor.

Mon ava dakor avek ou, sa bann *video* konportman vvolans lo lans pa bon, krim kont touris ki kapab afekte nou limaz, pa bon. Vol propriete dimoun, i pa bon.

Me si ou solisyon se met plis solda lo lans, met plis solda lo semen, eski sa pou anmenn plis sekirite, oubyen lafreyer?

Ou bann desizyon pou mwan, i paret mwan en pti pe dekonekte. Si i annan problem, ou devret vin fran e dir ek nou. La ou pou bezwen eksplik nou. Akoz ki malgre ou'n felisit lafors Lapolis e ki ou'n koz tre for, lo size *GOP* e ki mannyer Gouvernman i bezwen kontrol *GOP*, nou pe ganny rapor, ki ou'n fek plas lanons dan en zournal Nepal pou ganny 60 Nepale pou vin travay konman zofisyen Lapolis e zofisyen dan Lafors Paramilitar.

Apre tou sa kritik ki ou'n fer lo Gouvernman avan, ou vire e al fer menm keksoz ! Sa bann Nepale pe al ganny peye \$900 aparan. Apre tou ou koze lo *GOP*, pou mwan ankor enn fwa dezapwentan e en desepsyon. Fodre nou serye e pran nou en desizyon dan sa pei.

E si nou admet, ki i annan lenterferans dan travay bann lafors sekirite, e par sa menm

analiz, i paret persepsyon ki dimoun pe gannyen, i annan lenterferans dan bann lenstitisyon Leta.

Mon pa oule krwar sa. Me sa ki dimoun pe dir, la deor. Mon pa dakor sa *constant* konversasyon ki ou avek Zidisyer pe fer, pe diskit lo tou keksoz. Preogativ diskit *sentencing*, se Zidisyer ki annan, preogativ diskit servison resours se Zidisyer ki annan. Ki L'Egzekitiv pe enterfer dan travay ki Zidisyer i annan pou fer ?

E la sa ki pli enteresan, mon byen kontan ki ou pe koz lo en Lalwa. E la mon dir, mon byen kontan ki ou pe koz lo en Lalwa, pou bann *repeat offenders* e Lalwa pou bann ki komet krim kont zanfan. Sa i tre byen.

Be ki mannyer dan ou konversasyon, ou ale ou al kot Ziz avan, ou al kot Lakour avan, pou koz lo la. Kan landrwa ki ou devret vin koz lo la, se sa landrwa ki pou fer sa Lalwa e sa se Lasanble Nasyonal. Sa i en mank respe pou Lasanble Nasyonal !

Ki mannyer nou koman Manm Lasanble prezan, apre ki Zidisyer pou'n dir nou poudir sa i meyer Lalwa, nou pou ale nou pou al kestyonn sa? Mon pa ganny en konpran ki mannyer

ou pran ou bann desizyon, ou met zot ansanm mwan.

Prezidan nou bezwen kler, ki Konstitisyon i fer kler, ki rol sak bann lenstitisyon i annan. E nou bezwen respekte rol ki Konstitisyon in donn nou bann lenstitisyon. Akoz si non, tou desizyon ki ganny pran, pou toultan ganny *tainted* par en linterpretasyon lenterferans.

I osi byen ki ou'n koz lo *Human Rights Commission*, mon kontan. E mon kontan ou dir ou pou donn sipor *Human Rights Commission*. E ki zot travay pou amplifye sa i byen.

Me ler *Human Rights Commission* i anvoy son rapor kot L'Egzekitif, fodre ki L'Egzekitif i reponn. Sa Rapor lo Kaso, ti avek Minister Zafer Entern, depi Oktob 2020. E zot pa'n reponn. Annefe menm avan ki ti annan dimoun ki ti ganny rimann, plis letan ki zanmen in deza arive dan listwar Zidisyer, nou Trwazyenm Republik. Prezidan ou pe kree ou prop listwar.

Mon kontan, ki ou'n fer referans avek let ki Dr Patrick Herminie ti ekrir. E ou'n menm al rod Anbasader pou gete. I byen, mon vvar ou pe swiv sa ki US i fer. Be alors napa nanryen pou ou anpeste ki dan lespri tolerans e respe, anvlope dan sa lapel pou linite, les

United Seychelles, zwe son rol aktivman konman en parti politik dan Lopozisyon.

Aret persekit nou bann siporter, ki ankor travay dan Gouvernman. Aret esey anpes nou koze lo televizyon. Aret *threaten* dimoun ki anvi asosye avek nou. Se Sa ki ava permet nou pou vreman vin alaoter, *a modern democracy*. Annou pratik sa ki nou Konstitisyon, i demande. E annou respe lespri, sa Konstitisyon.

Frer ek ser Seselwa, finalman Gouvernman pe al pran en desizyon lo novo direksyon avek COVID. Mwan menm mwan mon pa'n ganny eparnye, avek sa maladi. E ziska ozordi, mon ankor pe sibir serten lefe, sa maladi.

Sak dimoun i ganny li dan son fason. I annan nou, nou ganny li nou ganny bann lezot keksoz. Sa nou tou nou ava eksplike. Selman mon konnen lamazorite dimoun, i annan sa long COVID ki ou gannyen. E sa i en lenpak lo ou lasante akoz i enpakte ou sistenm, respiratwar, pou en pe letan.

E pou souvandfwa mon krwar, ler mon'n lir dan Lasamble, bann dimoun i remarke ki mon bezwen touse. Se akoz ou met sa mask, e COVID enn bann lefe ki annan lo ou se ki apre i fer ou perdi ler.

Mon sanse ki mwan mon'n nobou *overcome COVID*. Me malerezman bokou dimoun pa'n, pa'n sitan sanse. I annan 150 dimoun ki'n - 150 a 160 dimoun ki'n ofisyelman, ofisyelman perdi zot lavi avek *COVID*.

Me i pou neseser ki Gouvernman i rode, ki vre sif dimoun ki'n mor avek *COVID* dan nou pei. I pou enportan sa. Akoz perdi en pros i vreman fermal, me perdi en pros si i ti kapab ganny anpese i pli fermal ankor.

Mon en pti pe etonnen ki mon pa'n vvar Prezidan, prezant son senpati avek sa plizyer Seselwa ki'n mor avek *COVID*. Mon en pti pe etonnen. Mon pa konnen si in, en pti *lapsus*.

Me selman lo mon par, mon le dir ki mon le senpatize. E zot latristes, i en latristes profon pou nou pei. E ki nou swete ki nou a kapab *overcome*, sityasyon *COVID*, pli vit posib. E ki nou lavi i a retourn normal. E bokou zenn, bokou *sportsmen* pe espere pou nou vvar, ki direksyon nou pran.

Be i byen ki *Platinum* pe al zwenn pou desid sa kestyon. Me i enportan ki i pa politisyen dan *Platinum* ki fer sa desizyon. I pou bezwen eksper Lasante Piblik, ki gid sa desizyon.

Akoz desizyon final pou retir bann restriksyon *COVID*, pou bezwen depan lo bann eksper dan Lasante. E la mon le dir ek Prezidan ki mon pa aksepte ki nou pa ankor ganny detay lo depans Fon *COVID*.

Ler Prezidan i dir nou ti annan mon krwar 68milyon, mon krwar ti annan plis. A en moman mon krwar ti annan 78milyon, dan Fon *COVID*. So nou ti a kontan konnen kwa ki'n arive, ek bann depans dan Fon *COVID*. E donn nou, donn nou sa lodit ki sipoze pe ganny fer, par Biro Oditer Zeneral.

E avan ou kree en *Sovereign Wealth Fund*, avan ou dir nou kree en lot fon pou met larzan ladan, i annan fon mon krwar pou Lopital La Digue, ou a dir nou ki'n arive ek sa bann fon. Konmsi donn nou sa detay, montre nou ki leta keksoz i ete.

Sa diskour ki Prezidan in fer avek nou pa'n konvenk personn parmi nou, mon bann frer ek ser, ki nou Prezidan i konekte avek larealite ki nou Nasyon pe fer fas avek.

Be nou, nou bezwen montre li ki nou egzize ki li ek son Gouvernman, i alaoter sa lekspektasyon, ki i ti'n donn nou, ki'n promet nou. Fer li konpran ki leskiz parti leskiz, pa pou sanz lefe, ki se li ki

bezwen tras semen pou Sesel bouz devan.

Fodre ki i vin pli transparan lo sa ki son Gouvernman pe fer. Fodre ki i vin pli *open*, e dir Seselwa ki pe pase e konekte avek santiman sa pep.

Prezidan i devret konnen ki Leta nou Nasyon, ler ou koz avek bann biznesmenn ek bann dimoun ki bann akter, ki envestiser Seselwa, zot ti a kontan konnen ki kalite *FDI*ki'n antre dan pei.

Zot ti a kontan konnen kwa ki Gouvernman, in al negosye an relasyon ek sa bann *FDI*. Prezidan i devret kapab dir nou kote ki'n antre, e dan ki sekter. I ti bezwen annan sa lenformasyon ler i vin devan nou.

I bezwen realize ki ler i dir nou ki konstriksyon pe ganny fer partou. Sa i riske defet son largiman ki en *graduate*, oubyen nenport ki dimoun i kapab ganny en lakaz. Akoz sa pou fer monte pri konstriksyon. *Supply and demand*.

So i bezwen pli kler, pli transparan avek lenformasyon ki i bezwen donn Lepep Seselwa. Leta nou Nasyon, ler i Prezidan koz *PPP*, e dan bann gran proze ki li ek son Gouvernman, lapros zot pou

pran al rod lenvestiser etranze. Napa problem ek sa.

Me Seselwa i le konnen dan ki sekter i pe al donn sa bann envestiser kontrol. Eski i pou donn nou Por etranze? Eski i pou donn nou *Airport* etranze? Lekel ki pe vin envestir? Kwa ki ou'n negosye?

Tousala nou pa konnen. E la nou tann nonm *dry dock*. Me eski i annan en letid, en letid lenpak lanvironnman ki'n ganny fer? *Dry dock* pou lanmenm la, o bor en *Marine Park*, eski nou pe mazinen, kwa ki pou arive?

Oubyen eski zis nou pe tay ek sa lenvestisman, san realize ki i kapab arive e san realize ki son konsekans? Ankor enn fwa petet nou ava vwar, proze *dry dock* ganny eksplike *State House*, par Prezidan avek Vis-Prezidan.

Prezidan i devret konnen ki Leta nou Nasyon e ki Lepep i le konnen, ler li ek son bann Minis i *travel* lo *tax payers money*, parey i ti fer. Zis parey i ti fer, poudir ki al fer dan sa bann vizit.

Parfwa ou ganny *interview*, parfwa ou pa gannyen. Mon bezwen dir, ou pa konnen la deor Seselwa, mwan mon pa konnen. I paret personn, pa konnen ki sa bann

msye ek sa bann madanm i al diskite.

Eski zot pe diskit nouveau *venue*, pou nou bann zenn *graduates* sa *scholarship*? Manrmay i fristre la ater. Pa konnen? Eski zot pe rod nouveau loportinite biznes pou bann lantreprenere? Pa konnen. Ki'n arive avek diversifikasyon baz ekonomik, avek kannel, lekors kannel? Nou pa konnen.

Prezidan i devret konnen ki Leta nou Nasyon, i ki Seselwa pa pou negosye avek drwa imen personn dan nou pei. I bezwen realize ki ler i dir *State House*, pa pe enterfer avek bann lanket, Seselwa i oule vwar levidans ki sa pa pe arive.

Ki sa zafer *file* ki bezwen al *State House*? Eski *State House* ki *call poudir* lekel ki pou arete? Eski i annan *personnel State House* ki *involved* dan bann arrestasyon? Eski desizyon kot pou met dimoun lo rimann, ler zot ganny arete apre al dan en kasou dan en distrik, i ganny fer *State House*? I annan la anndan i konnen.

Akoz paran sa bann manrmay ti pe pas partou, pou rode kot zot ti ete. Prezidan i devret konnen ki Leta nou Nasyon, ler li i dir nou son bann Minister pe performen i annan bokou konplent lo linefikasite son bann Minister. Menm son

bann *MNAs*, avek manm piblik ki zot zwenn, zot koz lo la.

Bokou *MNA*, pe vwar difikilte pou kapab fer bann Minister ekout bann konsern ki zot annan, e delivre, lo bann proze distrik ki zot annan. E sa i aplik tou lede kote latab.

Eski bann Departman Gouvernman in kapab delivre lo lakantite proze dan Bidze 2021? Nou pou vwar dan rapor ki pe vini, ki pou montre nou ki en kantite proze, pou Gouvernman pa'n kapab fer. Zis parey mon ti dir zot. Parey US ti dir zot, pandan letan Bidze. Ki sa i tro anbisye, e zot pe al tro lwen.

Prezidan i devret konnen, ki *response time*, lo bann konsern, lo bann *enquiry* ki al devan Minis, i tro long. E ki akse ek son bann Minis, in vin pli difisil, ki zanmen in deza ete anba nou Trwazyenm Repiblik.

E dan bokou distrik Seselwa pe dir, ki Gouvernman napa lentere piblik a ker, ou bezwen rode, ou bezwen al gete. Prezidan i devret konnen ki Leta nou Nasyon, ki nou Nasyon i konfize lo sa size *tanker*.

En *tanker* i ganny vann anba zot *watch*, e i pran en pake letan avan ki Minis pou Finans i kapab vin eksplik bann aksyon ki'n pran. Nou *end-up* met dimoun, ki pa ti bezwen

ganny enkli dan en deba politik, antre dan en deba politik, zis akoz en Minis in mal fer son travay!

E la lezot dimoun i pey lepokase par zot karakter ganny asasinen. Akoz Seselwa i konfize, i pa konnen.

E mwan mon pa dakor ek *character assassination* personn. Mon pa fer li, e mon pa kontan dimoun ki fer li. Prezidan ti devret konnen ki Leta nou Nasyon, i ler li ek son *Cabinet*, i konmans fer demars pou *legalize sex toys*.

Bokou Seselwa, i mekontan. I annan menm en *survey*, ki *Trade Department* in avoy lo telefonn. Bokou dimoun i santi poudir, ler nou pran sa direksyon, nou pe evantelman enpakte lo *moral fiber* nou pei.

Bokou pei ki'n al ver legalizasyon *sex toys*, in al ver legalizasyon *pornography*, legalizasyon bann lezot keksoz apre. Bokou gran lavil Lerop i koumsa. Prezan mon oule demann zot, (zot pe mirmire mon le demann zot) eski i pe klanm lapriyer Bondye, ler nou pe pran bann tel desizyon? I marse ansanm sa?

Eski se sa transformasyon ki nou le vvar, ki nou le gannyen? Non, la zot dir mwan oli problemm avek *legalize sex*

toys? Dimoun pe ekout zot deor.

Prezidan ti devret konnen ki Leta nou Nasyon ler i koz lo *Air Seychelles* e felisit tou dimoun. E i felisit tou dimoun, i menm blye felisit Lasanble Nasyonal ki li i ti demann nou. E ki nou ti pran letan pou travay lo la. Be les sa, i pa'n felisit nou, napa problemm.

Me bann travayer *Air Seychelles*, Prezidan ou pa felisit zot? Bann ki'n pran rediksyon saler, ou pa felisit zot? Bann ki'n fer bokou sakrifis, zis pou zot kapab gard zot lanplwa, ou pa felisit zot?

E la an plis, petet ti ava bon ou dir nou akoz leta keksoz i koumsa ; bann pilot pe al ganny ankor rediksyon saler e zot kontra pe al ganny varye ankor.

E byento zot pe al met *case* kot *Employment Tribunal*. Bann enzenyer, bann *staff engineering*, osi menm zafer. E byento zot pe al met *case* kot *Employment Tribunal*. Oule dir mwan Prezidan, pa'n gannyen sa lenformasyon avek *Management Air Seychelles*, lo kwa ki pe pase? Fodre ki nou donn Seselwa *the full picture*. E ou devret montre sa portre dan tout latransparans.

Frer ek ser Seselwa, in ariv en staz kot Sesel i bezwen

en vre direksyon. Sa lafyerte ki nou ti konnen konman Seselwa, pou bokou dimoun pti a pti nou pe perdi. Sa dinyite ki nou ti annan, pe konmans evapore.

Ozordi menm, enn nou senbol nasyonal pli enportan, nou Paviyon in ganny servi konman en zouti politik. I fer lapenn, ler ou passe ou vwar Paviyon Sesel anpandan ek en pye bannann, ek en pye mang.

I fer lapenn ou menm vwar Paviyon Sesel anpandan ek en lakaz lisyen. E dimoun i tir portre. Kisisa sa? Nou bezwen annan en respe, e i pa etonan, akoz si nou napa respe pou Konstitisyon, nou pou napa respe pou Paviyon.

Ozordi bokou nou zenn i dezapwente, ki Leta pa pe regard, dan ki fason ki pou donn zot loportinite avanse. E bokou zenn ki mwan mon'n koz avek, pa oule ki rekonnnet talan e lakonplisman i vin en legzersis piblisite avek konotasyon politik.

Ozordi si ou Gouvernman, pa siport sa sistenm ou pa pou ganny envite *State House*. I en realite sa. Si ou ouvertman, ouvertman pa siport sistenm, e ou aktiv dan politik kont sistenm, ou pa pou ganny envite *State House*.

Premye *pediatric surgeon* Sesel, i Dr Marvin Fanny. Dr Fanny i en Dokter, in vin en *pediatric surgeon*. Ta travay, ta determinasyon, ziska la zot in refize vwar sa garson. Akoz, i en manm lo Komite Egzekitiv US.

Selman nou le koz linite? Linite pa vin dan labsans latolerans, *sorry*. E la mon le pas zot en mesaz, lezot zenn ki'n vizit *State House*, i ankor pe esper fri zot diskisyon. Ler zot al *State House*, bann *graduates*. Akoz bokou i ankoler, ler zot, zot pe ganny dir al *Malaysie*, zot tande poudir i annan pe al Lerop.

Nou lazenes i bezwen pli bon direksyon. E nou pe osi vwar, e la mon vreman tris ler mon dir sa - nou pe osi vwar en nespes, sityasyon kot tro bokou zenn pe perdi zot lavi dan bann fason initil. Swa dan bann aksyon vyolans, pa konnen, swa dan bann aksidan.

E ou a dir dan plas sa nyaz nwanr ki Prezidan in dir pe ale, sa nyaz pe vin pli epe. Akoz Prezidan, i dir nou lavey, vey konfli *Ukraine*, lannmen lager i deklare! Atraver Onorab Georges mon oule dir li, dir Prezidan pa koz ankor lo lager, akoz si i koze, lager pou deklare ankor. En lot leskiz pou vini, mon pa konnen ki labous sa.

MR SPEAKER

En moman silvouple. Bann Manm, vey en pe zot mirmirasyon par deryer. Mon konnen Lasanble i pa en Katedral. Me selman, si ou fer en komanter avek ou kanmarad akote ou fer li ba.

Mon tann tro bokou mirmirasyon isi anler. Mersi. Onorab Pillay, mon sipoze ou pe al ver konklizyon.

HON SEBASTIEN PILLAY

Mersi Mr Speaker, ou ava donn mwan zis en pti minit, akoz ou'n pran en pti minit pou met lord dan Katedral.

Mr Speaker nou pou ganny ankor leskiz atraver Gouvernman, akoz zot pa pou kapab donn nou nanryen. La i poudir nou lager *Ukraine* in deklare.

So lo en kote, si zenn pa pe ganny enspire, bann ki pli aze pe viv ek lensertitud. Bokou i konsernen avek laz retret ki pe al ogmante. Kondisyon ekonomik in sanze, opred ler sa size ti vin devan nou premye fwa. E bokou dimoun, pa kapab esper ankor 5an, pou tous zot pansyon.

United Seychelles pou prezant son pozisyon lo sa size e nou swete, dan sa novo lespri, ekoute e limite ki Prezidan pe prese, i ava pare

pou ekout lopinyon e lezot dimoun. E nou ava regarde si sa ki pe ganny fer pa'n zis vin en fetakonpli.

E i kler ki Lasanble Nasyonal pou annan en rol enportan pou zwe pandan sa lannen. Bann *MNA*, pou annan bokou travay devan zot. Mon swete ki Gouvernman ava asire ki Lasanble Nasyonal i ganny ase resours pou delivre lo son manda.

E ki bann Manm Lasanble ava ganny sipor ek Lotorite, pou adres konsern zot bann *constituents*.

Mr Speaker, mon swete ki Gouvernman, pa pe kasyet okenn lamannman konstitisyonnel. Nou'n vwar enn sorti, e mon swete, mon'n tande - mon pa oule krwar, ki sa zafer sanz *term of office* Prezidan pou fer li vin 7an, i pa vin en realite, e ki nou pa vwar nou ankor pe abiz lo nou Konstitisyon.

Mon donn mon langazman, ki pou ariv en zour ki nou pou aret servi bann parol ki diviz nou e rekomans servi bann parol ki anmenn nou ansanm. Nou pou met deryer nou, tou sa ki fer nou pli fay e konsantre lo sa ki fer nou pli for.

Resours pli enportan ki Sesel i posede se sakenn antre

nou, fam Seselwa, fam zom Seselwa ki leve e debourye. Seselwa i ranpli ek talan, determinasyon e lentelizans. Pa zanmen les personn fer zot krwar otreman.

Mr Speaker mon oule senserman remersye sa plizyer dimoun ki'n kontakte mwan atraver *WhatsApp, messenger* e bann ki'n brav e *call* mwan. E donn mwan zot reaksyon, lo Leta nou Nasyon.

Mon remersye, mon lekip isi dan Lasanble. Mon *Chief Whip*, mon *Deputy Whip*. E nou bann Manm US dan sa Lasanble pou zot *input*. E mon swet zot sikse dan zot deliberasyon.

Mon eksprim mon gratitud profon, pour sa gran fanmir *United Seychelles, from son leadership*, ek son bann aktivis. Pou zot konfyans ki zot in annan, pou zot konfye mwan sa latas, *lead* nou lekip dan Lasanble. Zot lafeksyon, zot lankourazman, i en sours lenspirasyon enportan.

Mon swet tou Manm Lasanble, san leksepsyon lo ki kote latab zot asize, kouraz dan zot deliberasyon. E dan zot travay pandan sa lannen.

Mr Speaker mwan mon krwar dan en vre Sesel modern, demokratik e inovativ. Mon krwar dan sa nouvo zenerasyon

zenn ki pou pran la relev demen.

Mon garanti zot ki mon pou fer mon mye, pou kit Sesel pli meyer ki mon ti trouv li. Mon pou fer sa pou zot, mon pou fer sa pou nou, mon pou fer sa pou Sesel. Ki Bondye i kontinyen beni nou pei. Mersi.

(APPLAUSE)

MR SPEAKER

Mersi Onorab *Leader Lopozisyon*. Mon pas laparol Onorab Bernard Georges *Leader Biznes Gouvernman* dan Lasanble.

HON BERNARD GEORGES

Mr Speaker. Bonzour Mr Speaker. Bonzour tou dimoun ki pe ekout nou dan lakour. Mr Speaker permet mwan o konmansman mon respons lo mesaz Prezidan Larepublik lo Leta Lanasyon, pou swet ou, Mr Speaker, tou mon koleg *MNA*, isi dan Lasanble, Clerk e Depite Clerk e tou *staff* Lasanble Nasyonal tou le meyer pou sa lannen travay ki devan nou.

Mon swe se ki nou ava kapab, parey Prezidan in demann nou a la fen son mesaz, fer sa larout ansanm konman en Lasanble malgre nou diversite politik.

Mon profit sa lokazyon osi pou swet la byenveni nou de novo Manm, ou plito nou de ansyen e novo Manm, Hon Paul Ernesta e Onorab Flory Larue. Mon'n ekout zot pti *interview* avek SBC mardi, e mon obzerve ki letan ki'n zot in an deor nou Lasanble pa'n redwir zot kapasite koze.

Permet mwan osi Mr Speaker pou en pti moman avan mon retourne lo mon repons lo mesaz Prezidan lo Leta nou Nasyon, pou pran laparol, pa konman *Leader Zafer Gouvernman* dan Lasanble, me konman Bernard Georges, MNA Les Mamelles. Sa se pou mwan fer 2 refleksyon.

Premyerman, mon le eksprim mon latristes konman son *MNA*, son koleg Avoka e son zanmi, lo lanmor Frankie Simeon ki'n arive sa semenn. Frankie pa ti en garson fasil pou *manage*, me in annan en lavi kontrovers, me Frankie ti en zanfan Bondye e en zanfan Sesel. En garson entelizan, ki lavi in met en fardo lo son zepol ki i pa'n annan lafors pou anmennen pou plis ki son 50ekek lannen.

Frankie ti en Avoka devoue pou son kliyan e i ti dernyen kandida Lopozisyon, sa letan, dan eleksyon Lasanble pou nou distrik avan ki mwan

mon ti ganny swazir pou ganny loner reprezent Les Mamelles, e i ti'n fer tre byen dan sa eleksyon. A sa lepok Frankie ti annan en karyer briyan devan li, me la Les Mamelles in perdi enn son zanfan e dan distrik i annan gran latristes.

Mon oule dan en fason kler la ozordi, an mezir ki mon anvoy mon kondoleans pou son madanm, son zanfan e son fanmir, pou mwan demann zot en leskiz ki nou pa'n fer ase. E la mon'n *include* mon lekor ladan pou ed Frankie pandan son lavi. Parol rekonfor apre en lanmor i fasil, me i pa redwir santiman ki nou'n *let* Frankie *down* dan en serten sans

Annou servi sa maler alor pou nou tou, Les Mamelles konman partou dan Sesel, renouve nou langazman konman zanfan sa menm Bondye, pou pa negliz nou frer e nou ser dan zot moman difikilte, me o kontrer pou nou pli solider avek zot dan zot moman frazil.

Mon dezyenm pwen, Mr Speaker, se lo size Ikrenn. Ankor enn fwa, mon pa pe koz konman *Leader Zafer Gouvernman*, me konman *MNA Les Mamelles* e en *Manm Board Parliamentarians for Global Action*, ki son *Headquarters* i *New York*, ki'n fer sorti en

statement lo sa size ozordi e ki mon annan li la isi avek mon dan Lasanble, pou mwan kondann san rezerv sa latak ki Federasyon *La Russie* pe fer kont Ikrenn, en pei souvren.

Konman en pti pei zil, dan en morso losean kritik pou pasaz bato, pasaz bokou bato *cargo*, e dan en rezyon ki ris par son gran teritwar maren, avek stok pwason enorm, e larises lo fon nou lanmer, nou osi vilnerab a en latak par en lot leta ki kapab pe konvwatiz nou larises.

Sa ki pe arive Ikrenn, i devret en *warning* pou tou pei ki, zis akoz nou napa lennmi, nou *ok*. Nou Gouvernman in fer li en devwar pou defann en sistem ki *rules-based* e ki baze lo *the rule of law*.

Par son lenvazyon en lot pei souvren, *La Russie* in ebranz sa sistem e in remet ankoz Lalwa Enternasyonal. Me pli pir ankor, sa lenvazyon i montre nou ankor enn fwa ki mannyer bann fenomenn parey lepidemi *COVID* ouswa en konfli lwen avek nou, ouswa resofman later ki nou pa'n ede pou fer arive, i kapab annan konsekans direk lo nou pti pei e nou lekonomi fazil.

Nou priye ki sa enn konfli, ki vin zis apre ki lemonn pe repran en souf apre

devastasyon ekonomik ki *COVID* in anmennen, ava rezourd vit e san tro konsekans pou sa de pei lo fron batay, pou zot pep, e osi pou nou ki pe observe lwen avek zot.

Mr Speaker mon repran laparol konman *Leader Zafer Gouvernman* e mon fer li avek en serten trepidasyon, akoz mon latas, nou latas lo sa kote latab, i enn ki gran e ki difisil. Ler Prezidan Barak Obama ti Prezidan Lanmerik mon ti regard en dokimanter ki ti'n ganny fer lo li.

A en serten moman dan sa dokimanter *camera* ti antre dan en biro kot son bann *speech writers*, bann dimoun ki ekri son diskour, ti pe travay lo en diskour ki i ti pou al donne. Sa bann travayer ti pe dir ki zot pli gran defi sete pou ekri en *speech* pou Prezidan Obama, akoz Prezidan Obama ti en pli bon *speech writer* ki zot tou. Zot ava konpran sa ki mon pe al dir.

Isi osi nou annan menm problem. Ki mannyer ou reponn a en diskour, a en mesaz lo Leta Lanasyon ki sitan parfe dan son konteni, ki sitan ekselan dan son swa parol, ki sitan enteresan dan fason ki in ganny delivre? Ki i reste pou dir, ler tou sa ki ou ti pou anvi dir in fini ganny dir? Kwa ki ou pou fer ler ou Prezidan in dir tou

keksoz, e in dir li pli byen ki ou, ou kapab dir?

Mon konnen ki zot pou grense lo lot kote latab, me les mwan dir ki sa ki nou dan sa Lasanble e ki lepep Seselwa in tande Mardi swar ti en *master class* dan diskour par en *Master politisyen*.

(APPLAUSE)

HON BERNARD GEORGES

Me se pa tou. Sa ki nou'n war se pa en zom pe koz zoli parol pou fer kontan - non. Sete en Prezidan ki ti annan tou detay sak parti, sak Minister, lo bout son ledwa. Sa dan li menm i donn nou konfyans ki nou pei i dan bon lanmen. Me i annan plis ankor.

Prezidan pa ti pe senpleman donn legzanp e sif. Non. Si ou ti'n obzerve Onorab Pillay olye evante ou ti pou'n war ki diskour premyerman pa ti dir 2erdtan e ti dir en erdtan e 33 minit selman. E dezyenmman sa diskour pa ti'n ekrir ni dan *Emirates*, ni dan lotel *Brest* oubyen *Bruxelles*. Sa Prezidan pa'n lir en diskour, sa Prezidan pa bezwen lir en diskour.

(APPLAUSE)

HON BERNARD GEORGES

Prezidan Mardi ti koz avek son pep konman en dimoun ki annan en leker pou sak zanfan Sesel e en lanvi ki sakenn parmi nou, nou atenn pli o nivo ki nou kapab, pour ki sakenn parmi nou, nou kapab rekolte maksimonm benefis e viv en lavi pli meyer lannen apre lannen.

Si i annan en fason senp pou rezim mesaz Prezidan lo Leta nou Nasyon se sa enn ; transformasyon nou fason fer i amenn keksoz pozitiv pou nou pei e keksoz pozitiv in fer li gou pou et Seselwa a sa moman dan nou lavi.

Pa tou dimoun ki pou dakor avek sa rezimen mon konpran sa. Diskour avan mwan parey nou'n tande in *focus* lo defayans, lo bann ki pa ankor kapab zouir sa pozitivite, lo bann mankman.

Lezot ki pou swiv i kler pou kontinyen dan menm semen. Sa se zot fason fer, ou koz *mindset* Onorab Pillay? Zot iniform Mardi i fer nou konpran zot *mindset*.

(APPLAUSE)

HON BERNARD GEORGES

Zot semiz rouz i fer nou rapel zot lapartenans a sa rezim ki'n anmenn telman soufrans

pandan telman lontan lo nou pei. E zot kravat nwar eskiz mwan pou dir i fer nou konpran ki zot ankor an dey pou sa defet an 2020.

(APPLAUSE)

HON BERNARD GEORGES

Reste dan fernwanr si zot anvi. Nou, parey Onorab Letourdie in fer nou rapel avan son depar, nou pou viv dan lalimyer. Akoz se sa nou fason fer. Prezidan in fer nou rapel ki pwen depar son ladministrasyon ti le 24 Oktob 2020 e nou pa pou blyie sa dat.

Son ladministrasyon i aze 16 mwan selman. 16 mwan Mr Speaker i en pti git letan, i pa ni menm 500 zour. Nou ti konnen, akoz sete i ti dan Manifesto *LDS*, ki premye latas sa Gouvernman sete pou retourn Sesel dan ran bann pei normal avek en Gouvernman proaktif e performan, en lekonomi stab, en ladministrasyon ouver lo plan lokal e angaze lo nivo enternasyonal, avek en pep travayer.

Tousala anba en parasol legal kot drwa sitwayen i ganny respekte, kot personn pa par lao Lalwa, e kot sa ki vilnerab i ganny proteze e asiste. Fini avek tourn an ron, fini avek desizyon ki pa ganny pran, fini avek pares e trenn lipye.

Fini avek depandans lo Gouvernman depi R1000 lo ou kont ler ou ne e en serkey ler ou mor, en lakle lakaz apre 10an ki ou'n lo lalis. Fini avek koripsyon, fini avek lapreferans, fini avek "ek nou pa ek nou." Pou fer sa, si nou'n swiv byen diskour Prezidan, i annan 3 gran laliny ; transformasyon, pozitivite e gou viv.

Transformasyon premyerman Mr Speaker. Pouwwar parey nou konnen i zel en dimoun, en parti, en sistem, i fikse ou dan en fason fer. Pouwwar pandan en long letan i fer ou kaye. Ou performans i tonbe, ou pa fer gran sanzman striktirel, e ou vin parey en *ice cake* ki'n kaye ouswa en beton ki'n redi. Ou pri dan en sistem e sa sistem i arive domin ou. Se la kot Sesel ti ete 500 zour pase.

Dan en sistem ki pa ti'n ganny renouvre, ki ti pe mars lo en nivo medyok, kot desizyon enportan pa ti ganny pran, e ki ti'n amenn depandans par son popilasyon lo sa Gouvernman. Ler zot ti antre *State House* a la fen Oktob 2020, se sa ki sa ladministrasyon Wavel Ramkalawan ti rankontre.

E se sa ki zot ti bezwen sanze si Sesel ti pou sirviv e si promes Manifesto *LDS* pou

retourn Sesel dan en leta normal ti pou reisi. An plis ki sa, *COVID* ti'n fer ravaz, lekonomi ti lo son zenou e larzan ti pe ganny distribye zis pou anpes nou noye.

Sa ki ti bezwen ganny fer o pli vit posib, sete en seri desizyon enportan pou sanz direksyon ki pei ti'n pran e remet li lo bon semen. Mon pa pou repet sa ki Prezidan in dir. Nou tou nou'n ekout li e nou konnen sa ki i bezwen ganny fer. Me sa ki nou vvar, la 500 zour pli tar, ler nou regard an aryer se en seri linisyativ avek bi pa neseserman sanz sa ki la, me transform lafason dan lekel i ti pe ganny fer.

Striktir leta in reste parey. Brans Gouvernman pa'n sanze, *State House* i ankor dan menm landrwa, parey *Palais de Justice* e nou Lasamble Nasyonal. Kordgard Santral i *still* dan menm landrwa e son Sef i *still* en *Compol. Cabinet* Minis i zwenn parey avan e *SBC* i *still* pas bilten nouvel 8er aswar. Sa pa'n sanze, me sakenn sa bann lenstitisyon in transformen e pou transformen dan lafason ki zot travay.

Me transformasyon, Mr Speaker, pa vin zis avek sanz Prezidan, *Compol*, Sef Lafors Defans, Speaker e Sef Ziz. Sa se sanzman. Transformasyon se

en sanzman profon, e etale lo en pli gran letan. Sanzman i an deor, transformasyon i anndan en dimoun e anndan en sistenm.

Sanzman i fasil, transformasyon i difisil, akoz ou bezwen al dan fon e fer li pandan en long letan. I pa ni vit, ni fasil. Me i pozitiv e i inevitab. Pli gran transformasyon ki nou pe war, e ki nou bezwen vvar dan en pli gran lanpler ankor dan bann mwan ki pe vini, se enn dan sakenn parmi nou, pou ki i repann dan nou sosyete an antye.

Sa se sorti dan en *mindset* depandans kot tou desizyon i dan lanmen Gouvernman, e antre dan enn kot sakenn parmi nou, nou pran sarz nou prop lavi, nou prop responsabilite. Avek restriktirasyon dan Fon Pansyon e alokasyon lakaz e later, byento nou pou war sa kalite transformasyon.

Transformasyon i bezwen enn kot nou prodwir pou rekolte, e non pa asize epi rekolte. Kot nou fer en debrouy pou met en pe larzan de kote pou nou lakaz, olye zis met nou non lo en lalis epi esper en lakle.

Kot nou antre dan en lanplwa ouswa konmans en pti

biznes olye kay lo *URS* oubyen servi larzan *SBFA* pou al *Dubai*.

Transformasyon se ler sakenn parmi nou pou konpran ki *welfare* i la pou ed bann ki pa kapab, me pa en lanplwa. In ler, dan parol Prezidan, pou nou kit medyokrite deryer nou, kit pares deryer nou, aret trenn lipye e antre dan en *mindset* kot nou *focus* lo fer en maksimonm pou reisi, pou ganny meyer rezulta dan lekol, pou amenn plis larzan lakaz, pou ed nou plas travay devlope, pou ki nou ava ganny plis ankor, pou ki pei i ava ranmas plis taks.

E alor bann servis tel parey Ledikasyon, Lasante ek lezot ankor ava amelyore. Mon ava retourn en pti pe pli tar lo sa tem.

Transformasyon personnel i bezwen ganny akonpannyen Mr Speaker par transformasyon striktirel a tou nivo. E se sa ki nou'n war sa dernyen 500 zour.

Dan keksoz ti pti konman gran in annan en lot fason fer, depi pa met portre Prezidan dan Biro Gouvernman, war Prezidan e Speaker kot Louvertir Ofisyel Lakour Siprenm, dan fason sanze bann Minis e o zofisyel Gouvernman, se bann pti keksoz.

Dan latransparans dan lekel biznes Gouvernman i

ganny fer, kot desizyon i ganny pran. Annou zis regard batiman NIHSS, Lopital La Digue, bann por lapes e facilite pou peser dan distrik, remaniman DPA pou donn detrwa legzanp. E kot desizyon i pibliye zis regard zafer *Tanker SEYPEC*, zis regard kominiike Lapolis ki kantite i annan, e kot sa sekter *welfare* ki swa *FA4JR*, *URS*, oubyen ASP li menm in ganny remodle pou ki sa ki pa merite pa gannyen.

Tousala, Mr Speaker, se bann transformasyon striktirel ki Gouvernman in met an plas, pou akonpanny e ankouraz transformasyon endividyle. Lakours i long, Mr Speaker. Sa i pa en lakours 100met, me i en maraton.

Me lakours in komanse e transformasyon nou pei a tou nivo i pou sa premye *legacy* ki ladministrasyon Ramkalawan pou kit avek Sesel. Dan nou bann distrik menm, nou'n war sa transformasyon. Minister Gouvernman Lokal in arive transform lafason ki distrik i fonksyonnen e in fer li avek bokou *perspicacité* e avek bokou senserite.

Pou premye fwa bann Administrater Distrik in ganny loportinite pou rekonnnet zot vre valer, pou sorti dan en sistem kot zot ti'n pri e kot zot ti santi ki zot lwayote sete avek Parti

Politik o pouvwar, e antre dan en sistem pli kolaboratif e pli prodktif. Serten bann *DA* in sanz distrik e sa i kler in amenn bokou renouvo, e bokou pozitivite e pou zot, e pou zot distrik.

Mon dir mersi, Minis Hoareau e ou lekip pou ou travay transformasyon dan sa dernyen 500 zour lo sa Minister, ki sa Minister pli politize isi Sesele.

Lespri deryer sa transformasyon o nivo direksyon distrik, se ki zabitana vvar sa, e zot osi zot ava eksite par sa ki pe arive e fer zot par ;- ki swa pou donn en koudmen direk avek travay distrik, ki swa pou sanz zot fason fer e anbras sa ki zot war pe arive otour zot.

Fasilité Biro *MNA* obor Biro Ladministrasyon Distrik in fer ki en travay lekip ki dan bokou ka pa ti egziste, in trouv en nouveau souf.

Malgre ki mon distrik Les Mamelles pa ankor war bokou lenfrastriktir sa dernyen lannen, mon kapab dir an tout senserite ki sa travay lekip ant *DA* e son lekip e mwan e mon Clerk i solid e performan.

Relasyon i ekselan e sa i dekoul dan latmosfer dan distrik kot nou war en stabilite in antre e malgre serten

nwizans, an-partikilye bann zenn e bann ki fer biznes drog ki'n *conquer* nou 2 *bus shelter* i annan en latmosfer ankourazan dan nou distrik.

Sa in ganny demonstre resaman par proze lanbelisman, par Brigad ki'n loteren pou degaz lasesen dan gro lapli. E par lefet ki nou distrik ti lans troup *Scout 18th Seychelles* avek en gran group zanfan angaze, avek sipor zot paran. Se sa, sa bann transformasyon ki nou bezwen.

Tousala i demonstre Mr Speaker en transformasyon konkret lo nivo distrik. Mon sir ki lezot distrik i annan ankor plis legzanp sa nouveau direksyon ki nou pei in pran.

Permet mwan a sa lokazyon Mr Speaker, pou remersye *DA* Claudette Louise e son lekip, tou nou manm Brigad e Ms Mary Anne, nou *Scout Leader*, mon Clerk Paquina Moustache e tou travayer distrik pou zot travay pou byennet nou distrik e nou zabitana.

Dezyenm parol Prezidan, Mr Speaker Mardi, sete: "Partou kote i annan sa ki pozitiv." E sa parol i vre. Me avan pas lo sa ki pozitiv, permet mwan pou zwe en pti git Lopozisyon. I vre, e nou pa kapab renye, ki pa tou ki byen, pa tou ki parey nou ti

pou kontan dan nou pei. Parey mon'n dir pli boner, transformasyon i en long semen.

In konmanse, me i pa ankor fini. Annefe, par son natir transformasyon zanmen in fini. Si ou pou rod keksoz ki pa byen dan nou pei, *of course* ou pou war. Pri lavi i *still* tro o, lozman i *still* pa ase. Travayer etranze i *still* annan tro. Saler minimonm i *still* tro ba. Sistem Lasante i *still* annan problem.

Rezulta legzanmen dan lekol leta is *still* tro ba. Drog i ankor en fleo e la i pe ganny zwenn avek latak lo touris.

I annan, Mr Speaker, ankor en kantite *room for improvement*. Si nou oule al rode e fer en lalis pou tou sa ki pa byen, ouswa tou sa ki pa ankor amelyore, nou pou arive fer en lalis.

E mon konnen ki sa tim ki sanz dan en niform semiz rouz e kravat nwar, pou rode e pou montre ledwa. Me les mwan dir zot de keksoz avan zot konmanse. Premyerman ;

zot Gouvernman in o pouvwar pandan 43an. Sa i fer 15,500 zour. Bokou bann defayans ki ankor egziste ozordi dan nou pei, sete zot lafot, sete zot mank langazman, sete zot lafreyer pou *tackle* ki'n fer ki sa

bann problem i ankor avek nou.

Dezyenmman, parey mon'n dir nou, nou'n fer 500 zour. I reste nou dan ankor 15,000zour devan nou. Vin war nou dan ankor 15,000 zour e amenn zot lalis, e zot ava vvar pou zot menm ki mannyer en Gouvernman responsab i travay pou amenn sa ki pozitiv dan en pei.

Annou konmans avek en pti lodit lo sa ki ladministrasyon Ramkalawan in kapab akonplir dan 500 zour e akoz Prezidan in kapab dir ki partou kote i annan sa ki pozitiv.

Isi, Sesel, dan en pti lespas letan, nou'n sorti dan en program lasistans finansyel direk atraver sistem FA4JR pou rantre dan en normalite ekonomik kot sak dimoun e sak lakonpannyen in retourn dan son aktivite normal, e reoran travay konman en devwar e non pa koman en leksepsyen.

Reouvertir pei boner atraver en program vaksinasyon agresiv in asire ki 6mwan a 1an avan lezot pei dan lemonn ti kapab fer li, Sesel ti'n deza reoran lelan.

Menm IMF ti sirprann e ti dir o konmansman 2021 ki zot prozeksyon sete ki Sesel ti pou'n retourn lo kote nou ti ete

an 2019 a la fen 2022 sa lannen ki nou ladan la. E i kler ki an mwens ki I annan en lot catastrof an deor nou kontrol ki sa pou arive Mr Speaker.

Avek desizyon apropriye, pou rezon valab e an balans nesesite ekonomik avek proteksyon lasante nou pep, sa Gouvernman in arive redress pei e remet nou lo en semen progre e prosperite, pandan ki serten ti ankor pe kriy 'sipor' e kriy 'welfare.'

Lekonomi in fini lanse. Aktivite ekonomik in fini repran. Lavi in return normal e nou espere ki avek bann mezir relaksasyon relye avek COVID ki Komite *Platinum* pou pran pli tar ozordi, nou pou lo semen normalite konplet.

Me dan tousala, fodre pa ki nou bliy bann reisi konkret lo nivo Nasional e lo nivo endividylel. Annou regard detrwa legzanp.

Dan bokou domenn kot ti'n annan zis koze, ozordi nou vvar aksyon. Plan i la pou redwir konzesyon trafik par ouver en trwazyenm *lane Pointe Larue* e Providence, kot travay in deza konmanse. Travay pe byen ale lo *round about* Plaisance e agrandisman semen an alan Dan Kan. Sa i ava soulaz trafik ki pe sorti dan rezyon sid pe vin Viktorya e

sorti La Misère kot bokou transpor i bezwen fer en *short cut* dan en semen danzere, ki pas atraver vilaz Les Mamelles pou evit semen La Louise ki bloke tou le bomaten.

3 multi-storey car park pe ganny prozekte pou Viktorya pou rezourd enn fwa pou tou sa kosmar trouv en plas *parking Anvil*.

Parey mon'n dir pli boner, lenfrastriktir pou bann peser dan distrik in gannyen, e pe kontinyen gannyen. Anse Aux Pins proze 2020 lo Ile Soleil in bezwen ganny repran pou revwar. E la les mwan fer en poz pou rapel nou tou ki sa non 2020 ti'n ganny donnen akoz sa proze ti'n sipoze fini an 2020.

La 2an pli tar ni lanmwatye proze pa ankor konplete e Gouvernman in bezwen entervenir pou redonn li lelan. Menm zafer Ile Eve Praslin kot proze ti ganny prozete, epi ti kaye. La, keksoz pe re demare.

Bann later *Industrial Estate Agency* Providence, Perseverance e Ile Eve ankor enn fwa ti dan defayans avek en mank kontrol e larzan lokasyon ki pa ti pe ganny kolekte.

La, ankor enn fwa, sa ladministrasyon in kapab pran kontrol e fer ki larzan lokasyon in konmans ranmase par

milyon, e en plan konkret in ganny met an plas pou, premyerman, anpes later ganny partaze ant zanmi. E dezyenmman, pou asire ki later i ganny devlope pou lendistri, pa pou biznes re lwe pou fer larzan ouswa pou ganny en morso *waterfront* pou plezir personnel, an ba kouvertir en biznes.

Mon kontan war, Mr Speaker, ki sa ladministrasyon in deside fini avek sa dezord dan lenplimantasyon lenfrastriktir lepase kot, e la les mwan dir ankor enn fwa. Prezidan Faure ti promet 24 lakaz dan 24 distrik dan 24 mwan, e pou en rezon ou en lot en bann i gannyen, en bann pa'n gannyen.

Les Mamelles parey zot konnen akoz toultan mon koz lo la, en distrik kot problem i pli grav ki posib akoz dan son sant vilaz nou en *catchment* pou travayer ki travay Viktorya, nou'n ganny 8 lakaz selman. Sa lot 16, personn pa konnen lekel ki'n koken ouswa dan ki landrwa in ganny fer.

Mon ti pe dir ki mon soulaze ki prezan i annan en Lazans Lenfrastriktir ki pou met an men, sa bann devlopman, pou asire ki sa kalite promes kot i zis parol pa ariv ankor.

Deza, mon konnen ki sa Lazans in konmans angaz li dan bann proze ki pe vini pou amelyor nou lenfrastriktir.

Nou'n war Lopital La Digue pe al konmanse, travay in konmanse lo batiman *NIHSS*, 2 Sant Izolasyon ganny fer Persévérance. E la isi menm lo sa zil kot nou ete, byento nou pou war *Government House*, Biro Attorney Zeneral, *Head Quarters Lapolis* pou nonm detrwa, san bliy en *Remand Centre* apropriye pou bann deteni dan en landrwa pa lwen avek bann Lakour.

Me se pa zis lenfrastriktir tousel ki mezir pozitivite en moman dan listwar. Se langazman en ladministrasyon avek sa pep ki i deservi. E lo sa nivo, mon bezwen dir avek limilite e lafyerte, ki zanmen dan nou listwar nou'n war plis langazman en Gouvernman pou byennet son pep ki nou'n war dan sa dernyen 500 zour.

Pou rezon ki zot konnen mon pou zis mansyonn *Air Seychelles* e poz li la. Prezidan in fini koz lo la me mwan senpleman bezwen enform pep Seselwa, ki zis lo sa dosye *Air Seychelles*, akoz mon konn sa tre byen, sa lakantite *meeting* ki Prezidan li menm ek bann Minis konsernen in fer pou pran sa problem an men e

amenn li a en konklizyon, i enkrwayab.

Sa ladministrasyon i pa enn ki asiz anler e les sa ki anba debrouye. I enn ki angaze, ki devoue letan e kouraz pou akonpanny en problem e ed li trouv solisyon. E se sa, e pou sa, mon kapab dir ki mon fyer Mr Speaker ki mon ki mon enn parmi mon 23 koleg lo sa kote latab, ki pe reprezent sa ladministrasyon isi dan sa Lasanble.

Depi premye semenn apre eleksyon 2020, nou ti konpran ki sa Prezidan ki lepep ti'n elekte ek son tim Minis ki i ti'n met ansanm, ti pou perform a la oter. E zot pa'n dezapwent nou. Konmansman par rod vaksen, *roll out* programm vaksinasyon boner, angaz nou pep pou swiv sa program e reouver lekonomi avan 6mwan depi dat eleksyon.

Gouvernman in fer Sesel e lemonn konpran ki *business as usual* pa ti pou lo *agenda*. Sa ti pou'n ganny ranplase par en determinasyon pou revwar fason fer e lans sa programm restriktirasyon, ki ti premye tem dan diskour Prezidan Mardi pase.

E premye gran plan sete sanz direksyon nou pei pou tir li koman en pei kot *welfare* ti'n vin en destinasyon, pou transform li kot responsabilite

sak endivid pou ed son lekor, son fanmir e son pei ti pou vin sa nouvo *Jerusalem*.

Rezulta, Mr Speaker, i la pou nou tou konstate. Reform striktirel dan sistem *welfare* in ganny fer, program lasistans in ganny ranplase e bokou dimoun in retrouv lazwa dan travay e dan fer larzan par zot prop mwayen.

Gouvernman, li, in met an plas en nouvo striktir pou lasistans swa direkteman, swa par les bann lantrepriz piblik pran desizyon pou al dan menm direksyon. Mon bezwen zis sit *RRP* ki *STC* in enplimante konman en legzant sa ki mon pe dir.

Me, lo sa tem pozitiv i annan osi lezot landrwa kot fason fer oparavan i ganny sanze konpletman. Les mwan donn zot 3 legzant. Premye, i konsern nou isi dan sa Lasanble. Konbyen fwa ki nou'n amenn Mosyon zis pou zot mor lanmenm la devan nou lo sa floor Lasanble?

Nou'n kontant nou an dizon, be *motion* pa *binding* lo Gouvernman, alor ki ou a fer? Me non, i pa devret koumsa. Nou en brans Gouvernman ki annan rol reprezantasyon e Mosyon se en par sa rol, kot nou enfiliyans direksyon ouswa Polisi Gouvernman. Well, Mr

Speaker, pou premye fwa dan en bann lannen, nou annan en Gouvernman ki pa sourd lo nou.

Nou annan en Gouvernman ki pa sourd lo son Lasanble parey sa Onorab ki ti asiz sa sez kot mon asize ozordi, ki ti dir nou ki son Gouvernman ti pou fer lo enn nou Mosyon dan dernyen Lasanble. Zot tou zot ava rapel. E nou annan en Gouvernman ki pran sa ki nou vote isi o serye. Resaman, nou'n remark sa dan 2 lenstans.

Premyerman, sa Lasanble in debat, parey Onorab Pillay in fer nou rapel lo *Air Seychelles*, e nou'n met propozisyon devan Gouvernman. La Mr Speaker ek Onorab Pillay les mwan mansyonn sa ki nou'n fer. E Gouvernman in ekout nou e in swiv nou swe ki Lasanble i met devan li.

E dezyenmman Mosyon Onorab Esparon, apiye par *Caucus* bann Madam MNA, lo prodwi sanniter pou bann fiy dan lekol e lenstitisyon laprantisaz dan nou pei, in ganny sezi par Gouvernman imedyatman e deza *rollout* in konmanse. Se sa Mr Speaker, e siny pozitiv ki Prezidan in koz lo la. E pou annan ankor, *mark my words*.

E se pa zis nou ki Gouvernman i ekoute. I annan,

dezyenmman, lezot lenstitisyon dan pei ki'n fer propozisyon ki'n ganny aksepte. *Human Rights Commission*, par egzanp, in fer deklarasyon lo landrwa *remand* akize ki pa ganny *bail*. La nou aprann ki en sant apropriye, lo pli o standar, pou ganny fer byento.

Sa, Mr Speaker, se bann pozitivite ki nou war otour nou. Pa sa ki nou'n tande par sa bann ki pann fer nanryen pandan sa domenn, pandan 15,500 zour ki zot in zouir pouvwar, e prezant pe konplent akoz dan 500 zour zot sa ki zot, zot pa'n kapab fer zot pe blanm nou ki nou pa ankor kapab fer dan zis 500 zour.

Finalman, e trwazyenmman lo sa tem, se langazman Sesel avek lemonn, e plas ki gras a vizit ki Prezidan in fer e son prezans dan bann *forum* ki konsern nou pei, Sesel in arive pran dan bann lenstans enternasyonal. Zanmen dan nou listwar, Sesel in sitan dan labous dimoun lo plan enternasyonal ki ozordi.

E sa se gras a langazman ki sa ladministrasyon in pran, pou retir Sesel dan fen fon Losean Endyen e met li o sant bann konversasyon ki pe pran plas lo nivo mondyal, an sa ki konsern vilnerabilite bann Pti Leta Zil avek sanzman klima,

proteksyon lanvironnman e resours maren. E byento nou pou aprann, prezervasyon resours fon lanmer, ouswa *the deep sea bed*.

Dan lespas 500 zour, nou pei in ariv lo sa bann latab enternasyonal e nou Prezidan pe frot lebra avek bann Dirizan Lemonn. Nou'n sorti kot nou ti ete ler nou ti pe dir ki nou en sanpyon lanvironnman, e ariv lo en staz kot se lezot pei ki pe dir ki nou en sanpyon e rekonnet sa ladministrasyon ek son sef konman en portparol pou bann lezot pei.

Zanmen, Mr Speaker, in pli gou pou nou Sesselwa. Sa se trwazyenm tenm dan mesaz Prezidan lo Leta nou Nasyon. Me, avan ki nou anbark lo en seri legzanp pou siport sa fraz, mon bezwen fer kler ki pa tou dimoun ki war zot lavi gou e pa dan tou keksoz ki zafer i bon.

Prezidan ti pe dekrir en lespri global, pa endividyle. Semen transformasyon i long e pa tou dimoun ki pou ariv lo destinasyon an menm tan. Nou bezwen konpran sa. Pa tou dimoun ki dan lanplwa. I annan ankor tro dimoun ki pe rod en lozman afordab, e tro bokou dimoun ki pe reste dan lakaz ki *overcrowded*.

Pri lavi i pa an konformite avek saler serten dimoun. Parey

mon'n dir pli boner, i annan lespas pou amelyor nou sistenm lasante e nou nivo dan lekol. Sa se detrwa bann defi ki devan sa ladministrasyon. Me fot ki sa ladministrasyon pa pou fer, se servi larzan *welfare* pou rezourd problem endividyle fer dimoun vulnerab vin pli endepandan lo Gouvernman.

Semenn pase, ansanm avek mon *DA*, mon ti vizit sa 4 lekol ki Distrik Plaisance, Roche Caiman e Les Mamelles i partaze. Mon bezwen dir avan tou, ki mon'n byen enpresyonnen par kapasite, lantouzyazm e dedikasyon tou bann *Headteachers* e lezot dimoun ki mon'n rankontre.

Vizit ti enpresyonan e mon napa okenn dout ki sa 4 lekol i dan bon lanmen. Mersi zot tou pou zot devosyon a zot vokasyon e a zot zelev. Mon konnen ki Minister pe fer tou sa ki i kapab pou donn resours sa bann lenstitisyon edikasyonnel, me *still* i annan problem pou rezourd lo nivo striktirel, lekipman e kapasite.

Mon konnen ki lo sa sekter mon kapab koz pou mon de lezot koleg *MNA* pou Plaisance e Roche Caiman ler mon dir ki nou pou kontinyen sa larout ansanm avek nou

bann dirizan nou bann lekol dan nou *catchment area*.

Me mon profite la ki mon annan laparol pou dir, ki i nepli akseptab pou war mank lekipman e mank zouti laprantisaz dan sa bann lekol. Mankman liv e resours travay pa kapab kontinyen.

Photocopier, papye, computer eksetera nepli en lekskiz. Sa bann mankman i bezwen rezourd e rezourd vit pou ki nivo laprantisaz i kontinyen devlope. Mon pou fer bann demann spesifik avek Gouvernman. Me les mwan la, ozordi ki mon annan laparol fer en lapel spesyal pou de keksoz, premyerman:

Pou donn sak lenstitisyon plis lotonomi e sa i ava al aliny avek filozofi zeneral sa Gouvernman, pou ogmant laliberte endividiyel kot fodre e les dimoun pran plis responsabilite ;

Dezyenmman pou revwar *Laptop Scheme* e agrandi sa *Scheme* pou fer ki sak zanfan e sak *teacher* i annan kapasite ganny en zouti elektronik, ki swa *smart phone*, en *laptop* ou lezot. Bann tel zouti Mr Speaker nepli en liks, me en nesesite dan 21enm syek.

Tre byento, nou Lasanble pou bezwen konsider e debat lo de size enportan pou nou

Nasyon. Sa se Fon Pansyon e nouveau prosedir alokasyon lakaz e later pou Seselwa.

Me malgre sa bann defayans ki ankor la apre 15,500zour ladministrasyon oparavan, si nou pa kay lo sa bann problem, e si nou pa tir sa gravye dan nou soulye e zis konplent ki i fermal ler nou marse, e nou regard otour nou onnetman, nou bezwen kapab dir ki nou vreman pe viv dan en pei beni anba en Gouvernman ki nou merite.

Nou Nasyon, Mr Speaker, i lo en bon lapant. 500 zour apre son linogirasyon, nou'n war en Prezidan angaze pou son pep e pou son pei e en Gouvernman antouzyazme, pou travay pou lepanouisman nou pep. Si i annan ankor problem pou rezourd, se sa latas en Gouvernman.

Ler en problem i ganny rezourd, en bon Minis i al rod en lot pou li rezourd, i pa asize e dir "*Mission accomplished.*" Alor, annou pa war problem konman en lobstak pou nou fer kritik. Plito, annou war problem konman levidans ki en Gouvernman pe travay e pe delivre.

Dan sa 500 zour, Mr Speaker, nou pei in akeyir en nouveau Prezidan e en nouveau Lekip Minis, en nouveau Sef Ziz,

en nouveau Speaker, en nouveau *COPOL*, e en nouveau Sef Lafors Defans. Nou'n rode e administre vaksen pou tou nou popilasyon ki oule pran. Nou'n double e nou'n triple.

Dan sa 500 zour, nou'n reouver nou lekonomi e sorti lo *FA4JR* pou retourn lo en lekonomi performan kot touris pe deverse lo nou *Airport*, serten sorti dan bann marse ki nou pa ti ni konnen oparavan. Dan sa 500 zour nou'n redwir pri Dolar sorti R22 pou retourn li R14. Nou'n ogmant reveni par latet touris ki debark Sesel e nou'n ogmant rezerv deviz dan Labank Santral.

Dan sa 500 zour nou'n tir dimoun lo *welfare* e lo *URS* e envit zot pou travay e ganny plis larzan e plis satisfaksyon dan zot travay. Nou'n entrodwir *RRP* lo en lalis komodite kot *STC*. Dan sa 500 zour Nou'n reform plizyer Departman e Lazans, tel parey *DPA*, *Board Planning*, Departman Lenfrastriktir, *APDAR* e lezot ankor.

Por Lapes, lenfrastriktir pou peser, *NIHSS*, Lopital La Digue, tousala in ganny fer ouswa pe al konmanse, avek finansman ki'n fini gannyen.

Dan sa 500 zour Ladministrasyon Distrik in ganny restriktire pou meyer performans. Biro *MNA* in ganny

fer kot bann ladministrasyon distrik pou plis korperasyon. Dan sa 500 zour Maren peser in ganny zot peyman e nou'n redwir det *Air Seychelles* pou sov sa laliny Aeryen.

Dan sa 500 zour nou Prezidan in vizib lo lasenn internasyonal e in ganny rekonnet par bokou dirizan pou son langazman. E isi dan Lasanble, nou'n pas plis ki 50 Lalwa e amannman dan Lalwa.

Tousala, e plis ankor dan mwens ki 500 zour, Mr Speaker be si sa pa fer nou fyer pou nou Seselwa a sa moman, kisia ki pou fer nou kontan?

Mon rezouir ler mon war Prezidan pe rankontre bann o personnaz isi konman deor. Mon rezouir ler mon war en problem ganny rezourd enn fwa pou tou. Mon rezouir ler mon war lazwa dan *diaspora* Seselwa ler zot zwenn avek Prezidan dan son vizit aletranze.

Mon rezouir ler mon war sa kantite Lalwa ki Biro *Attorney Zeneral* i anvoy kot nou Lasanble, pou fer pase. Tousala i fer mwan war ki sa transformasyon nou pei i enn ki pozitiv, e dan sa pozitivite sakenn nou, nou pou prospere dan nou prop fason.

Napa en moman ki pli gou pou et en Seselwa Mr Speaker.

Sa i mon fek mansyonnen i bouton sa, Mr Speaker veye ler fleri.

An konklizyon Mr Speaker Si lager Ikrenn pa tro destabiliz nou lekonomi, mon annan lespwar ki anmezir ki nou anmas plis larzan atraver nou travay dir, avek bon zesyon nou finans par sa lekip Minister Finans, e avek en retour lo en baz pli soutenab lo nivo komers mondyal, Sesel pou kapab rezourd sa bann defi ki ankor reste pou *tackle*, dan en fason ki sa gou viv.

Sa lafyerte pou nou Seselwa a sa moman, pa pou enn zis global, me enn endividyle, kot sak sitwayen Sesel a kapab dir, ansanm avek nou lapriyer bomaten, "Mersi Bondye ki nou Seselwa e ki nou pe viv a sa moman spesifik dan nou listwar dan sa pei, anba sa Gouvernman." Mersi Mr Speaker.

(APPLAUSE)

MR SPEAKER

Mersi Onorab *LGB* pour ou diskour. Nou a pran en poz la, nou a sakrifye 2 minit pou zot letan *break* e nou a repran travay 11er. Mersi.

(BREAK)

MR SPEAKER

Byen mon a donn laparol Onorab Gervais Henrie.

HON GERVAIS HENRIE

Mersi Mr Speaker. Bonzour tou dimoun. Mon larepons lo ladres Prezidan Wavel Ramkalawan lo Leta Lanasyon 2022, pou premyerman regarde kote Sesel i ete koman en pei.

Answit mon pou propoz serten lide pou fer li meyer. E pou fini mon pou koz lo distrik ki mon reprezante isi anndan, e sa se Mont Buxton.

Lafen Fevriye 2022, lemonn antye i ankor dan en leta sirviv - *survival mode*. An gran parti akoz lenpak pandemik *COVID-19* lo sosyete, e lekonomi global depi laparisyon sa viris an Sin an Desanm 2019.

Sesel i form parti sa vilaz global. Prezidan li menm in dir sa deryer 16 mwan depi son laviktwar elektoral, in moman pli difisil nou listwar. "Nou sorti lwen" in dir.

Eski nou rapel parol Minis Finans, Naadir Hassan isi dan Lasanble, ler i ti rakont nou son konversasyon telefonn avek Gouverner Labank Santral, Manmzel Caroline Abel, le 04 Zanye, 2021, ki ti enform li ki ti annan zis R14milyon dan kont Gouvernman.

Zis mazinen, ki dan kont en Gouvernman, sa menm kont ki i fer tou son depans, depi peyman saler, ziska peyman servis e prodwir, ti annan zis R14milyon. Ki kantite nou, ti pou'n kapab tenir sa pei dan sa moman difisil?

A sa moman, mon a profite Mr Speaker, pou felisit tou travayer Labank Santral e tou travayer Minister Finans, ki souvandfwa rezulta zot travay pa en keksoz tanzib parey en semen ki nou vvar in re sifras.

Me nou bezwen rekonnnet travay dir e formidab ki sa bann profesyonnel Seselwa in fer pandan sa letan difisil. Pour nou kapab antreprann en reform ekonomik, e konvenk Fon Monneter Enternasyonal (*IMF*) pou met konfyans dan zot, nou pei e nou dimoun, pou siport sa reform.

Me pli enportan, mon tir mon sa po avek tou Seselwa, ki'n travay konsyansyezman. Ki swa dan sekter piblik ou prive. Ki pa'n les tonbe, ki'n koste zepol e asire ki pei in mars de lavan. Pti lepa, pti lepa. E akoz devouman tou travayer kontrerman avek largiman Dirizan Lopozisyon ki'n esey anpandan avek en lapay. Akoz travay dir tou Seselwa, pei in nabou ranmas \$621milyon koman reveni an deviz etranzer

an 2021 konpare avek 488 milyon an 2020.

Tandi ki nou rezerv dan Labank Santral yer ti 699 milyon Dolar Ameiken. E sa ki nou kapab servi ladan i 527 milyon.

Dirizan Lopozisyon in demande konbyen larzan ki Fon Monneter Enternasyonal e Labank Developman Afriken in kontribye dan nou rezerv. Napa dezoner ladan. I en *loan* ki nou pou rann. Me par lefe ki sa 2 lenstitisyon i pret nou. Ki sa i vedir? I souliny kredibilite Lepep Seselwa, nou Gouvernman e nou pei.

Nou konn servi. E nou servi byen larzan ki nou ganny prete. Me pli enportan, nou pou rann. I en *plus* sa! Fodre nou aret pri dan negativite.

Mr Speaker, irespektiv bann defi ki nou pou napa swa, me pou fer fas avek pandan sa prosen 10 mwan ki devan nou. E sa i enkli *COVID-19* li menm. Sanzman klima, latak lo la demokrasi, kriz imaniter dan diferan kwen lemonn, akt terorizm e konfli antre bann kominote e Nasyon.

Prensipalman lager ant Larisi avek Ikrenn, ki Prezidan e *LGB* in fer referans avek. E ki malerezman pou annan en lenpak lo nou, koman en Nasyon nou annan plis rezon

pour rezouir. Annan loptimisme lespwar pour en meyer demen. Akoz mazorite nou, nou ankor pe flote malgre sa tanpet.

Kote nou ete? 2021 in en lannen ranpli avek pozitivite pour Sesel. Lo lendeks Persepsyon Koripsyon, nou'n sorti 27enm an 2020 pou arriv 23enm, ki osi pli o pozisyon parmi pei Afriken.

Lo lendeks laliberte lapres, nou'n grenp 11 pozisyon, Sorti 63enm pou ganny klase 52enm.

Lo Lendeks Developman Imen, nou klase 67enm. Ki dezyenm pli o lo kontinan Lafrik. Zis en pozisyon par dernyen nou vwazen Moris.

Lo Lendeks *Economic Freedom*, nou 79enm. Tandis ki lo lLdeks Laliberte, nou klasifikasyon an 2021 in sorti 'parsyelman lib' pou vin 'lib'. E sa san dout in akoz premye sanzman Gouvernman attraver bwat vote depi lendepandans an 1976.

Sa bann Lendeks enternasyonal i devret en konpa developman e progre pour nou pei.

Nou merit pran zot a ker pou enflyans bann Polisi ki anmenn vre sanzman dan lavi nou sitwayen. Enflyans bann Lalwa e regilasyon pou anmenn

en sanzman tanzib e mezirab pour nou popilasyon.

Menm ler i annan serten akademik ki pa an faver sa bann Lendeks, akoz zot vwar li koman en konpetisyon antre bann Nasyon, kan zot merit pe travay ansanm e ed kanmarad dan sa vilaz global, mon vwar sa bann klasifikasyon koman en mwayen kour term pou mezir sanzman ki pe arive otour nou toulezour e sak zour.

Lannen 2021, in enn kot Seselwa in demonstre son sans solidarite koman en Nasyon.

COVID-19 Relief Fund ki ti ganny kree pou ed zesyon sa kriz di-si Desanm. Ti'n ranmas R79milyon 188mil 388, 42sou e parmi ti annan *Caucus LDS MNA* ki ti kontribye R100mil.

Mr Speaker, mon pa en manm Komite *Platinum* ouswa Tyermenn *FPAC*. Selman mon'n ganny sa lenformasyon.

In ler pour Dirizan Lopozisyon aret zis konplent e komans zwe son rol - vre rol ki Lartik 84(1) Konstitisyon i donn li.

(APPLAUSE)

HON GERVAIS HENRIE

Mon ava profite la pou remersye Lakrwa Rouz Sesel, *Caritas* e bann lorganizasyon relizye, pour soutyen ki zot in donn

lakominote pandan sa moman difisil.

O kour 2021 Mr Speaker, in osi annan en long lalis bann endividé ki'n demonstre ki Seselwa *is made of*.

Nou lekip Nasional football, in raport tournwa Lakoup *Mahinda Rajapaksa, Sri Lanka* an Novanm lannen pase.

Miss Seychelles 2020, Kelly-Mary Anette ki raport tit *Miss Intercontinental Africa*. E in sorti katriyem dan karant 49enm Konkour Miss *Intercontinental* an Novanm.

In osi annan lakonplisman manmzel Gabriella Gonthier e manmzel Elsia Francoise, dan de lezot Konkour Labote Enternasyonal sa lannen.

In annan sikse zenn stilis, Darren Esther, gannyen *Young Designer of the Year Award* pour lannen 2021, kot lasemann Lanmod *Ghana* an Desanm.

In annan osi bann atlet, menm bann ki avanse dan laz ki'n montre nou ki savedir donnen e partaze.

La mon mazin Mr Paul D'Offay dan son *canoe pe pagay* 44mil notik otour Mahé. E Mr Joel Melanie ki'n tay atraver tou le trwa nou zil prensipal e ranmas plis ki R500mil, pour ed 6 lorganizasyon saritab.

Sa ki pli zenn, manmzel Felicity Passon osi ti batay kont laroul pour plis ki 4 erdtan an Avril lannen pase, e ranmas 41 mil Dolar an ed servis *e-counselling*.

Mon mazin osi bann artis Seselwa ki'n kontinyen prodwir dan sa letan presi dir dey pou egey nou popilasyon. Sirviv restriksyon enpoze akoz bann mezir lasante akoz pandemik COVID-19.

Mansyon spesyal, byensir i al pour organizater, santer e mizisyen ki ti partisip dan premye *telethon* ki'n fer isi. Nou Lasanble osi, pa'n zet ezite *step-up*.

Lannen pase nou'n travay. Nou'n travay dir. Si nou get lo *gazette.sc* nou ava konstate ki an 2021, 65 Prozedlwa ki nou'n diskite e aprouve isi in ganny assent par Prezidan Larepublik. E in napa okenn obzeksyon Zidisyer apropos sa bann Lalwa.

E felisitasyon ankor enn fwa pour mon frer lo mon kote drwat, i pa la malerezman. Onorab Waven William pour son eleksyon koman Vis-Prezidan Komite Developman Soutenab Linyon Enter-Parlmenter, (*IPU*).

In osi annan nou bann zenn etidyan, konmsi manrmay, 'ki'n fer tou byen'. Parmi 1324 etidyan P6 ki'n fer

legzanmen nasyonal lannen pase. Ruben Hall sorti Anse Etoile Primer e Aurelie Bonne lekol Ile Perseverance Primer, zot merit en mansyon spesyal.

Akoz zot in reisi score 531 e 524 pwen respektivman pour sa 6 size zot in fer legzanmen ladan.

Felisitasyon i al pour bann ansyen etidyan S5 Lekol Segonder Ile Perseverance. Lekol Leta kot zanfan in fer pli byen dan legzanmen *IGCSE* avek en total 18 A*s.

Me mansyon spesyal i al pour Anorah Renaud, etidyan lekol Pointe Larue segonder, ki mon konpran i reste dan Distrik Au Cap. Ki'n ganny 7 A*s. E Hillary Lowseck sorti *Independent School* ki'n score 10 A*s.

E pou rezulta *A Level*, Mr Speaker, performans bann garson in remarkab lannen pase, akoz sa group etidyan sorti *Independent School* e Lekol SALS ki'n ganny 4 A*s, zot tou zot bann garson. E sa se Parrik Dang Kow, Shawn Hoareau, Bertrand Morin e Bixente Labaleine.

Letan nou pep i tann dir pran zot responsabilite, travay dir e fer nou lekor, nou fanmir, nou kominate e pei fyer. Se egzakteman sa lapros sa bann endividé mon'n mansyonnen in

pran malgre nou pe viv dan en letan eksepsyonnell nou legzistans koman imen.

Se sa Leta nou Nasyon. Annan gou fer keksoz e fer li byen! E mwan mon krwar tou sa bann Seselwa. Zanfan ziska adilt i bezwen en laplodisman sorti kot nou Lasanble pour lapenn zot pe senm otan pozitivite dan nou pei.

Mr Speaker, ki nou kapab e merit pe fer pou anmenn nou pei pli lwen e fer li meyer?

Enn bann pwen santral kanpanny eleksyon Prezidan Ramkalawan, sete pou remet Sesel lo semen laliberte avek demokrasi.

Ozordi pep Seselwa i konnen ki i kapab koze e ki i pou ganny ekoute. Nou tou nou merit kinn nou drwa koman imen e sitwayen Sesel.

Me sa drwa Mr Speaker i vin avek responsabilite. Et responsab e pa abiz lo drwa ou prosen. E ou prosen a son tour konnen kot son drwa i fini e pour son vwazen i komanse.

Si nou tou nou viv tout an respekte Lalwa, i annan lesparwar ki nou kapab fer Sesel, malgre pti ki nou pti. Vin en pei egzanpler kot travay ansanm pour prosperite e progre i en lanbisyon Nasyonal. Kwa ki mal avek sa?

16 mwan pa tou keksoz ki'n parfe. Mon asire ou a dakor avek mwan! Me defi pou toulstan la. Sa ki enportan i se ki nou trouv nou lafors e resours pou sirmont sa bann defi.

Dan sa moman kritik nou'n sanse, mon repete. Nou sanse pou annan en Gouvernman ki brav. En Gouvernman ki aksepte defi, trouv solisyon e bouz de lavan lo semen progre.

Nou'n vwar li pe pran plizyer desizyon avek kouraz e egzekit zot avek konviksyon. Sa i rezon akoz ozordi 95 poursan nou popilasyon in ganny en premye doz vaksen. 80 in pran dezyenmmen doz e 33 en trwazyenm.

Louvertir nou lafrontyer i fer ki 182mil 849 viziter - 59 poursan plis ki 2020 ti debark Sesel an 2021.

Malgre kritik Lopozisyon, sa desizyon in permet pei kolekte en total \$309milyon. Ouswa \$1693, par viziter ki'n benefisy partikilyerman sak travayer dan Servis piblik atraver en lapey ki sa ladministrasyon in nabou garanti dan sa letan lensertitud.

Konpar sa avek ladmision Minis Finans dan ansyen Gouvernman, ler i ti dir an 2020, ki saler servis piblik ti kapab koupe.

Nou rapel ki dan son diskour Bidze, Minis Finans ti averti Lasanble ki plizyer antite enkli Lotorite Lavyasyon Sivil, SCAA, ti kapab bezwen lasistans Gouvernman pou zot peyman saler.

Me reouvertir *Airport* ki'n permet 412 jet prive apoz isi ant Zanvye e Desanm 2021. E 12 vol komersyal re anmenn touris isi, in anpes sa arive.

Akoz bann desizyon brav, sa ladministrasyon in osi reisi sov *Air Seychelles*, en det 100 milyon Dolar.

Pourtan lopozisyon ti'n fer per bann travayer *Air Seychelles* e dir zot ki di-si le 22 Mars, mon pa pou konnen ki sa dat i sinifi, zot pa pou konnen ki mannyer zot pou nouri zot fanmir.

Dan sa 16 mwan in annan konstriksyon 2 lopital kot fasilité Gard Lakot Sesel avek en kapasite pros 100 lili. La Digue osi nou'n atann pou benefisy byento.

Bazar pe ganny konstri partou kote depi Glacis ziska Anse Aux Pins anpasan par Cascade. Si ou pas *highway* ou pa pou war.

Sa Gouvernman pa pe perdi sanfrwa dan lager kont koripsyon. E son kouraz pou atak sa problem a fas, pe non selman ganny rekonné par

bann partner enportan, tel ki Linyon Eropeen e Gouvernman Britanik.

Me pe osi resevwar serten led pou mye delivre dan sa latas nob. To ou tar, nou pou ganny en finalite lo bann kes frod, koripsyon e labi pouvwar dan bann antite parey 2020 *Development*, Lazans Proteksyon Sosyal, SBFA, san oubliy sa fame kes \$50milyon.

Tousala Mr Speaker, i bann ka ki sa ladministrasyon in erite, akoz ansyen Gouvernman pa'n annan kouraz pran en desizyon.

Nou kapab mazinen pou dir si zot ki ankor o pouvwar, nou ti pou ankor pe ganny anpaye avek FA4JR e URS osi.

Bann desizyon brav ki'n anmenn lezot rezulta pozitiv, i enkli konpansasyon pour plis ki 120 maren peser Seselwa. Ki'n travay lo bato lapes Linyon Eropeen e ki'n bezwen lager pour plizyer lannen san en rezulta satisfezan.

Dezord dan zesyon later lo bann *zone* endistriyel in osi bezwen ganny adrese avek kouraz e disiplin. Rezulta dan zis 8 mwan. 8 mwan in anmenn R22milyon dan kof Leta. Ki konpri 11 milyon pour koleksyon 2021 e sa lot 11 milyon ti pou bann aryeraz.

Sa disiplin fiskal pe osi ganny aplike dan bann lantrepriz piblik ki dezormen pa pou kapab kontinyen ganny zere parey bann pti lanpir. Zot pou oblize swiv bann regilasyon anba Lalwa PEMC e travay pou pey zot *dividend* avek Gouvernman parey zot dwatet.

Sa pou mars kot-a-kot avek programm *Result Based Management* ki pe al ganny enplimante an antye dan sekter piblik.

Sa pou anmenn plis efikasite, latransparans, rann kont e bon gouvernans dan sa sekter.

I kler, ki servis piblik i demann bokou amelyorasyon menm ler, mon rekonnet travay dir e konpetans plizyer *public servant*.

Me lespas pour amelyorasyon i touzour annan. Servis piblik ioblize etablir bann prosedir kler e transparan ki fasil pou son kliyan swiv. Par egzanp, bann MDAs i oblize donn larepons en kliyan dan en dele letan akzeptab e evite fer dimoun vir an ron.

Zot bezwen annan bann mwayen komunikasyon modern tel ki, en sit *web* e en limero telefonn ki kliyan i kapab komunik fasilman avek zot.

Zot oblize annan en mekanizm entern ki permet

travayer eksprim son lekor libreman, e rod rekour pour kek difikilte i pe fer fas avek. Koumsa zot pa ava ankoler, perdi pasyans e desann lo semen parey Dirizan Lopozisyon i dezespere pou vwar arive.

Pareyman en manm piblik ki oule felisit ou fer en konplet vizavi en travayer i dwatet annan en opsyon komunikasyon.

Finalman, dan en Sesel modern in ler pou sak Minister pibliy en rapor anyel, pour ki *tax payers* a kapab mezir nivo efikasite zot travay apre sak lannen finansyel. Sa metod travay i egziste dan nou zil vwazen Moris.

Mr Speaker, mon rekonnet ki lavi i difisil pour bokou dimoun. Keksoz i ser dan laboutik. Me an menm tan ki Sesel i form parti sa vilaz global, nou reste lo en zil dan milye losean, retire avek larestan lemonn.

Avek lefe ki nou enport laplipar keksoz ki nou konsonmen, sirtou karbiran ek manze, sa pou fer ki Sesel i reste vilnerab avek tou sok eksteryer.

Mon oule reasir popilasyon ki ladministrasyon Prezidan Ramkalawan, i angaze pou pran bann mezir pou ede

fer fas avek sa kout lavi ki pe kontinyelman ogmante.

Son mwayer prensipal se pou reviz pratik biznes STC, redwir son kou loperasyon e par konsekans enfliyans pri komodite debaz lo marse lokal.

Letan nouvo *Board* STC ti ganny apwente 12 mwan pase, STC ti pe anrezistre en pert R5 milyon par mwan. I ti'n prevwar ki sa lakonpannyen ti pou perdi R66milyon an 2021.

Nouvo *Board* in akseler transformasyon sa lakonpannyen. E STC pa eksepte fer okenn pert lannen pase letan son rapor finansyel pou sorti pli tar sa lannen.

Restriktirasyon e rediksyon dan son kou loperasyon. In desann signifikaman par apepre R3 milyon par mwan.

Pour lenformasyon Dirizan Lopozisyon, atraver ou Mr Speaker, Gouvernman in garde son promes lo STC. Se li mon krwar ki pa'n koz laverite lo sa antite bomaten. E mon *challenge* lo koman Chairman FPAC. Ler rapor STC i sorti, kriy zot demann bann kestyion neseser.

Me sa lakonpannyen pou kontinyen fer fas avek plizyer defi pour en pe letan devan nou. Sa i akoz bann vye lenfrastriktir parey langar, *cold storage*, zot

sistem transportasyon e sistem informatik, ki napa novo lenvestisman ladan ki'n ganny fer pour tro lontan.

E koman ansyen Chairman COGA, mon konn sa problem tre byen. Akoz sa komite ti zwenn e koz ek STC lo sa size.

Me bann lemorazi finansyel in ganny adrese. Tel ki bann kou lokasyon egzorbitan ki sa lakonpannyen ti pe pey avek parti *United Seychelles*.

Prezidan in onnet avek nou, ler in dir ki akoz kou transportasyon, karbiran avek pri komodite lo marse mondyal in ogmante. Alor sa pe enpakte negativman lo kou lavi Sesel.

Sa ki nou kapab e merit pe adrese se sa 4enm faktor i ti mansyonnen, marsan malonnet.

Ozordi, poursantaz profi ki bokou marsan pe mete lo komodite i egzazeran. LDS letan i ti dan Lopozisyon in koz lo propozisyon pou pa met pri kontrol, mon repeate, pa met pri kontrol. Me pou regard *profit margin* diferan kategori prodwi; tel ki manze, latizann, bann prodwir elektronik, lenz, prodwir lizyenn eksetera.

A mon avi en letid i merit ganny fer pou konsider nivo profi ki en marsan i kapab met

lo en *item*, depandan ki kategori prodwi i tonm ladan.

Par egzanp, ki poursantaz profi eski en marsan i devret pe mete lo en prodwi manze? Sa i bann kestyon ki merit pe ganny diskite libreman parmi bann konsonmater ozordi.

Mr Speaker, i reste mon swe pou pa enpoz okenn plan personnel lo distrik Mont Buxton. Mon ankor anvi bann zabitan i zwenn mwan lanmwatye semen. Pour ki koumsa nou a kapab tras larout kot nou anvi ale ansanm e transform sa pti distrik dan milye Mahé.

Zabitan fodre i angaze. Apre tou mon lofis e Ladministrasyon Distrik i la pe travay lo zot par. E proze ki ganny propoze i zot kontribisyon personnel, atraver tax ki kolekte par Gouvernman. Alor ou annan en par dan zeson ou distrik e pei osi.

Mon konn tre byen ki laspirasyon laplipar zabitan, se pou vwar rekonstriksyon lekol La Rosiere, re sirfas semen prensipal. E konstriksyon 2 proze lakaz, enn Mont Signal e lot Lari Hangard.

Laverite konsernan sa bann proze i se ki sityasyon ekonomik pei pa pe permet zot ganny realize sa lannen.

Me nou pa perdi sanfrwa. Apre ki nou'n esper sitan lontan, mon persyade ki sa ladministrasyon i konn zot laspirasyon.

Mon profit sa lokasyon pou remersye tou dimoun ki'n travay pros avek mwan pandan 2021. Pou anmenn en soutyen pour bann zabitan Mont Buxton.

Sa i enkli mon *Constituency Clerk*, Manmzel Antoinette Valentin. Manmzel Hannah Quatre e Jena Dubignon ki ti *acting DA* lannen pase. E novo Administrater Distrik Manmzel Langia Boniface. E swet li la byenveni dan nou distrik e bonn sans dan sa latas ki devan li.

Lannen pase, avek en sonm R200mil ki distrik ti gannyen atraver Minister Gouvernman Lokal e Devlopman Kominoter, nou'n agrandi *playground* Mont Signal pou en sonm R23 mil.

E konstri en novo sante dan sant Mont Buxton pour en sonm R169mil.

Pour lannen 2022, avek en sonm R740mil pour proze distrik, 5 proze in ganny idantife e sa pou Dan Lenn, Greenwich, Mont Buxton Santral e Belonie.

Sa bann proze pou prensipalman bann sante e lagrandisman semen.

I enportan ki zabitan i konpran prosedir pou swazir bann proze. Alor se sa rezon mon envit zot pou met zot konsern e sizesyon devan avek Lofis DA ouswa MNA.

Mon zour vwar piblik i tou le Vandredi. E ou kapab kontakte mon lofis lo limero telefonn 2632119, sa i 2632119.

Mr Speaker, kan e kot Gouvernman pa'n kapab anmenn lasistans osi vitman pour nou distrik, nou pa'n bes lebra.

Kan dezas in frape ouswa distrik in bezwen en koudmen. Bann volonter sirtou group Brigard Dirzans in touzour rann lapel. Mon dir zot mersi bokou.

Nou'n al osi lwen pou kree en lasosyasyon kominoter, apele *Mont Buxton Community Association*. Avek bi mobiliz fon pou fer plizer proze distrik.

Zis lannen pase lasosyasyon in reisi anmas R225mil. Ki'n servi pou finans konstriksyon en *bus shelter* kot bis vire Roche Bois, a en sonm R75mil. Ti nou lentansyon konstri en dezyenm *bus shelter* dan Mont Buxton santral.

Me nou pa ankor ganny permisyon propriyeter sa later. Nou'n osi met bann lansenny ki demark komansman nou Distrik Greenwich, Ma Joie e Lari Buton.

An se moman, lasosyasyon pe debrouye pou lev R100mil. Pou met non tou semen, non tou vilaz e tou *housing estate* Mont Buxton disi le premye Desanm 2022.

Kot nou kapab donn en sipor, pa ezite. Akoz sa i apel nou distrik. Mon osi felisit bann endividé avek fanmir ki pe viv dan nou kominote. E kapab pas koman en legzanp pour lezot.

Annefe, sa dernyen lannen in enn kot Mont Buxton in annan rezon pou rezouir sikse son bann zanfan.

Mr Jude Fred in pibliy son liv avek tit, '*Journey to Inspire Transformation*'. E plizyer endividé ki'n pas parti zot lavi dan nou distrik in ganny bann O lapwentman dan Gouvernman.

Enkli Brigadye Michael Rosette. Depite Komisyoner Lapolis, Ron Bonnelame. CEO SIB, Anne Rosette. E CEO STC, Siana Bistoquet. Lo lapar distrik mon felisit zot dan zot lapwentman e swet zot tou de bon.

De lot kote, nou distrik i kontinyen annan son bann defi. Bann problem sosyal parey zanfan ki mank supervizyon paran, problem delenkan, konfli lafanmir, bann dimoun aze ki ganny neglize e menm abize, mank lozman e difikilte lavi pou fer de bout zwenn, menm ler bann dimoun pe travay i bann defi mazer.

Mon lapriyer i se ki nou kontinyen donn sipor kanmarad, ki anfen lavi nou tou i ava amelyore to ou tar.

Pou konklir Msye Speaker, mon donn mon langazman pou kontinyen travay pour tou dimoun. E ede kot mon kapab pou amelyor lavi zabitan dan distrik e tou mon frer e ser Seselwa.

Prezidan in dir nou ki Sesel pe pas atraver en transformasyon. Ki fodre nou sezi e konpran i pe arive. E ki fason i enpakte lo nou lavi toulezour.

Sa i laverite! Me telman in pri dan son prop negativite. Dirizan Lopozisyon i apel sa en desepsyon. Selman in bliye dir nou 'sirondann'!

Nou ganny dir ki dezormen koman en pei nou pou bezwen fer pli bon planifikasyon. Konn sak sou ki ganny depanse e asire ki i ganny byen depanse.

Ki nou bezwen viv vre linite parmi nou pep. Nou bezwen anbras la demokrasi. Nou bezwen donn en koudmen dan lalit kont koripsyon e labi sibstans.

Respe Lalwa pei e drwa lezot. Planifye byen nou lavenir. Denons kriminalite. Promouvwar en kiltir travay dir. Protez lanvironnman nou pei, son zanfan ki pe grandi, son bann kous popilasyon pli vilnerab e respe nou bann aze pour en meyer demen.

Ler nou kontribye konsyansyezman dan devlopman nou kominate, nou pou ranport benefis personnel. Me pli enportan atraver lakseptasyon sa lenvitasyon pou anmenn nou pei dan menm direksyon, nou ava asir nou lepanouisman koman en Nasyon.

Se atraver lafyerte Seselwa, retrouve dan rekonesans ki Sesel i pour tou son zanfan, ki nou pou fer Sesel fyier koman en Nasyon. Pwen!

Mr Speaker, mersi pour tou dimoun ekout mwan.

(APPLAUSE)

MR SPEAKER

Mersi Onorab Henrie. Mon ava pas laparol Onorab John Hoareau.

HON JOHN HOAREAU

Mersi Mr Speaker. Bonzour Mr Speaker. Bonzour tou dimoun a lekout. Bonzour tou Manm Onorab.

Mr Speaker ladres Leta nou Nasyon par Prezidan larepublik sa lannen, i en lokazyon ase spesyal. Anvi ki i fer en pe plis ki enn an depi sa gran viktwar LDS le 24 Oktob 2020.

E osi fer en pti pe plis ki enn an depi ki premye Prezidan elekte dan zistwar Sesel, in pran labar.

I premye loportinite kot bann Manm Lasamble, i ganny sans pou reponn diskour Prezidan baze lo son travay apre 16mwan dan lofis. En travay ki'n ganny karakterize par en transformasyon fondamantal dan lafason ki pei i ganny dirize.

Mon le o komansman, remersi Bondye pou son lagras. Ki'n fer ki sa tranzisyon pouvwar le 26 Oktob in deroul annord e dan lape.

Sesel in menm ganny rekonnet dan larezyon konman legzanp en pei ki annan en matirite politik e la demokrasi i vivan.

Dan sa legzersis Soufraz Iniversel le 23 ek le 24 Oktob 2020, pep Seselwa ti osi donn

en manda kler *LDS* pou dirize. Akoz zot annan konfyans ki *LDS* i meyer tim pou konbat koripsyon, pou lev lekonomi, pou ogmant la kalite lavi e anmenn pei ver plis prosperite.

Seselwa in rezet politik 'ek nou pa ek nou'. E en Gouvernman nepotizm e en parti ki'n ekspire politikman.

Mesaz dan nou dan manifesto, anba tem 'Sesel pou tou son zanfan', ti rezonnen dan tou kwen nou teritwar e deswit en Gouvernman enklisiv ti konmans son travay.

Mr Speaker, diskour Leta nou Nasyon i prezant nou sa loportinite pour nou analize e konpran ki kalite travay ki nou Dirizan in anbark lo la. E ki direksyon nou pei pe ale.

Prezidan Ramkalawan in konmans en travay transformasyon ver en Sesel ki normal. In konmans par, retir bann bout kales kase. E ranplas li avek en masin performan e modern ki reflekte letan ki nou pe viv ladan.

Parmi bokou lakonplisman dan son premye lannen travay, in pran en desizyon brav pou reouver pei akoz lekonomi ti pe al fait. E saler travayer pa ti pou garanti si deviz pa ti pe kontinyen pa rantre.

Ozordi sa desizyon ki'n pran, in permet plis ki 5mil viziter par semenn an mwayenn pou rantre dan nou zoli pei e vin pas zot vakans. Sa in ranforsi nou lekonomi e permet Dolar sorti R24 ler pei ti'n fermen pou desan ziska R15.

In osi permet nou rezerv nasyonal grosi, pou ariv \$702 milyon, en sif ki pli o, ki zanmen in arive avan.

Me malgre sa tou sa bann zefor ki Gouvernman in fer, e bann rezulta pozitiv ki nou'n akonpli, bokou faktor internasyonal ki an deor nou kontrol ; tel konman logmantasyon konsiderableman lo pri konntener lo transportasyon. enkli pri karbiran i reste en defi mazer ki fer pri lavi reste o.

E la nou'n atann lenvazyon *Ukraine* par Larisi. Menm si nou lwen parey in ganny dir. Nou pou kapab santi son lefe. Mon konvenki ki Gouvernman pou eksplor bann fason inovativ e enspirasyonel pou anmenn en solisyon pou redwir pri lavi. Tel konman posibilite pou en logmantasyon saler anliny avek to lenflasyon.

Posibilite pou annan nou prop bato kargo, posibilite *bulk buying*. Met an mars bann *MOUs* ki Sesel in deza sinyen

avek bann pei ki prodwi bokou manze, ensidswit.

Bokou sa bann solisyon in deza ganny diskite dan bann deba dan sizyem Lasanble, ler Onorab Henrie ti anmenn en Mosyon lo rol STC ek pri lavi.

Mr Speaker, sa transformasyon ki'n konmanse, in pran kont bann defi ekonomik, politik e sosyal. Pou fer sir ki personn pa ganny kit deryer akoz son vulnerabilite, son kouler lapo, son larelizyon, son afilyasyon politik ou seksyel.

Sa lapros i enn ki'n anmenn en latmosfer stabilite e koezyon sosyal dan pei. Malerezman nou bezwen kit nou lizye byen ouver a tou pri. Akoz lopozisyon pe sey travay san ses pou detri sa ki fer nou konman en pep viv dan larmoni.

Zot in sey diferan taktik, tel ki konferans de pres. Kot piblik in ridikiliz zot e fer zot plonz pli fon dan en konvalesans e detres.

Zot in sey fer detrwa droger vin *kick o bor Lorloz* angiz en demonstrasyon. E sa pa'n marse. Rezulta, zis dimoun in riy zot. E zot in perdi tou kredibilite.

Zot in esey ekri bann lorganizasyon enternasyonal pou konplent. Me zanmen zot in

pibliy larepons ki zot in gannyen akoz zis zot in kanmi.

Zot in esey fer krwar ki zot kont koripsyon, me an menm tan zot pe lager lebra kase kont tretman bann akize dan zot kan, ki'n ganny anmennen devan Lakour.

Zot lipokrizi pann permet zot annan remors pou bann ki'n soufer anba kondisyon deteni pli fermal sans zizman dan letan parti inik.

Ennler ou ava krwar ki zot volan in bloke e zot pe dray zis dan en direksyon ver presipis.

Mr Speaker, notaman letid sosyal prezante par Biro Statistik avan eleksyon. In montre ki o mwen 40poursan nou pep ti pe viv dan lapovrete. E ti pe depan bokou lo benefis *welfare*.

En sityasyon ki sa ladministrasyon in erite. Souvandfwa drog ek lalkol, e fanmir disfonksyonnel ti lakoz nou malez.

Nouvo Gouvernman in konmans en travay transformasyon sosyal, kot in angaz dan en lalit asarnen kont trafiker drog. E konmans en restriktirasyon ki pou retir nou pei konman en *welfare state*.

Nou lapros se pou adopte en prensip kot zis sa ki pli vilnerab dan sosyete, ki ganny soutenir. E lasistans pa reste

permanan. Lazans sosyal pe plito met an mars bann program lervansyon ki pour ede ed bann endividé sorti dan latrap lapovrete.

Parey sa fame dikton i dir 'ler ou donn en dimoun en pwason ou pe nouri li pou en zour, me ler ou montre li koman pou lapes, ou permet li ganny son nouritir toulezour'.

Kreasyon lanplwa permanan in permet tou dimoun ki ti pe rod lanplwa antre dan travay. Menm bann zenn ki ti'n perdi lo semen URS. Ozordi, zot dan lanplwa e pe ganny en pli o saler an menm tan zot pe kontribye ver zot pansyon e *tax*. I menm annan zot, ki'n vin proprieter zot prop biznes.

La mon le profite pou demann Gouvernman ek Sekter Prive. Pou fer en zefor spesyal pou enplimat prensip *ILO* non-diskriminatwar dan lanplwa. Kot *equal pay for equal job* i ganny ankouraz a tou pri. Lo sa size, i kler ki i annan bokou dezapwentman. E i reste en fakter ki anpes bokou travayer reste lontan dan en *job*.

Mr Speaker, sa lepanouisman e sans responsabilite pe ganny resanti partou dan tou kwen nou bann distrik. Nou pep in konmans pran konsyans zot devwar e

realize ki nou bezwen aret fye lo Gouvernman pou tou keksosz.

Sa ki kapab travay i bezwen bouze pou li rod son dipen kotidyen. Sa ki kapab *afford* son *carer*, i devret peye. Tandi ki sa ki pa kapab i bezwen ganny ede.

Sa prensip i permet Gouvernman servi son resours ki deza tre limite dan en fason pli efektif e targete.

Mr Speaker, sa novo fason panse in parsyelman ganny enfliyans-e par lervansyon *IMF*. Bokou fwa nou pa realize ki bann pre, ki bann baryer de fon parey *IMF* i fer.

I mars avek bokou kondisyon lo limit larzan ki ou kapab depanse menm lo ou program byennet sosyal.

Mr Speaker, dezyenm transformasyon enportan ki'n konmanse pandan lannen pase, se transformasyon dan tou bann sekter kle lekonomi pei.

Nou lekonomi in retourne vibrans e laprev se la kantite lenvestisman enternasyonal ki nou klasifye konman *Foreign Direct Investments* pe rante.

Nou stabilite politik e bann Lalwa ki nou'n passe. In ede pou retir Sesel lo lalis nwar Linyon Eropeen e Sekter *Offshore* pe diversifye son

prodwi pou ogmant servis profesyonnel. Tel ki Avoka, *accountants* e *investment consultancy*.

Linisyativ pou revitaliz bann lendistri tradisyonnal tel ki kannel, lavannir e lapes. Pe fer bokou Seselwa pran konsyans ki deviz i alatrenn dan nou lafore e dan nou lanmer.

Lagrikiltir in pran en nouvo lelan kot bann fermye pe ganny akse avek pli finans atraver *DBS* pou ogmant prodksyon. Me i ankor annan bokou retar ki pa akseptab dan alokasyon later pou fermye. Mon ekspekte ki Gouvernman i travay pli serye pou elimin birokrasi ki kontinyen egziste lo sa size.

Lo kote lendistri valer azoute pou pwason, mon fyier ki plizyer kare later in ganny donnen avek bann envestiser pou fer lizin transformasyon.

Zefor pou fer elevaz pwason i osi prometan. Sa pou permet nou retir maksimonm lo nou resours maren ki dan lepase inn ganny neglize. E pou refer nou baz ekonomik pou asir partisipasyon e loportinite pou tou Seselwa.

Malgre tou sa lakonplisman, nou servis piblik i reste en gran sours dezapwentman pou bokou

dimoun. Dan son ladres Bidze lannen pase. Minis Finans ti anonse ki sa lannen pou annan lentrodiksyon *result-based management* dan tou Sekter Gouvernman ki pou rann servis piblik pli efektiv. E ranforsi la transparans e rann kont.

Avek lenpak *COVID-19*, bokou bann lofis in viz zot zefor ver teknolozi nimerik pou fasilit dokimantasyon e laplikasyon pou en servis. Sa i san dout lye avek plan modernizasyon nou lekonomi. Kot akse avek bann servis i vin a laporte kliyan nenport landrwa kot ou ete atraver *internet*.

Bokou konplent dan servis piblik i vize ver lofis ki pa pe reponn bann konsern dimoun atraver telefonn ek *emails*. Sa pe met bokou retar dan travay e kre fristrasyon parmi piblik. Parfwa serten dimoun ki met sa bann retar i fer li par ekspre pou sey sabotaz sa transformasyon ki'n konmanse.

Mon garanti pep Seselwa ki avek *result-based management* nou pou kapab annan ase laprev pou retir bann sabotter e parazit dan nou Gouvernman.

Ler zot ganny zot let remersiman silvouple pa dir politik.

Mr Speaker, lot transformasyon enportan ki Gouvernman in kommanse. Se lafason bann lenfrastriktir piblik pou ganny zere e mentenir.

Mr Speaker, devlopman en pei i kapab ganny ziz-e par rapport avek leta son lenfrastriktir. Ki a dispozisyon son pep. Sa ki frap en viziter ler i debarke lo *Airport* e donn li en premye lenpresyon lo sa landrwa, se leta son semen.

Ler i antre dan lavil i osi get osi bann *building*. E answit ler i antre dan bann vilaz i get leta bann lakaz e bann semen dan lakanpanny.

Nou menm koman en zabitant sa zoli pei ranpli avek laverdir ek bann lans byen blan. Nou'n vwar ki lot kote sa zoli portre, i annan en dekadans total lo mentenans bann lenfrastriktir sportif partou dan bann distrik. Serten klinik, Stasyon Lapolis menm nou Lopital nasyonal. E bokou lezot batiman Gouvernman.

I gou pou konstri batiman nef e fer gran louvertir avek tou splander. Me batiman i avarye avek letan si napa bon mentenans.

Souvandfwa in annan en mank kordinasyon ant bann Minister. E bokou difikilte pou idantifye lekel ki pran

responsabilite pou lekel lenfrastriktir.

Dezormen, sa transformasyon in adres sa size. E en novo lazans in ganny kree pou fer sir ki bann lenfrastriktir i ganny konstri e mentenir a en o nivo.

Prenon kont ki kontrent bidzeter i reste fakter enportan ki pou determin sikse sa lazans. Mon reste konvenki ki en program nasyonal pou zer konstriksyon e mentenans lenfrastriktir Gouvernman, i meyer solisyon.

Provizyon lakaz sirtou *social housing*, i reste en defi mazer dan tou distrik. An vi ki napa bokou larzan ki'n ganny bidzete pou fer lakaz, i reste en konsern pou mwan osi. Me mon osi krwar ki i annan lespas pou sekter prive kontribye son bout.

Pou fer en vre diferans dan provizyon lakaz an fas avek demann ki pe kontinyelman ogmante, Gouvernman i bezwen travay pli dir pou eksplor posibilité *public private partnership*. E osi *incentives* ki pou atrakte sekter prive pou lans dan sa demars.

Mr Speaker, mon osi krwar ki en program desantralizasyon servis piblik, i en fakter enportan pou rann serten distrik mwen peple pou

atir bann dimoun pou swazir sa distrik pou konstri zot lakaz.

Mr Speaker, en lot transformasyon byen enportan ki nou devret donn tou nou sipor - nou sipor total, se transformasyon ki pe arive kot *Air Seychelles*.

Zis pandan enn an, Gouvernman in kapab redwir det *Air Seychelles* atraver ladministrasyon sa lakonpannyen par R1.5 bilyon. Sa i en lakonplisman mazer ki nou devret fyer.

A en serten pwen, la fason ki keksoz ti pe deroule avek det ki ti pe grosi anba Gouvernman avan, nou ti kapab perdi nou laliny aeryen. Perdi tou biznes *ground handling*. E possibleman zerans nou *Airport*.

Sa ti pou en gro kou pou nou souvrennte. Me i pa'n arive akoz nou Gouvernman i proaktiv, e in eksplor tou posibilite atraver en deba nasyonal lo sa size.

In ekoute e swazir meyer solisyon. Sa se en legzanp siperb partisipasyon demokrasi aktiv. Parey Prezidan in fer resorti, 'Nou bezwen marse ansanm e sant dan menm liv kantik.'

Mr Speaker, sa lannen nou pou war 3 proze devlopman mazer ki pou konmanse, e ki pou amelyor lenfrastruktir pei.

Sa se devlopman por, *Airport* ek *multi-storey car park*.

Par rapor avek nou lekonomi ki pe agrandi. Nou Por ek nou *Airport* i reste 2 landrwa stratezik ki bezwen ot son nivo pou fer fas avek konpetisyon rezyonal.

Le moman in arive alor pou fer amelyorasyon avek sa 2 lenfrastruktir enportan. Avek bon planifikasyon, sa devlopman pou kre plis lanplwa pou nou pep sirtou lo nou Por komersyal.

Avek lentrodiksyon facilite modern pou desarz konntener, i pou permet transportasyon marsandiz dan pli kourt dele letan, anvi ki nou pa pou bezwen depan selman lo bato ki annan *crane* lo la pou anmenn marsandiz pour nou.

Fasilite pour bann bato touris pou permet pli bon lakey. E pou osi permet nou pou deservi pli bokou bato an menm tan. Menm keksoz pou arive lo *Airport* avek plis vol aeryen.

Sa devlopman pou permet nou zwenn nou bezwen komersyal pou bokou lannen a lavenir.

Mr Speaker, size konzesyon trafik e *parking* dan Lavil Victoria, i enn ki nou Gouvernman in pran kont seryezman. Apre plizyer deba lo sa size, Gouvernman in vin

avek en solisyon pratik e enn ki ekolozikman bon.

Konstriksyon *multi-storey car park* en pti pe an deor sant Lavil pou permet dimoun depoz zot loto e pran en *shuttle service* pou zot rante dan lavil. Son lefe pou deswit anmenn rediksyon veikil. Amelyor lo sirkilasyon trafik. Enkli fer nou respir en ler en pe pli byen dan Lavil.

Mr Speaker, avan mon konklir, mon pou koz en pti pe lo mon distrik. A sak fwa mon ganny lokazyon mon fer resorti ki Beau Vallon i en landrwa eksepsyonnelman enportan pou lekonomi pei.

An vi ki Beau Vallon i en distrik ki annan plis lasanm lospitalite pou ofer touris lo nivo nasyonal. Mon touzour dir ki nou bezwen pran byen swen avek sa poul ki ponn dizef lor.

Ler nou get leta sa *ex-Regatta site*, ki tre pre ek mon leker anvi ki mon'n lalit pou Gouvernman avan, aste sa propriete.

I fer mwan bokou sagren akoz sa landrwa pe vitman vin en landrwa ki napa lord e dimoun pe fer sa ki zot anvi.

Tapaz lanmizik, vol e lezot aktivite ilegal pe fer son retour sirtou dan *weekend* avek larive bokou veikil. Salte koze par aktivite vann koko, i reste en

gro defi malgre bokou zefor pe ganny fer avek LWMA pou sey adres sa problem.

Swe zabitan Beau Vallon se ki Gouvernman i get dan posibilite pou annan en striktir zerans pli efektif, pou war devlopman sa landrwa dan en fason entegral. Tout an prenon kont laspirasyon zabitan sa distrik.

Mr Speaker, Prezidan in etal en levantay aktivite ki'n arive pandan sa lannen. E donn en direksyon kler ki bor nou pe ale.

San limite e san partisipasyon tou dimoun nou pa pou ariv lo nou destinasyon. En gran aktivis drwa sivil Ameriken Martin Luther King JR, ti dir '*we must learn to live together as brothers or perish as fools*'.

Nou Prezidan in dir nou, ki nou bezwen sant dan menm liv kantik. Mwan mon pe dir en lasenn i vin for ler tou son mayon I atrap kanmarad. Mersi.

(APPLAUSE)

MR SPEAKER

Mersi Onorab Hoareau. Mon ava pas laparol Onorab Audrey Vidot.

HON AUDREY VIDOT

Mr Speaker, tou Manm Onorab, zabitant Roche Caiman e tou dimoun ki a lekout, bonzour. Mr Speaker, mersi pour donn mwan laparol.

Mr Speaker, dan son diskour lo Leta Lanasyon, Prezidan Larepublik pa ni menm enterese pour vin avek bann propozisyon ek solisyon konkret, ki ti ava dan lentre nou pep pou amelyor nou sityasyon lavi.

Sa diskour i klerman montre inefikasite Gouvernman *LDS* pour tenir standar e soustenabilite devlopman imen e lenfrastruktir nou Pti Leta Zil, menm si nou ankor pe fer fas ek bokou problem parey nenport ki pei. Sa ki kler, se ki i pa enterese avek laklas travayer dan nou pei.

Mr Speaker, sa diskour Mardi pase i enn ki ranpli avek lipokrizi e bokou bat latet parey labitid. E ozordi nou pa vwar li drol pour Dirizan Zafer Gouvernman e son lekip atraver ou Mr Speaker, pou rod toudsord leskiz 16mwan pour defann inefikasite zot Gouvernman.

Mr Speaker, pep Seselwa pe ganny demande pou koste ansanm pour konstri en Nasyon ini. Me *LDS* i blyie ki zot in pas zot letan senm laenn ek

ran ki'n pandan tou dilon zot legzistans.

Letan *US* ti demande pour koste, *LDS* ti ankouraz dimoun pou pil lo li. La, la son konsekans, rankin ek vanzans pe eparnye nou sosyete ozordi. E mon oule met lo rikord se pa nou *US* ki ti sante e montre Seselwa ki mannyer pour pile.

Mr Speaker, Seselwa i en Nasyon entelizan e Seselwa pa blyie ki avan Oktob 2020 leta nou nasyon ti enn ki for. Sa ti an rezulta travay dir ki nou'n fer ansanm koman en pep dan vre limite, dan lape e dan stabilité.

Ladministrasyon Gouvernman *United Seychelles*, in kit deryer en rikord formidab ki ozordi e pour plizyer lannen a lavenir Seselwa i ankor pe zouir bann travay ki ladministrasyon *US* in kit la.

Me ozordi sa ki nou pe vvar, se sa enn Gouvernman ki zis koup riban, fer fo promes e sey fer krwar avek pep Seselwa tou keksoz i nouvo.

Montre nou, ki proze ki zot Gouvernman in fer ki pa ti la dan labank proze ansyen Gouvernman? is parey sa proze lagrandisman semen Plaisance parey mon koleg lo lot kote latab Onorab Georges in mansyonnen pli boner. Sanmenm sa ki nou apel zouir lo lasyer ou prosen.

Mr Speaker, ozordi politik bonmarse in vin en pla prefere pour *LDS*. Nek nou tann fo promes parti fo promes, e lenplimantasyon i reste zero.

Kontrerman avek sa ki nou ti ganny dir dan lepase ler zot ti la dan Lopozisyon, ozordi zour tou sa ki ti mal in vin byen e bokou bann pratik ki ti ganny trouve konman mal pe ganny pratique, par sa menm group dimoun ki naryen pa ti bon pour zot. Sanmenm sa ki nou apel kras anler.

Mr Speaker, Mardi pase isi dan sa Lasanble lepep ti ganny dir ki sa gro nyaz nwanr in ale, e nou ti vvar bann Minis e Manm Lasanble *LDS* bat lanmen konman en fet akonplir.

Par kont Seselwa ki pe soufer an silans la deor, pe demann zot lekor akoz ki zis zot ki ankor pe vvar sa gro nyaz nwanr? E ki sa nyaz ki lo nou pei pa zis enn ki nwanr me enn ki byen epe.

E pour met goute dan bwat zot zanfan mazorite paran i vvar sa nyaz nwanr, epe lo pri lavi, pri elektrisite ki'n monte e lo pri manze dan laboutik pli move, sa nyaz nwanr i la menm.

Konmdir sa zenn garson Roche Caiman, "MNA nou pou mor dan bwa dan sa direksyon ki sa pei pe ale." Mr Speaker,

Ozordi zour sanmenm sa pep ki'n fer zot konfyans avek lespwar pour en pli meyer demen in vin viktim *LDS*.

Viktim sakouy pye pour met larzan dan son pos. Oli sa pye ki ti pou ganny sakouye e fri ti pou zis tonbe? I paret gro nyaz nwanr in kouver tousala.

Mr Speaker, annou zis fer en pti analiz. Pansyoner i ankor pe esper zot R10mil. E i annan pansyoner ki'n vot pour en meyer demen ki'n fini mor avek regre.

Zabitan Roche Caiman, ou ki ankor pe espere, zis swiv Nouvel e zot a ganny en konpran ki vre sityasyon Sesel i ladan.

Sa logmantasyon in vini li, me dan plas ou ki pou gannyen la prezan ou ki pou bezwen al pey an plis lo kontribisyon ou pansyon. Ou sa manman, ou sa papa, sirtou bann ki reste Roche Caiman ki pe rod en meyer lavi pour ou fanmir, eski ou satisfe avek sa ki ou pe vvar ozordi? Mon asire ki ou larepons i non. Pour ou ki pe travay e pe sey fer de bout zwenn, eski ou sityasyon lavi in amelyore?

E ou larepons se non. Esaki ou pli dan byen ki avan? Ankor ou larepons i non. Mon konnen akoz apre nou pti

dyalog i kler ki ou sityasyon in vin pli pir ki 2an pase.

Mr Speaker, Gouvernman *LDS* ki ti sipoze annan lentere Seselwa aker e ki zot pe pres Sesel pour tou son zanfan, dan kanpanny eleksyon Prezidansyel 2020 *LDS* ti servi bann zoli promes pour bat latet Seselwa.

Nou ti tann pri lavi pou desann avek Gouvernman *LDS*. La ki nou'n tande Mardi dan sa Lasanble, pri lavi zanmen pou desann. Fo profet i fer ankor fo promes.

Ozordi bann size parey pri lavi, 13enm mwan saler *LDS* i fer fars avek. Avek zot fo promes, parey kabri dan sak, *LDS* in met Seselwa lo en *bus stop* kot bis pa pase.

Mr Speaker, ozordi zour nou annan nou en group dimoun, ki zis konn monte desann lo larzan lasyer nou Kreol.

En lepok vizit Prezidan Faure aletranche ti vin en topik anmer dan labous serten dimoun, e se sa menm serten dimoun ki ozordi ler zot pe dir avek Seselwa la deor ser sang, se zot ki pe monte desann aletranche e lo nou bann zil.

Mr Speaker, si vreman zot ti annan lentere Seselwa a ker, montre nou ki zot kapab senpatiz avek nou. Sa portre ki

zot pe penn ki tou keksoz i *ok* in ler pour met laba e aksepte sa realite devan nou.

Sesel i dan mal, e dan zis 16mwan zot in arive met Sesel dan en kantite retar. Pour fer keksoz vin pli pir, ozordi zour dan plas promot e siport nou bann pti biznes e antrepriz lokal, serten dan Legzekitiv i donn *prominence* etranze.

Mr Speaker, fanmir Seselwa pe soufer, e i annan en mankman mekanizm an plas pour soulaz zot.

Nou'n atann a plizyer repriz isi dan nou Lasanble, kot nou'n ganny dir ki i annan resers ki pe ganny fer e tre byento nou pour vvar rezulta. Me Mr Speaker, i fer plis ki 1an la, be nou ankor pe espere!

Antretan eski sa fanmir dan mon distrik Roche Caiman ki ti sipoze pe ganny fer rezilyan, i sipoze asize gob divan ziska ki resers i fini ganny fer?

Ouswa eski rezilyan i form parti sa ladyet penal ki Seselwa pe ganny forse pour fer?

Mr Speaker, Seselwa i senpleman anvi konnen si zot pou kontinyen ganny mete lo sa *bus stop* kot bis pa pase oubyen Gouvernman *LDS* pou zis pas zot lo sa laliny *extension* al fer fout.

E sa ki pli tris ek sa Gouvernman dan pe demann nou pour koste ansanm pour fer sakrifis e kan zot ki ti sipoze pe fer nou bann fanmir rezilyan, nou vwar zot ankor pe monte desann lo zil, dan gro lotel avek zot fanmir ek zot koleg pe fer *retreat*.

Dan plas valoriz travay dir e sakrifis nou pep pozitiv la ater zot kre plis divizyon ant Seselwa ki pe viv Sesel e sa bann ki pe viv aletranze. Sa, sanmenm sa fason pou zot montre ki mannyer nou merit koste koman en Nasyon?

Mr Speaker, laliberte lekspresyon i en drwa konstitisyonnell.

Me eski ou ki dan servis piblik ozordi e ki ou drwa pe ganny menase e ou pe ganny oprese par serten Minis dan Gouvernman *LDS*, akoz ou pe eksprim ou santiman e ou lopinyon lo rezo sosyal, not byen ki Prezidan Larepublik in dir dan son diskour Mardi lo sa size, akoz tande e pratike i 2 keksoz.

Se la ki mon pou fer zot, ki mon pou les zot fer zot prop analiz lekel ki laverite e lekel ki koz mansonz. Mr Speaker, en nasyon ki viv dan lafreyer se en nasyon ki pe atann en revolisyon.

Partou kot ou pase ou tann dimoun pe dir "miray i annan zorey", ouswa "pa pou kapab koze la akoz zot pe ekout nou konversasyon!"

Me depi kan eski sa nasyon fy, lib e ranpli avek zwa de viv in ariv dan sa sityasyon koumsa? Nou pe ganny dir tou sa bann keksoz pa korek.

Me lefe i reste ki Seselwa i tre konsernen avek nivo sekirite dan nou pei, par bann aksyon Gouvernman e sa i egalman reflekte par nivo krim ki pe monte dan sa pei.

Mr Speaker, en lot size ki preokip aktyalite ozordi se nou lazene e demann pour lanplwa.

Avek tou sa presyon ekonomik e sosyal, eski nou pou kontinyen vwar etranze pe pran bann senp travay, ki nou bann zenn ki pe swiv bann kour vokasyonnel ki annan zot skil, zot abilite pou okip bann tel pozisyon?

Resaman nou'n war ki lannen 2021 in annan en logmantasyon lo *GOP* konpare avek lannen 2020. Seselwa pe ganny kritike pa oule travay e pe ganny dir leve granmaten parey bann ki viv dan lafreser aletranze.

Me olye siporte e kre loportinite ki kapab anmas nou

lazenes, zot fer le kontrer. Se lo sa not mon pou sezi sa loportinite pour mwan felisit nou bann zenn ki malgre tou defi ki sa dernyen lannen in vin avek, zot in kapab trouv sa determinasyon avek sipor zot paran e ansennyan, ki ozordi zot pe vwar fri zot travay pour aprofondir zot ledikasyon avanse.

Mr Speaker, par kont pli gro defi pei i reste pour sa plis ki santenn etidyan ki pa ankor ganny lekol avanse.

Apard striktir ki deza la, ki nouvo programm ki Gouvernman *LDS* i annan ki sorti dan zot swadizan Manifesto pour ed sa bann zenn, pour garanti zot en lanplwa e asire ki zot ganny sans devlope?

Mon profite pour partaz konsern ki serten paran dan mon distrik Roche Caiman, in anmennen pour nou lazenes.

Pour nou zenn ki pa ankor ganny lekol avanse, Gouvernman oli sa sipor ki zot kapab ofer lo sa bann paran ek zot zanfan, pour ede eparnye zot avek bann aktivite anti-sosyal ki ankor antoure dan tou kwen nou kominate?

Mon distrik Roche Caiman depi *COVID* in fer son laparisyon, plizyer paran espesyalman bann paran tousel

ki'n reste lo en sel saler ki pe kouver son *loan*, son lakaz, son elektrisite ek delo e lezot bezwen le mwan pour soutenir son fanmir.

Kan eski i pou ganny en sans pour li respir en kou? Akoz i pa ganny sans al *retreat* parey zot li. Konman en madanm e en paran mon mazin osi bann paran ek sa zanfan ki otreman kapab.

Kan eski Gouvernman pour aret servi problem dimoun pour fer piblisite, e rod vre solisyon pour nou bann fanmir?

Mr Speaker, Bbnn paran Roche Caiman in dir mwan dir sa Gouvernman aret zwe lo zot lemosyon e lemosyon zot zanfan. Travay e delivre pour sa pep.

Mon mazin sa manman dan mon distrik avek son zanfan otreman kapab, e ki sa pti larzan ki i gannyen, i pa ase pour soutenir son fanmir.

E plen zot sa bann paran tousel ki pe sey tap laport pou rod led pa pe kalifye zis akoz, i pe depans en pti larzan pou li pey en programm *Cable TV* pour gard son zanfan dan lakaz, e anpes li al lo semen pou al angaz li dan aktivite anti-sosyal e a risk labi. Ankor ki pe deroule dan distrik parey biznes toulezour.

Pa blyie ki Zidisyer fek ganny rekonnet par Prezidan, pour zefor travay, pe met priyorite pour bann ka labi zanfan ki pe pas devan Lakour.

Me sipor lo nivo kominoter i reste en konsern avek mankman resours, pour plis patrol lapolis e sipor paran pour vin pli rezilyan.

E realite i la Mr Speaker, Kot i ankor annan nou bann zenn fiy pe sibir sa kou lavi ki'n monte. Bann zonm ki pe abiz zot seksyelman pour plezir, pour ganny en pti larzan. Sa i mal Mr Speaker.

Telman pri lavi in monte, i vreman tris e pa akseptab ki serten zonm pe zwe lo febles nou bann zenn fiy e nou bann madanm Seselwa.

Sa ki pli tris se priyorite sa Gouvernman pour fer resers lo lopinyon *sex toys*, olye fer resers lo kou lavi pour aport sipor e soutyen avek son pep. Konmsi sa ki pou amelyor lavi Seselwa.

Mr Speaker, realite sanzman Sesel ozordi avek sa *poor leadership*, dimoun in atrap sa varyan 'fristrasyon' konmsi sa zennomm lo rezo sosyal.

E kot fristrasyon sa pep i vin ki swa pri lavi, problem sosyal, mankman lanplwa ouswa napa larzan. Konfli i

ganny rezourd par vyolans. Si sa zenn onm pe santi koumsa, mon trakase pour fitir sa pei anba sa Gouvernman.

Mr Speaker, 16mwan pase nou ti ganny dir ki Sesel i en kales kase. Me an realite se ki anba *leadership LDS* nou pe vwar vre kales kase.

En kales ki sitan ranpli avek lisyen ek kabri ki sa gir ek fren armen ki Prezidan in koz lo la Mardi in grennen e prezan nou pe zis vir an ron. Dan sa 16mwan, *LDS* in koz bokou lo labi me la realite se ki sa Gouvernman pe pini nou Nasyon.

La mon pe mazin mon bann dimoun aze ki'n travay dir dan tou dilon zot lavi pour garanti en retret avek en pansyon e mwens traka. Me ozordi zour zot pe ganny dir apre tou zot lannen sakrifis e travay dir, ki zot pa kalifye pour Gouvernman pey en *carer* pour okip zot.

Mr Speaker, detrwa dimoun dan mon distrik ki'n apros mwan e menm montre mwan zot let kot zot in ganny dir ki pou bezwen kontribye - zot, zot pou bezwen kontribye. R5306.78 dan zot pos, dan zot larzan pansyon pour zot kapab ganny en *carer*, e Lazans Proteksyon Sosyal pour selman kontribye R1326.69.

Menm fristrasyon i ganny eksprimen avek mwan par bann ansennyan; de sorti dan mon distrik e enn dan enn bann distrik laval, ki zot paran ek manm fanmir pros ki kalifye pour en *carer* par Lasante, me ek Gouvernman LDS atraver Lazans Proteksyon Sosyal i kler ki zot pa enterese si sa bann dimoun kot sa lakour i annan *loan*, son depans lakour ki enportan osi pou li.

Oubyen annan plan pour li fer son prop lozman. Zot pe ganny dir ki, bann lendikasyon sa ki i donn zot, sa pti *allowance* la, sa pti saler ki zot resevwar koman en ansenyan.

I deza ase pour zot kapab pey en *carer* pour ou vye paran. Eski sa pa i apel tir larzan dan pos Seselwa? Ou sa ansenyan ki ti al lamars avek LDS pour en meyer lavi, eski ou satisfe avek sa ou?

Eski sa i zot fason montre konpasyon pour bann pansyoner ki'n lite pour sa pei, pour ki ozordi zot ki dan Gouvernman, dan sa bann gro pozisyon kapab zouir e servi sa pep pour martiriz zot. Eski se sa Sesel pour tou son zanfan?

Oli lapresyasyon pour zefor e travay dir nou bann dimoun aze pandan tou sa lannen?

Eski sa pour menm rekolt lavenir sa zenerasyon ki la ozordi e ki pe ganny dir kontinyen travay, fer sakrifis, pour kontribye plis larzan lo ou pansyon e tre byento pansyon 65an. Kan ou pou donn li sans pou li eksprim son lekor lo sa size?

Sanmenm sa ki Mardi pase Prezidan Larepublik ti dir nou pa bliy Oktob 2020. Me byensir Seselwa pa pour bliy Oktob 2020, akoz in annan bokou soufrans !

Mr Speaker, pour konklir, i kler e malere ki zis apre 16mwan ki in annan plis soufrans e douler pour pep Seselwa. Plis fanmir nepli konnen ki mannyer pour fer 2 bout zwenn.

Plis zenn pe perdi lespwar. Nou bann dimoun aze pe perdi zot dinyite e zot pe viv avek en latet plen ek traka. Seselwa pe viv dan en lafreyer terib. Pa vwar li drol, si pou SONA sekirite i bezwen alinyen depi kot Lasanble ziske laba kot Independence House. Prezan ki mannyer sa pep pou santi? Bokou dimoun ki'n vot pou LDS 2020 pe kriy semafot e pe regrete.

Ou ki pe soufer an silans, arete, fer ou lavwa tandé. Aret per pour vin an piblik e dir mannyer ou pe santi. Seselwa

repran zot desten dan zot lanmen. Pa per, e vin devan. Rod en meyer lavi pour ou fanmir, spesyalman ou zanfan. Akoz LDS, sa bann mirmirasyon ki mon pe tande lot kote, pe dir tou keksoz i ok, lavi i roz. Eski nou dan US nou pe envant larou?

Aret les ou ganny anbete avek bann fo promes ankor akoz apre tou vineg ki pou vin o bor labous. Debout for, zet anba sa bann fo profet, tir sa bann kabri dan sak e zet deor !

Zabitan Roche Caiman mon renouvre mon langazman pour en lot lannen travay avek zot sipor - ansanm. E mon swet zot boner pour sa lannen 2022, e kouraz, e ki nou reste solider ansanm pour fer Sesel fyier ankor ! Mersi Mr Speaker.

MR SPEAKER

Mersi Onorab Vidot. Nou pou pran *pause* la, nou pou rezwenn 2er apre midi. Mon ava rapel bann Manm *Assembly Business Committee* ki nou annan rankont 1.15. *Thank you*, nou a *pause*.

(BREAK)

MR SPEAKER

Nou a kontinyen avek Onorab Desheila Bastienne.

HON DESHEILA BASTIENNE

Mersi Mr Speaker. Bon apre midi Mr Speaker, bonn apre midi tou Manm Onorab, e en bonn apre midi pou tou zabitan Ile Perseverance.

Mr Speaker permet mwan swet la byenveni a nou koleg MNA Manmzel Flory Larue, ki'n rezwenn nou Lasanble depi Mardi le 22 Fevriye 2022.

I touzour en gran plezir pou nou akeyir en madanm parmi nou isi dan nou Lasanble, e ki ansanm nou a ini pou fer tande lavwa lezot madanm ki pe kont lo nou la deor. Ankor enn fwa byenveni Onorab Larue.

Mr Speaker, set avek bokou lazwa e bokou konfidans ki mon pran la parol ozordi apre ki mon'n ekout atantivman nou Prezidan delivre son ladres lo Leta Nasyon.

Prezidan Ramkalawan in fer kler son pozisyon e osi pozisyon pei, spesyalman kot nou'n komanse depi le 20 Oktob 2020 ziska kot nou'n arive akonpli pandan sa 16 mwan ki son parti LDS in pran pouvwar.

Mr Speaker, *pandemic COVID-19* in tap lemonn antye san okenn *warning*, e nou pei Sesel pa'n ganny eparnye.

Li osi in ganny bokou afekte, e nou kapab dir ki in en

letan pli difisil dan nou listwar. Me avek bon planifikasyon ek desizyon byen kalkile par nou Gouvernman, Seselwa ti arive met manze lo latab pou zot fanmir.

Zanfan in kapab kontinyen dan zot ledikasyon, *Airport* in kontinyen fonksyonnen, kot in permet touris rantre pou vin kontribye dan lekonomi nou pei.

Tou lede nou por in kontinyen fonksyonnen akoz preski toulezour in annan bato ki'n rantre.

E sa in fer ki tou nou bann *stevedores* ek lezot travayer dan bann diferan lazans ki travay dan por in annan travay e zot in kapab siport zot travayer atraver en saler lafen di mwan.

Mr Speaker, Lopital ek tou klinik in kontinyen fonksyonnen e asiste bann pasyan menm avek serten difikilte. *SPTC*, *Cat Cocos*, in kontinyen delivre e donn servis piblik.

Bann Minister, diferan departman ek lotorite dan nou pei, magazen, biznes prive, bazar, zot tou zot in kapab gard zot laport ouver.

E nou bann fermeye ek peser in kontinyen anmenn prodwi pou popilasyon, e an menm tan pou zot osi kapab anmenn keksoz kot zot lakour.

Mr Speaker, tou sa ki monn mansyonna deza, pa pou pli zistifye si mon pa mansyonn travay eksepsyonnelle Prezidan Ramkalawan, pou vin pli determinen, pou fer ki nou pei i kontinyen bouze.

Par an premye, swazir pli bon desizyon par fer sir ki tou Seselwa i ganny vaksen kont *COVID-19*, pou nou kapab al dan lasosyete san okenn lafreyer, e pare pou leve e al debourye.

Mr Speaker, legzanp i kler devan nou, kot li menm li Prezidan ti fer sir ki li an premye i pran son vaksen, akoz i ti pe met Sesel ek son pep an premye e pou li kapab ganny proteksyon neseser pou permet li vwayaze, al tap laport dan bann pei pou anmenn led pou Sesel, pou tir li lo son zenou. Menm ki dan sa letan, plizyer pei ti ferm zot *Airport*, me pou Prezidan Ramkalawan, i ti pe mazin sov Sesel ek son pep e anpes li koule.

Parmi sa bann tel vizit Prezidan in kapab al fer negosyasyon det pei avek *IMF*, negosye o tan *scholarship* posib pou nou bann zenn. E osi led pou Sekter Lar ek *Sport*.

Mr Speaker, 16mwan anba en novo Gouvernman, Gouvernman *LDS*, in annan enn de mekontantman. Pou

nonm enn, de legzanp, pa'n posib pou donn 13 mwan saler, logmantasyon dan saler pa'n arive, pa'n annan nouvo lakaz ki'n ganny konstri dan distrik pou soulaz bann ki nou'n vin zwenn ankor lo lalis espere plis ki 15 an pase.

Sa ki ankor pe esper en kare later, pri lavi pa'n desann sitan vit parey nou ti pe espekte, *welfare* ki'n ganny koupe, e osi difikilte pou serten dimoun ganny en lanplwa.

Mr Speaker, me lo kote, pozitivite atraver serten sa bann legzanp ki mon'n donnen, in fer ki Gouvernman in kapab anmenn bon rezulta e in met nou lo bon semen pou permet nou avans pli devan ankor.

Mr Speaker i enportan ki nou azir fran avek nou lekor, e rekonnet ki fason Gouvernman *LDS* ti vin zwenn leta, ki parti Lepep, US ti kit kof Sesel le 20 Oktob 2020.

Minis Finans ek Gouvernman Labank Santral Sesel ti kontinyelman pe donn sif egzakt sityasyon finans pei, e sa ti fer en gro lenkyetid lo Gouvernman li menm, akoz son ladministrasyon ti pe zis mazinen si Seselwa ti pou annan en saler.

Alor ti kler ki Gouvernman o pouvwar ti bezwen pran serten desizyon dir, pou sov

nou pei e an menm tan fer sir ki pep Seselwa pa ganny afekte atraver sa bann desizyon, me ki nou kontinyen omwen resevwar en saler nou tou lafen di mwan.

Mr Speaker, sa bann tel desizyon ki Gouvernman ti oblize pran, pa'n fer okenn Seselwa mor lafen. Pa ti aras person son saler, e malgre ki problem lakaz i ankor egziste napa fanmir ki pe viv anba pon, ni anba gro ros, ni ouswa dan bwa.

Mr Speaker Gouvernman *LDS* in vin zwenn pei avek en gro problem lakaz, pa li ki'n kree sa problem. In annan en demann plis ki 6mil aplikan. Me avek pasyans e la fason ki i a pe travay, nou asire ki lakaz i deza en priyorite dan son plan pou ki Seselwa ki bezwen sipor, i a ganny soulaze.

Mr Speaker menm bann dimoun ki ankor pe esper en travay, zot vvar en fason arive ganny en lasyet manze, akoz ziska ozordi lopital Sesel pa ankor anrezistre okenn dimoun ki pe mor lafen ouswa avek malnitrisyon.

Mr Speaker ozordi nou fyer koman en Nasyon pou vvar lafason bokou keksoz dan diferan domenn pe progrese dan nou pei. Ler nou refer dan nou Manifesto, nou vvar sa vizyon ki *LDS* ti met devan pep

Seselwa an 2020 e sa transformasyon ki'n arive.

Transformasyon in komans depi dan ledikasyon, lasante, *tourism*, plis devlopman lo nou bann zil, sistem teknolozi pli avanse, lanplwa, zefor pou ranmas plis *tax*, plis zefor pou elimin koripsyon, ek bokou lezot ankor.

Tou sa ki nou'n arive akonpli se gras a bon kalkilasyon, bon planifikasyon, e bann desizyon ferm e menm dir, e atraver sa, se nou pei ek nou pep ki pou benefisye.

Mr Speaker, letan Prezidan i dir ki napa plas pou parese dan pei, i kler ki malgre tou sa bann rezulta pozitiv devan nou, ozordi i ankor annan negativite dan pei, trenn lipye e osi lesey fer sabotaz.

Annan bann pti group ki pe ganny ankouraze pou fer sabotaz dan bann Minister, dan serten departman, e osi dan serten letablisman touristik.

Sa ki fer tou pou ki serten Departman i reste fermen, an servan leskiz COVID. Otan ki li i reste dan lakour, i a pe ganny son saler, pou li i *ok*, e o tan ki piblik i fristre pou li i pli bon ankor.

Ler zot anvi fer piblik fristre Mr Speaker, i vin, en dimoun i vin kot zot biro, e zot

dir li nou pa ouver retournen dan 2 semenn. Lansenny 'OPEN' i lo laport li, 4 a 5 travayer i la dan biro, me zot pa kapab donn servis, pou zot, COVID.

Sa i Leskiz en pti group e zot fason fer pou fer piblik fristre. Sa ki pli mal ankor Mr Speaker, ler sa dimoun i retournen apre sa 2 semenn zot dir li, nou pa pe vwar piblik, met ou dokiman dan sa bwat laba e nou a pran kontak avek ou pli tar. Me zanmen sa i arive.

Mr Speaker, pou mwan sa kalite fason travay i egzakteman sa ki Prezidan in dir, lipye dwat lo fren, lanmen gos lo fren amen.

Sabotaz ankor, letan serten Departman i repran son ler travay normal pou akseler-e servis, en serten biro kot i fer bann peyman lo nivo nasyonal vreman enportan, li i deside gard son ler fermen 2er apre midi akoz dapre li, i pa pe pran traka person.

Mr Speaker, dan le pase *file* dimoun ti perdi dan serten Minister, e ozordi i ankor pe arive. Piblik ankor pe ganny dir mon pa war ou *file*, mon ankor pe rode, retourne en lot zour, e menm annan ki pe dir avek piblik, ou *file* ti lo mon latab,

mon'n al konze letan monn retournen mon pa war.

Me lekel ki responsab tousala? Pa donn lenformasyon apropriye, fer dimoun ale /vini, pa reponn telefonn dan serten biro, ek *email* i ankor pe arive.

Mr Speaker, malgre tou zefor pou kre fristrasyon ek lesey pou met retar, nou Gouvernman in fini tras son destinasyon e Seselwa pa pou les zot ganny distrer par okenn bann aksyon negativ.

Kot nou pei in arive apre sa 16 mwan Mr Speaker, nou pou fer sir nou pou travay dir pou nou avans pli devan.

Mr Speaker, mon pou demann tou Seselwa pou siport nou Gouvernman dan tou son bann plan pozitiv, pou kontinyen transform nou pei, kontinyen pran bann bon desizyon ki pour vin dan lentere tou Seselwa e nou menm ki pou fyer demen.

Mon pou osi profite pou remersye bann Minister, lazans, ek Departman tel ki *SFA*, *SLTA*, *LWMA*, *MLUH*, lakonpannyen *Airtel*, *FoodPro*, *A and H Builders*, menm Manm Lafors Defans, ek Mr Naiken.

Pou bann servis ki zot in anmenn dan nou distrik Ile Perseverance e osi bann letan ki zot in reponn nou lapel letan nou ti frap lo zot laport.

En gro mersi i al pou *SFA* pou donn nou zabitan ek nou bann peser en bazar, dan lespas 8 mwan. Malgre nou pa ti form par zot Bidze, me zot in reponn nou lapel apre ki peser in esper plis ki 10an pou kapab ganny en bazar dan Perseverance.

SLTA pou enstal *speed bump* ek *zebra crossing* lo serten larout ki'n ganny demande par paran ek lezot zabitan, pou sey eparny aksidan.

LWMA ki'n komans travay lo ranplasman enn de *waste bins* dan Perseverance. *MLUH/PMC* pou zot bann sipor ki zot ti donn zabitan letan nou ti bezwen zot. E *Airtel* pou siport distrik ek lekol avek *waste bin*.

Bann zofisyen Lapolis ki'n pran zot responsabilite o serye pour etabli lord ek lape dan Perseverance, mersi e mon felisit zot. Mon swete ki zot a kontinyen sa bon travay e donn piblik sa respe e annan plis konfidans dan zot.

Me nou pa pou toler bann ki pran kote serten fouter dezord. Ler en zofisyen i sermanté pou fer en travay zis, e transparan, e san okenn lapliferans, ou fer li byen. E ler in ariv ler pou pran aksyon, ou pa gete si sa i ou dalon, si i ou

kouzin, si i ou frer oubyen ou ser.

Mon pou terminen par dir en gro mersi mon bann koleg ki travay akote mwan dan distrik, ki'n donn tou pou fer Perseverance bouze. DA Aaron , DA Nichole Gabrielle, mon clerk Hazel Larame, Ms Chantal Mahoune, e Mrs Fraksit, e osi Ms Lanjia Boniface ki ti la pou en pe letan ki'n ed nou dan Perseverance.

Mersi ou menm Mr Speaker e tou bann Manm Onorab pou lafason ki zot in, ki nou'n siport kanmarad dan lannen 2020 a 2021.

Ki sa lannen nou a fer li en pli bon travay e kontinyen pran bann bon desizyon pou nou pei avanse e nou bann frer ek ser Seselwa a kontinyen epanouir e viv dan lanmour e dan lape. Mersi

MR SPEAKER

Mersi Onorab Bastienne. Mon a pas laparol Onorab George Romain.

HON GEORGE ROMAIN

Mersi Mr Speaker. Bonn apre midi Mr Speaker, bonn apre midi tou koleg Onorab. Bonn apre midi tou dimoun a lekout.

Mr Speaker, pou mwan komans mon repons lo diskour

lo Leta Lanasyon mon ti a kontan premyerman remersye e felisit nou Prezidan pou son diskour. E parey labitud, diskour Prezidan in enn ki'n anmenn bokou lespwar pou nou tou.

Dan en moman letan, kot nou pei in pas atraver en bon pe defi. E malgre sa bann defi, pandan sa dernyen 16 mwan, nou pei in mars ver progre ek sikse, gras a en direksyon en Gouvernman ki serye e ki annan en vizyon pou nou pti pei Sesel.

Mr Speaker, nou sanse ozordi ki nou annan en Gouvernman ki pe met tou son zefor pou redres nou lekonomi, apre sa pandemik ki'n frap lemonn e boulvers tou keksoz.

Sesel in pas dan bokou difikilte avek sa pandemik, touris ti'n aret vini, biznes ti'n tonbe e menm i annan biznes ki'n frenm zot laport.

Bokou dimoun in perdi zot travay, rezerv pei ti'n tonm lo en nivo ki pa akseptab e an gro, parey bokou lezot pei dan lemonn, ti annan bokou lensertitud e nou ti vwar nou dan en gro difikilte. Nou fitir ti dan sonm.

Mr Speaker, me ozordi mon fyer pou dir ki avek sa Gouvernman *LDS* dirize par Prezidan Wavel Ramkalawan,

nou'n vvar bokou laklerte, nou lavenir i bokou pli briyan e nou annan bokou lespwar ki nou krwasans lekonomi pou kontinyen amelyore.

Sa Gouvernman in fer bokou dibyen par met priyrite pei an premye e nou ini ansanm koman en Nasyon pou aport sikse ki nou pe vvar ozordi.

Mr Speaker, enn bann sikse enportan ki nou pe demontre lemonn ozordi, se amelyorasyon dan bon gouvernans.

Ozordi Sesel i annan en *corruption index* ki premye dan Lafrik e 23enm dan lemon parmi 180 pei, sorti 27enm an 2020. I demontre ki nou'n fer progre pou ede redwir nivo koripsyon dan nou pei. E sa, pandan sa pti moman letan ki *LDS* in vin o pouvwar.

Mr Speaker, sa i montre nou ki Sesel i serye pou elimin koripsyon dan tou form.

Nou'n vvar komitman ki nou pei pe fer atraver ACCS, ki pe aktivman pourswiv bann ka, enkli rod sa 50milyon Dolar, en ka blansisaz larzan kot disparisyon en kantite larzan ki ti'n kapab fer bokou diferans dan nou pei a sa letan.

Mr Speaker i enportan ki nou promouvwar en kiltir kot i annan responsabilite e rann kont dan larzan piblik e

koripsyon i merit ganny eliminan dan tou son form.

En lot keksoz ki nou pei in montre lemonn Mr Speaker, se ki nou'n kapab mentenir stabilite dan nou pei menm si nou'n sanz en sistenm ki ti la pou 43an.

Bokou pei in mansyonn Sesel koman en legzanz pou lemon, ki'n nou'n mentenir lord ek lape menm si i annan lopinyon politik ki vreman divers.

Mr Speaker, ozordi nou annan en pep ki lib, kot zot kapab eksprim zot lopinyon lo bokou platform, en keksoz ki pa ti egziste dan nou pei o paravan akoz lafreyer viktimizasyon. Sa i en sanzman remarkab Mr Speaker, e i enn ki nou merit fyier e ki merit kontinyen ganny mentenir.

Mr Speaker, lafason ki nou'n reazir avek sa pandemik *COVID*, i enn ki pa'n zis fer nou vin en legzanz o monn, me in osi ede pou redres nou lekonomi konsiderableman.

Konpar avek enn de pei tel koman Sri Lanka ki'n fer fas avek mankman manze e Australie kot apre 2 an, se preznan ki zot pe reouver zot lafrontyer avek le monn.

Sikse nou programm vaksinasyon i enn ki'n tre bon, e sa in ede pou protez nou

popilasyon kont plis lanmor e maladi ki ti'n kapab pli afeblir nou sistenm lasante.

La Mr Speaker, mon le ankor enn fwa remersi Minis lasante avek tou son *staff*, pou sa bon travay ki zot pe kontinyen fer.

Nou tir sapo ek zot pou sa travay sanses pandan sa dernyen 2 an pou sey kit nou azour, tret pasyan e enplimant programm prevansyon.

Menm si nou'n fatige ek sa bann restriksyon, me nou apresye ki se sa menm mezir ki'n an plas, ki'n ede pou met COVID anba kontrol.

Mr Speaker, ozordi nou kapab akey bokou plis touris dan nou pei ki pe ede pour ogmant nou reveni nasyonalman.

An 2021, nou'n ganny nou en pe plis ki 180 mil touris, en logmantasyon *significant* e tou lendikasyon i la, i montre ki nou viziter pe remet konfyans pour vin vizit nou pei.

E sa Mr Speaker pe remet lespwar dan nou lekonomi e pe kre bokou lanplwa ki ti'n tonbe pandan sa de dernyen lannen.

Mr Speaker nou vvar ki bann avyon ki pe arriv Sesel pe kontinyen anmenn bokou plis viziter. Bann lotel ek bann pti letablisman touris pe fer byen e

tou sa la i demonstre progre nou lekonomi.

Rezerv monneter pou pei in osi ogmante a en nivo ki tre o, ki amelyor nou bann lendis lekonomi.

E la Mr Speaker, mon ti a kontan pran sa loportinite pour remersye Minis Radegonde avek son tim pour sa bon travay ki i pe fer.

E la mon vreman kontan Mr Speaker, pour aprann ki *Air Seychelles* in finalman ganny en *rescue plan* e ki Gouvernman in kapab negosye pou efas \$100 milyon an total, ekivalan R1.5 bilyon ki *Air Seychelles* ti dwa ek *Board*, ek *bond holders* ek *Etihad*.

Sa i montre nou ki mannyer sa Gouvernman ki o pouvwar ozordi i pe travay dir pour protez lanplwa plis ki 500 travayer Seselwa dan nou *national airline*.

Nou aprann ki sa \$27.8 milyon ki *Air Seychelles* i ankor dwa, pour ganny re peye par *Air Seychelles* avek sipor Gouvernman.

Sa i vedir ki nou *national airline* in ganny en nouveau loportinite pour li rekomanse e ki tou travayer i ganny retenir anba zot programm restriktirasyon. Sa i en sikse enorm pour nou pei anvi ki nou

konnen, ki problem ki *Air Seychelles* ti ladan.

Mon felisit Gouvernman, atraver Minister Transpor e Minister Finans e osi administrater *Air Seychelles* avek son *Board* ek *Management*, pou sa bon travay pou retir *Air Seychelles* dan sa kriz ki i ti pe pas ladan.

Finalman nou annan laklerte e lespwar pou nou *national airline*, mon le profite pour demann *staff* *Air Seychelles* pour travay dir pou anmenn plis lefikasite dan sa biznes ki zot pe fer.

Analiz byen bann larout potansyel avan fer desizyon pou deservi sa destinasyon. Annou pa fer menm fot lepase. Sa ki zot in pas ladan i en lesion ki pou fer zot aprann bokou e devlop zot pou fer pli byen.

Annou fer Sesel fyer e mon asire ki sa tim ki la pou kapab fer sa bon louvraz. Mr Speaker, Manifesto *LDS* in osi donn en komitman pou ede redwir kou lavi dan Sesel.

E menm si nou Gouvernman pe travay dir pour atenn sa lobzektif, i annan bokou defi globalman ki afekte nou.

Nou pei i pti e ganny afekte par bokou faktor dan lemonn enkli pri marsandiz, pri *freight*, pri karbiran e tousala la

in remonte e pe ede pou fer pri lavi ogmante.

Mr Speaker, en barik delwil ki ti kout \$64 milye lannen pase, pe ozordi kout plis ki \$100, en ogmantasyon apepre 64poursan dan sa peryod.

La avek sa kriz *La Russie* ek *Ukraine*, i tre probab ki pri pou kontinyen monte.

E Ler pri karbiran i monte Mr Speaker, sa i enpakte lo en kantite keksoz enkli kou elektrisite, enkli *freight* ki an retour afekte pri marsandiz e lezot materyo brit pou lendistri.

Mr Speaker, i enportan pou nou konpran ki sa bann faktor *external* dan lemonn pou annan en lenpak direk lo nou anvi ki nou enport lamazorite nou prodwi.

E alors zefor ki nou Gouvernman pe fer pou abes pri lavi pou osi ganny afekte. Mr Speaker, nou programm *welfare* i enn ki'n nou'n vwar en bon transformasyon.

Sa program in kontinyen marse pou asiste bann ki mwen fortinen e sa Gouvernman i pou toultan asiste dimoun ki mwen kapab. Reform ki *LDS* in anmennen dan sistem welfare i enn ki remarkab, i enn ki asire ki bann ki merite, se zot ki pou ganny lasistans.

E la mon lans lapel avek bann ki pe fer laplikasyon pou *welfare*, pou silvouple swiv tou prosedir ki an plas.

Nou'n tann *ASP* pe refer sorti, ki bokou fwa dimoun ki pe rod lasistans pa pe donn ase dokimantasyon neseser ki fer li difisil e osi met retar dan zot laplikasyon.

Mr Speaker, sa Gouvernman i serye e pe fer sir ki napa labi dan sistenm parey ti annan anba ladministrasyon ansyen ki ti pe donn gos, drwat, dalon e kre bokou gaspiyaz dan sa pti gin resours ki ti annan.

Alors mon pe demann bann ki pe fer laplikasyon, pou annan pasyans e respe prosedir ki an plas pou ki keksoz a mars byen e pli vit.

Me Mr Speaker, par kont, i enportan pou osi refer sorti ki bann ki kapab travay fodre zot leve e pran zot responsabilite e angaz zot dan en lanplwa pou zot ganny reveni e siport zot fanmir.

Nou kapab dir i annan bokou plis *vacancies* ki pe sorti tou le semen, e sa i montre nou ki i annan loportinite travay dan nou pei.

Gouvernman in toulstan ganny kritike ki i annan en kantite etranze ki pe kontinyelman pran bann travay ki Seselwa ti kapab fer. Mr

Speaker, oli sa bann Seselwa ki annan sa bann kapabilite?

Definitivman nou annan sa lafors travayer dan sertern sekter, me malerezman dan bokou lenstans, fodre ki nou, Seselwa, nou pran plis responsabilite ek komitman anver nou travay, ki nou a kapab devlop en lafors travayer ki sekter prive ensi ki Gouvernman a kapab kont lo nou dan plas fer vini etranze.

Mon kontinyen lans lapel pou ki Minister Lanplwa i asire ki avan nou fer vini en etranze, nou get byen si i ti kapab donn en Seselwa sa loportinite.

Akoz mon konvenki ki nou annan bokou nou Seselwa ki kapab fer sa bann louvraz, me nou merit pouz nou lekor pou avans devan pou fer li.

Mr Speaker, nou lalit kont drog espesyalman bann *hard drugs*, i merit kontinyen akoz sa i en menas pou nou lafors travayer e nou bann zenn ki pe leve.

Pou sa kantite dimoun, ki alinyen tou le bomaten pou al pran *methadone* i montre nou ki mannyer drog pe afekte nou sosyete. Me Mr Speaker, i enportan ki nou esey reabilit bann ki'n ganny afekte.

Dan menm laliny kot nou kontinyen anpes drog antre dan nou pei, nou bezwen annan plis

programm pou ede retir zot dan sa problem, koumsa zot a kapab rekipere e retournen pou rekomans zot lavi.

Nou felisit nou Gouvernman pou zefor ki i pe fer pou angaz Sesel avek lezot lafors maritim, tel ki Angle, Franse, Endyen, Sinwan e Ameriken pou ranforsi sirveyans lo nou lanmer kont drog ek piratri.

Mr Speaker, mon profite pou felisit nou *Coast Guard* pou sa bon travay ki zot pe kontinyen fer pou evite ki drog i kontinyen dan nou pei.

Mr Speaker, la mon ti a kontan fer enn de remark lo nou Lafors Lapolis. Premyerman mon vwar amelyorasyon dan lafason zot travay, e pou sa mon ti a kontan felisit zot.

La mon ti a kontan remersye Regional Commander Mr Marcus Jean, ki ansarz rezyon Nor, e ki son tim i enn ki pe travay dir pou protez nou zabitant.

Nou'n vwar bann larestasyon pe ganny fer bokou pli vit e nou'n vwar reaksyon pou donn lenformasyon ek manm piblik pe ganny fer ase vit. La mon ti a kontan felisit Komisyoner Lapolis, pou sa transformasyon pozitiv ki nou pe vwar dan Lapolis

Me an menm tan, nou war serten zofisyel lapolis pe antre dan bann move konportman e sa pe sali non Lapolis. Mr Speaker sa defayans fodre aranze, akoz nou lapolis i merit enn ki disiplinen e kapab donn legzanp e non pa, pe kas Lalwa.

Mon pou osi kontinyen demande ki nou devret annan plis prezans Lapolis dan nou kominote, koumsa manm piblik a santi zot an plis sekirite e bann zofisyel Lapolis a kapab enterakte avek kominote pli byen.

Sa i a kapab ede pou redwir bann bagar, krim ek vyolans ki nou'n tann ase souvan pandan sa bann dernyen semenn. Mr Speaker, nou kominote i merit en landrwa kot i annan lape e larmoni e non pa vyolans ek krim.

Mr Speaker, e ler mon pe koz lo nou kominote. Mon tre ankouraze pou war lapros ki sa Gouvernman pe anmennen pou anmenn servis piblik pli pre ek nou dimoun.

Mon pran legzanp lo rezyon Nor, ki Anse Etoile i form parti, e mon tre ankouraze par partisipasyon bann lorganizasyon servis piblik ki'n vin dan nou *meeting* rezyonal.

Nou'n vwar SPTC, PUC, NSC, SLTA, PMC ek Lapolis dan

sa dernyen *meeting* ki nou ti fer Sanmdi pase Glacis, e zot in eksplik nou zot programm pou nou kapab, o nivo distrik, travay pli byen avek zot pou zot pli byen deservi nou bann zabitan.

Dan sa *meeting*, zot in kapab reponn nou bann konserne sa i tre enportan akoz i ede pou anmenn plis lefikasite e osi ede pou manm piblik pli byen konpran servis ki zot ekspekte.

Mr Speaker, se sa kalite lapros travay ansanm, ki nou merit ankouraze e pouse partou dan nou pei.

Nou pa kapab devlop en vilaz e fer semen san fer konsiltasyon avek SPTC, Akoz apre SPTC pou dir ou ki semen i tro pti pou son bis, ouswa sa semen pa pou kapab tenir pwa son bis.

Mr Speaker, Me si par kont nou ti'n fer konsiltasyon depi lo konmansman, proze ti pou vin pli efikas e tou dimoun ti pou war benefis pli vitman.

Mon osi apresye amelyorasyon ki mon obzerve dan servis piblik. Anse Etoile nou kontinyen ganny bon korperasyon, e la mon sit enn de legzanp, parey HFC, SLTA, LWMA, ASP kot zot in reponn ase vit pou ed nou bann zabitan

ki pe rod klarifikasiyon oubyen lasistans.

E la mon ti a kontan remersye zot pou zot sipor e dir zot kontinyen ek sa bon travay. Set akoz zot, ki nou pou kapab reponn lapel manm piblik pli vit.

En lot reform ki Gouvernman LDS pe anmennen dan servis piblik, se kreasyon sa novo *Public Service Bureau*.

Ki son lapros pou pa zis *focus* lo ladministrasyon piblik, me pli enportan i pou met latansyon lo *modernize* nou *civil service* e fer sir ki lobzektif servis piblik pe ganny atenn.

E annou pa blyie ki sa ti enn nou lobzektif ki nou ti promet Seselwa dan Manifesto LDS.

Mr Speaker, en lot promes ankor ki nou Manifesto LDS ti fer sete, pou met lanfaz lo devlopman lagrikiltir e lapes.

Nou'n vwar bokou devlopman lapes atraver proze SFA dan bann distrik, kot bann bazar in fini ganny konstrir e *ice plant* in ganny enstale. Tandis ki i annan lezot landrwa ki ankor anba konstriksyon.

E la mon ti a kontan fer en demann avek SFA pou regard dan devlopman bazar Anse Etoile, an vi ki i pe deteryore e en renovasyon i merit ganny fer o pli vit posib pou siport sa

bann peser pou vann zot pwason dan en landrwa ki pli favorab.

Mr Speaker lo kote lagrikiltir, *LDS* in gard son parol pou promouvwar lagrikiltir lo nou bann zil. Dan nou distrik, i annan en zenn garson ek son tim, ki ti pe rod later pou plante, e atraver bann diskisyon ki nou'n kapab fer, i pe ganny loportinite pou li al Coëtivy tre byento, pou al konmans son proze.

Nou konnen poudir i annan lezot ki'n fini konmans al lo zil e mon annan lesparwa ki zot bann proze ava vin en sikse e ki sa i ava en legzanp pou lezot.

Mon espere sa i ava ankouraz nou bann zenn ki pe rod en debousman pou al lo zil. Mr Speaker, mon oule profite pou felisit sa garson akoz i montre bokou determinasyon pou li reisi dan son lavi, e mon swet li e osi lezot ki'n fini fer sa depar lo zil, bonn sans.

Mr Speaker avan mon terminen, mon ti kontan felisit nou Prezidan pou son bann visit travay ki i pe fer aletranze kot nou'n vwar ki pe ogmant vizibilite Sesel dan lemon e osi pe anmenn lezot benefis direk pou nou popilasyon.

Annou mazinen ki Sesel, ziska ozordi, pa ankor aste li ni

en vaksen COVID. Tou vaksen ki nou'n gannyen ziska ozordi i bann donasyon ki nou pei in gannyen atraver bann diskisyon ki nou Prezidan in fer avek bann lezot pei.

Sa bann *meeting* bilateral ki'n ganny fer avek Prezidan *Commission Eropeen*, zofisyen EU, Linyon Afriken sete bann loportinite enportan ki nou Prezidan in kapab met nou bann konsern devan.

Sesel i en Pti Leta Zil ki pe fas avek lefe sanzman klima e alors vizibilite lo lasenn internasyonal par nou Sef Deta i enportan, akoz i pe rod latansyon bann lezot pei e lorganizasyon ki kapab ed nou dan diferan sekter kot nou bezwen plis lasistans.

Mr Speaker, enn bann keksoz ki mon pe kontinyen vwar resaman dan sa bann vizit ki Prezidan in fer, sete sa zefor pou zwenn kominote Seselwa ki pe viv aletranze.

Sa i en keksoz ki vreman pozitiv, akoz Prezidan Sesel i Prezidan pou tou Seselwa nenport ki kwen ki ou ete dan lemon. Akoz pa blyie Mr Speaker, nou moto i" Sesel i pou tou son zanfan."

Son diskisyon avek sa bann *diaspora* i osi pe donn loportinite pou sa bann Seselwa rod fason pou kontribye anver

developman nou pei e menm in ouver laport pou nenport Seselwa ki pe viv aletranze pou *apply* pou bann *vacancies* ki annan Sesel. Dan en fason ki nou kapab atir en varyete *skills* e leksperyans dan nou pei.

Mr Speaker, mon pe osi fer en lapel avek bann lakonpannyen prive pou osi ouver zot laport avek nou bann Seselwa ki pe viv aletranze.

Sa i a kapab ede pou osi lokaliz bann *post* kot nou vwar etranze pe okipe, tel ki dan Lendistri *Tourism*.

Mr Speaker mon ti a kontan remersi sa Gouvernman, dirize par Prezidan Wavel Ramkalawan pou sa bon performans pandan sa dernyen lannen.

Menm avek bokou defi ki nou pe fer fas avek, nou annan bokou lakonplisman ki nou merit fyer. Nou vwar nou Gouvernman pe kontinyen pouse pou developman nou pei e bokou keksoz pe amelyore gradyelman.

E sa se gras a en ladministrasyon ki annan en vizyon, e en bon direksyon, enn ki serye e konn son priorite.

Mon ti a kontan fer en remersiman spesyal pou bann *businessmen* e osi bann *sponsors* ki'n asiste bann zabitan Anse Etoile dan plizyer

fason. Mersi pou zot zenerozite e nou vreman apresye zot sipor.

Finalman mon le osi remersye DA Anse Etoile ek tou son *staff* ek mon *clerk* pou sa bon lanmitye travay ki nou annan ansanm, pou nou kapab kontinyen anmenn plis progre dan nou distrik. E en remersiman spesyal pou tou zabitan Anse Etoile pou zot sipor.

Mon priye ki Bondye i a kontinyen gid nou Prezidan ek son lekip pou fer bann bon desizyon dan lentere pei ek tou son zabitan.

Mon demann pep Seselwa pou osi kontinyen travay dir pou nou anmenn sa transformasyon pozitiv dan nou pei. Mon priye ki lannen 2022 i ava anmenn plis boner pou tou Seselwa e ki Bondye a kontinyen protez nou pei. Mersi Mr Speaker.

MR SPEAKER

Mersi Onorab. Mon a pas laparol Onorab Churchill Gill.

HON CHURCHILL GILL

Mersi Mr Speaker. Bonn apre midi Mr Speaker, tou Manm Onorab, tou dimoun ki pe swiv sesyon Lasanble, tou zabitan Baie Sainte Anne.

Mr Speaker Sesel e plizyer zanmi Seselwa in kontinyen fer

fas avek sa pandemik dan form plizyer varyan. Sesel e bokou nou bann frer e ser Seselwa in eksperyans bokou defi.

Mr Speaker permet mwan pas mon senser senpati e kondoleans pou tou fanmir Seselwa ki'n perdi zot pros. Sa ki nou bezwen note avek sa leksperyans COVID, se ki dan labsans en lekonomi diversifye ki solid nou bezwen mentenir sa de pile ki nou annan dan en fason bokou pli serye.

E aksyon pli konkret an fas avek tou bann lofans ki relye avek nou de pilye prensipal. Sa se Lendistri Touris e Lagrikiltir. Nou pa kapab kontinyen aksepte sa ki nou vwar pe arive lo lans Cote D'Or e Anse Lazio Praslin.

E menm lezot landrwa potansyel Sesel kot nou bann viziter i kontan vizite. I pa akseptab pou kontinyen annan *petty thief* lo lans. I pa normal e i pa akseptab pou nou annan en group dimoun ki pas zot letan pou *harrass* kliyan lo lans.

I pa akseptab pou kliyan ganny forse pou aste fri ler zot pa anvi. I egalman pa akseptab pou kliyan pey ekskirsyon, apre kliyan pa vwar sa bann dimoun ki zot in pey avek. Finalman pa ganny sa bann servis

ekskirsyon malgre in fini ganny peye.

Avan ki i tro tar nouvo Lezislasyon I bezwen vin devan Lasanble pou adres sa bann aksyon e konportman dan en fason tre serye.

Rezulta nou aksyon desiziv, ava permet nou pei kontinyen protez e mentenir a bann bon popilarite garanti ogmantasyon larive touris dan nou pei. E sa i ava de pou kontinyen vwar soulazman dan nou lekonomi.

Mr Speaker ti pou enteresan pou vwar sa statistik kot mwens touris an 2021 me bokou plis reveni mon krwar Manm i devret vwar sa statistik.

Eski plis reveni i annan relasyon direk avek nouvo dinamik dan marse touristik Sesel ? Kot nou pei Sesel e aprezan atrakte touris ki zot pouvwar depans bokou plis.

Oubyen to lesanz sa lepok i osi en fakter enportan. Oubyen eski plis reveni i akoz touris in reste bokou plis letan Sesel, an konparezon avek nou bann marse touristik tradisyonnell?

Mon panse ki Minister konsernen i konpran natir sa nouvo dinamik.

E konsekaman kontinyen reste fokalize e travay pou ogmant lakantite touris ki sorti

dan sa bann novo marse touristik, ki'n selekte Sesel konman zot destinasyon prefere.

A sa pwen mon oule salye tou dimoun ki dan biznes touris ki pe respekte tou Lalwa, e pe kontinyen ede pou mentenir zimaz nou pei a tou pri.

Mr Speaker sa i annmenn mon lo lanons det, lo laliny aeryen Nasional *Air Seychelles*. I tre ankourazan pou tande ki napa okenn staff *Air Seychelles* ki'n perdi travay e napa personn ki pou perdi travay.

Mr Speaker, lanons ki plis ki \$100 milyon ekivalan R1.5 milyon det *Air Seychelles* in ganny *write-off* i provok en kestyon lozik. Eski i annan okenn kondisyon atase avek en tel sonm *write-off*? Si wi i enportan ki Seselwa i konnen. Si non i enportan konnen lo ki baz ki sa sonm in ganny aksepte pou *write-off*.

Nou osi konpran ki *Management Air Seychelles* i espekte repran kontrol apre lafen Mars. Alor mon senserman panse ki tre enportan ki nou fer tou sa ki posib, evite ki nou retourn ankor dan sityasyon gro det.

Egalman i tre enportan ki Seselwa i ganny en kontrandi lo novo direksyon ki *Management Air Seychelles* pou

pran. Pou asire soutenabilite lo tou nivo ek loperasyon *Air Seychelles*.

I enportan ki en pei i annan akimilasyon rezerv. Pou garanti lenportasyon pou popilasyon pou serten kantite mwan. Me rezerv i selman en akimilasyon sirplis. I tre enportan ki nou fer sa distenksyon e kalifye nou sonm rezerv reel.

Mr Speaker vi ki rezerv pe akimile eski Seselwa i espekte vwar enplimantasyon novo Polisi ki pou vin an plas pou soulaz bann ki pli vilnerab, lo en baz sibvansyon kot i merite, ziska ler ki ogmantasyon saler i ganny donnен.

Fodre pa ki nou blyiye ki dan tou pei, i annan en group dimoun ki ganny kalifye konman pe viv dan lapovrete. Mon pa pe koz lo *welfare*.

Mr Speaker, si kou transportasyon ki pe ganny koz lo la, eski i vreman reel? Akoz bann *container* ki tarde ganny tire lo Por, mon senserman krwar ki pe osi kontribye pou ogmant kou marsandiz plis.

Sa bann konpannyen konsernen i devret pe fer en travay bokou pli efikas dan sa direksyon.

Mr Speaker i kler ki i annan en nesesite reel pou donn lamazorite travayer

Seselwa en ogmantasyon lo son saler. Sa nesesite i baze lo sityasyon kot lenflasyon lo pri komodite i tre o.

Mr Speaker, sa nesesite ogmantasyon saler i osi pou mon pou demann lezot kestyon osi enportan tel ki ; eski ogmantasyon saler pou vreman adres tou problem lenflasyon? Ki poursantaz ogmantasyon ki pou posib sa letan ki saler pou ganny ogmante?

Lekel bann sekter ki pou ganny ogmantasyon? EsKi tou sekter pou gannyen? EsKi pa devret annan lezot lapros ou mezir ki devret ganny met an plas, menm letan ki saler i ogmante avek bi pou garanti okenn disparate ant lenflasyon e ogmantasyon saler.

Mr Speaker lo kestyon lo lanplwa Seselwa, eski i annan en *assessment* lo tou Seselwa ki'n *graduate* peye par Leta ou pa zot fanmir, pou vwar kote zot ete. Oli zot nou bann *graduate*? EsKi zot tou zot dan lanplwa? Si non akoz e ki pe ganny fer pou zot ganny en lanplwa?

Lenformasyon anmase ava en fason pou bokou pozisyon travay ganny okipe par Seselwa, ki ozordi pe ganny okipe par etranze.

Mr Speaker lenvestisman sorti an deor Sesel an fas avek nesesite langazman kapital

prive pou ser ten proze mazer ki prezant Sesel bokou defi konman en pei avek resours tre limite. Me alafwa i obli mwan poz sa bann konsern swivan. Sa bann proze mazer ki pou ganny fer anba *PPP* eski tou bann mekaniz in fini met an plas?

EsKi swivan lenvestisman par envestiser etranze anba programm *PPP*, se zot sa bann lenvestiser ki pou administre sa bann proze zot menm. Lo ki baz e ki kondisyon pou sa pou ganny fer?

EsKi sa menm lapros pou ganny aplike avek bann biznesmenn Seselwa ki osi ti ava kontan antre anba sa model *PPP*, me lo en nivo en pe pli ba ?

Lenfrastriktir pou peser Baie Sainte Anne pe bouze. Me mon mesaz se pou asire ki tou lekipman ki pou ganny mete dan sa facilite, i ganny *order ase boner*, pou asire ki ler striktir in fini tou lekipman i la.

Akoz in ganny prozekte ki sa facilite i pou konplete lafen Novanm 2022. Zabitan Baie Sainte Anne pe swete ki tou travay dokimantasyon pe ganny fer pou novo Kordgard avek lespri ki dan Bidze 2023, proze novo Kordgard ava ladan.

Dapre resers ki mon'n fer Lopital Baie Sainte Anne sa novo sistenm *HIS* in fini ganny

enstale. *Internet* osi in ganny konekte e i pe marse.

Mon osi ganny enformen ki *staff* dan seksyon rikord in fini ganny *trained*. Me defi ki annan se konsernan *manpower*. Dan sa konteks i annan nesesite pou Lopital ganny mendev adisyonnel avek bi tou keksoz i ava mars dapre lekspektasyon.

En lot defi ki preokip zabitant Baie Sainte Anne i ganny sa maladi ki nou apel dyabet, i annan en mankman pilil ozordi ler mon pe koze.

Sanmenm sa semenn la ban pasyan in al Lopital pou zot pran zot pilil parey labitid e domaz zot pa'n kapab ganny lakantite ki zot bezwen.

Mon krwar sa i en keksoz ki bezwen ganny revwar, akoz sa bann pasyan i depa lo sa bann latizann.

I annan nesesite pou ki travay lo Zil Eve i ganny akseler-e sirtou prosedir *tender* pou sa bann morso later. Bann dimoun pe esper pou bokou letan. Mon swete ki tre byento sa bann dimoun ava kapab partisipe dan *tender* avek lespri ki sa legzersis i bouze. Dimoun ki pe esper *tender*, in eksprim zot lentere pou zot bouz lo serten lenfastriktir, pou zot kapab konmans zot biznes. Semen Laplenn Olandez i en

semen ki zabitant Praslin pe espere.

Nou rekonnéti ki sa semen i bezwen ganny fer par faz akoz nou annan son grander. Me serten group zabitant in fer sorti zot konsern, vizavi sa premye faz ki alokasyon ti R5milyon. Dapre sa bann zabitant zot pa vwar ki travay in ganny fer ki'n ganny fer pe reflekte sa Bidze.

Mr Speaker mon'n fer li mon devwar pou anmenn en kestyon ki Minis responsab pour Transpor lo Later ava vin donn leksplikasyon lo kantite travay *scope of work* ki ti sipoze ganny fer, an konparezon avek sa ki'n ganny fer.

Konman Manm Elekte pou distrik Baie Sainte Anne, mon tre konsernen avek sa propozisyon pou ogmant *berthing fees* pou bato kargo e pasaze.

Donnen lakantite biznes ki sa bann bato pe fer ozordi, i pa lemoman pou propoz en tel ogmantasyon. I pratikman en posib pou sa bann biznes pey sa sonm ki pe ganny propoze.

Zabitant Praslin i antyerman depa lo sa bann bato kargo pou transport prodwir lo zil. Realite lo zil ozordi i kler ki zabitant Praslin konman konsonmater, pa pe kapab abzorb okenn kou

adisyonnello marsandiz ki zot fer monte lo bato pou lemoman.

Lo tou proze mazer dan distrik, sa proze nouvo lasose pa pe bouz ditou dapre programm.

Zabitan Praslin pe esper sa proze. Mon swete ki tre byento nou ava kapab vvar en pe mouvman lo sa lasose. I kler pou mwan ki sa lasose pou ganny fer par Lotorite Por, me pa dan Bidze Gouvernman.

Mr Speaker wi mon'n gannyen en lofis ki baze dan Ladministrasyon Distrik Baie Saint Anne. Me mon konsern lo sa lofis se ler nou'n fini met tou bann meb, I tro ptipti pou kapab travay dan sa lofis.

A plizer repriz mon'n bezwen servi *meeting room DA* pou mwan kapab fer mon travay e an menm tan vvar bann dimoun enkli bann Anbasader ki vizit nou zil.

A en moman apropriye mon ava fer en konversasyon avek Minis konsernen, pou nou kapab rod en solisyon pou sa.

Pou konklik, mon oule asir zabitan Baie Sainte Anne ki pou lannen 2022 mon pou kontinyen rod sa ki meyer pou Praslin lo tou nivo.

Mon swete ki tou sa bann diferan size ki mon pou anmenn devan Gouvernman en solisyon i ava kapab ganny trouve.

Touzour pou benefisyé zabitan Baie Sainte Anne an partikilye e Praslin an zeneral. Mersi Mr Speaker.

(APPLAUSE)

MR SPEAKER

Mersi Onorab. Prosen entervenan mon apel Onorab Waven William.

HON WAVEN WILLIAM

Mersi Mr Speaker. Mon remersi kreater lesel ek later li menm li ki Bondye Tou Pwisan nou admir son faver e son lagras spesyal lo nou pei. Mersi spesyal i osi al ver tou bann ki'n tonm lo zot zenou toulezour ki entersede pou nou pei. Vreman plis ki zanmen nou bezwen led nou Bondye. Dan Labib i dir zonm pa viv par dipen tousel me viv par tou parol ki sorti dan labous Le Senyer.

Bann stratezi e mezir pran par Gouvernman dilon 2021, in aport fri e i pe kontinyen donn meyer rezulta. Sa ki i annan konnesans e onnet dan sa pei, pa pou kapab demanti sa laverite. Premye diskour sa lazournen in montre nou lekel ki anvi Seselwa pa trouv sa realite Mr Speaker.

Parol i dir mon kapab trenn bef obor delo, me mon pa kapab fors li bwar delo. Si

serten i deliberaman pa vwar kote sa nouvo Gouvernman pe ale, zwe pa vwar direksyon, kontinyen reste prizonnyen sa lespri e en latitud kaye Mr Speaker.

Karavann pou ale e lisyen pou kontinyen abwaye. Sa pa pou anpes sa travay determinen pou aranz sa kales kase. Si ou senser e anvi travay ek nou, vin ek sizesyon alternativ ki pozitiv ki pou fer pei bouz devan, Seselwa i ava ziz-e. Si ou pe vin zis konplent e en fardo pou trennen nou pou kit ou ater frankil. Sa pa viktimizasyon sa, i lasazes e pridans Mr Speaker.

Mon sezi sa loportinite ankor enn fwa pou remersi senserman tou bann Seselwa dan en fason ou en lot dan sekter piblik e prive, ki'n reste solider lite, eskente menm ek difikilte pou ede anmenn sa transformasyon dan ekonomi pei lo semen soutenabilite.

Mr Speaker mon felisit Prezidan ek son lekip pou reste konekte ek son pep pou ekoute, tande e konpran. Mersi pou reste atantiv pou analize e pou reazir lo en baz priyorite. Nou apresye zefor ki serten Minister pe fer atraver bann aksyon pozitiv dan servis piblik e proze, ki pou ranforsi ankor nou rezilyans.

Rezulta i prometan dilon sa 15 mwan apre Eleksyon zeneral Oktob 2020. Mr Speaker mon demande si sa lekip ti la depi 43an pase kot nou ti pou ete, ti pou'n fini vin sa pti *Singapore* ki nou tou nou pe aspire.

(APPLAUSE)

HON WAVEN WILLIAM

Mr Speaker lo sa size vin pli efikas i pou akseler sa transformasyon, i pou enportan ki nouvo ladministrasyon apre sa 15 mwan i reste pli vizilan e swivre tou bann mayon son lasenn servis piblik. I enportan ki apre ki Prezidan in koze, ki bann Minis zot pran sa o serye.

Zot pou bezwen asire ki bann mayon rouye pa kontinyen kree lanpayaz. Prezidan pa manti ler i dir ki serten ankor pe gard lipye lo fren e lanmen lo fren amen.

Mr Speaker me zis koze li menm pa pou abouti dan naryen. Nou bezwen vwar aksyon. Sa pep pe esper aksyon. Sa pep i fristre i annan rezon ler i dir *a autre voie* ki sanzman pa'n anmenn soulazman lo son soufrans.

Letan serten zofisyen endividylez ouswa enterministeryel zot fer son lavi difisil ek en sel bi pou bann ki

pe swivre e konnen pou fer pep fristre e revolte. Bomaten Mr Speaker dan en fason entelizaman enterprete, nou'n ganny dir ki travayer pou desann lo semen.

Mr Speaker sa kalite pratik e latitud fodre nou pil lo la. E nou pou pile ziska ler i ganny tande e sanze.

(APPLAUSE)

HON WAVEN WILLIAM

Mr Speaker dan 15 mwan serten endividé pa ankor reoriyant son lanvi transformasyon personnel, pou ansanm anmenn sa diferans dan servis *delivery*, be konbyen letan i pou pran? Nou manda i 5an. Dan lespri efikasite napa letan pou *trial and error* la.

Nou espekte presizyon baze lo leksperyans e konnesans. Serten pe anbet lekel? An tou leka pa mwan. Serten Minister pou bezwen retir latet dan disab, si vreman nou oule anmenn serten degré transformasyon dan servis piblik.

Fodre zot elimin sa bann kalite mannyer e fason fer. E se lo sa bann latitud ki nou bezwen kontinyen pil lo la Mr Speaker.

(APPLAUSE)

HON WAVEN WILLIAM

Pou kriy viktimizasyon e dir ki drwa pe ganny vyole, be sa 43an ki serten kous popilasyon zot in sibir vyolasyon zot drwa e ganny viktimize. Ekrir zot ta let si zot anvi! Nou target set en servis efikas pou pep Seselwa.

Mr Speaker 15 mwan ozordi ou a krwar serten in confortab e pe vin pli odasye, pou komet sa bann krim organize dan servis piblik. Aksyon sabotaz, aksyon evant tou sord leskiz e baryer teknik.

Par egzanp Mr Speaker, i pa rezonnab ler ou konnen ki en *case carer* i merite, nou retard prose laprouvasyon akoz prosedir entern lalyans Gouvernman i pas de mwan i koule.

E sa ki bezwen *carer* e sa ki ti sipoze vin *carer* i sibir konplikasyon prosesis laprouvasyon. Eski sa lefikasite Mr Speaker? Eski sa *common sense*? Me si i merite akoz pa donn li e lazans Gouvernman pli tar zot ava koz avek kanmarad. Larg lanmen Seselwa silvouple !

Mr Speaker sa i en ka. I annan plizyer legzanp kot efikasite akoz mank senplisite sa transformasyon pou ganny retarde, si nouveau ladministrasyon pa retir sa

bann lanpayaz parmi son bann lazans. Ki fer nou demande eski telefonn, eski *email*, eski *WhatsApp* ki fason komunikasyon avanse ozordi, zot lo konze, zot lo *off*, lo zot konze Dokter. Alor oli leskiz? Apre tou eski bann Lazans Gouvernman zot en *one man show*, ouswa dan sa Minister i annan plizyer bann zofisyé ki kapab ed kanmarad pou delivre sa servis?

I pa normal e i rezonnab pou en endividé ki pe esper en *loan* ki 6 fwa an mwens ki son sonm evalye pou son propriete, pou esper plis ki lan pou debloke.

Par egzanp en *loan* en milyon ler valer propriete i 6 milyon, bann demann ki pa rezonnab e pa tro relevan i pe met retar sa endividé. Ler i pe rod son rezon i ganny pini atraver plis novo demann teknik.

Mr Speaker lekel ki rann sa endividé valer son letan gate sirtou dan sa moman en lekonomi dinamik kot en dimoun i bezwen bouze? Letan pa esper personn. Nou rekonnet, nou bezwen kree letan. Me ler ou kree sa letan e serten dan pozisyon fasilitater zot trenn lipye, i fer ou araze. Ler ou tann serten koze *the Ease of doing business* ki fodre

amelyore. La se lefikasite ki an kestyon Mr Speaker. I moralman pa normal, pou demann en manman ek de zanfan ki pe reste dan en lakaz *emergency*, ki pa ankor ganny en lot mwayen pou li reste menm si in siny en lagreman 2an, pou li ganny en let pou demann li pou sorti Mr Speaker.

Menm si i pe pey R2000 par mwan e R500 pou en *Housing Scheme* ou pe demann li pou sorti. Mr Speaker i pa akseptab.

Kan Lotorite lakaz e later i byen konnen sityasyon lozman difisil dan pei. Mr Speaker se sa bann kalite latitud e fason fer ki mon repeate ki fodre nou kontinyen pil lo la e fer sir ki i sanze.

Mr Speaker letan bann vagabon i kas lakaz sa vye dimoun, bat li vol son larzan sekirite. Letan sa koup viziter dan son lasanm i ganny menase ek gran koute son larzan, son propriete personnel i ganny vole. Letan sa touris ki vin lo lans Grand Anse pou apresye nou lans e lanmer i ganny vole.

Letan sa fermye in plante. E planifye son reveni lo son prodwir ki i pou gannyen letan i vann, vagabon i vole e *middlemen* i aste. Mr Speaker

se sa bann latitud dan pei ki nou bezwen pil lo la e fer sir i sanze!

Eski sa bann aksyon i devret ganny tolere, ki pe ganny fer par bann *repeated offenders* Mr Speaker. Repons dan Bidze nou ganny dir pa ankor ganny remed pou zot.

Seselwa i ganny dir pa pran Lalwa dan son prop lanmen. Nou pe lager lo kondisyon bann rimann. Be ki lager an plis Sesel pe anmennen pou defann bann viktim Seselwa ki ganny afekte? Ki pe travay onnet pe pey zot *tax*? Oli zot drwa e oli rekour pou bann viktim?

Mon kontan ki Prezidan in koz lo la e mon espere ki sa konversasyon ava ganny elarzir pou annan en solisyon. Mon salye zefor ki nou bann zomm ek fanm dan liniform pe fer. Zot tousel sa sipor kominote ki pe espekte zot fer tou keksoz Mr Speaker i pa pou en latas fasil.

Fodore annan korperasyon. Fodore annan konsiltasyon parmi bann Lazans pou en rezulta pli apropriye.

Mr Speaker sa mo Lotorite Distrik ki dan lespri sitwayen i Manm Elekte e Ladministrasyon Distrik. Dir i gou e konfortab pou ekoute. Mon demande ki bann Lazans Gouvernman pa kree diskord dan sa pozisyon anba parasol

Lotorite Distrik. Akoz ki *email*, kout telefonn pa ankor ganny fer e avoye zot pe ganny fer e avoye zis kot lofis DA, me pa kot lofis MNA *simultaneously*? Si sa DA ouswa sa MNA i nouveau lenformasyon pa ganny pase a ler e a tan, pou *deal* ek konsern dimoun. Enn ki la pou *donkey years* i pou annan plis konnesans e leksperyans dan sa distrik pou li kapab *deal* avek sityasyon.

Mr Speaker mon demande ki sa i ganny regard ladan, ki anmenn mon lo sa size kalite rekonpans ki nou pe donn sa vye travayer ek en mize leksperyans, ek en novis ki annan en bagaz sertifika, me napa ase konesans ek leksperyans.

Food for thought Mr Speaker, letan nou pe travay lo sa bann kad saler ki nou pou anmenn devan Lasamble. Mon demande ki konsiderasyon diskisyon i ganny fer pou amelyor bann mankman Mr Speaker.

Mon apresye ki Prezidan in endike ki serten desizyon ki pou afekte pep, pou bezwen ganny partisipasyon pep pou donn sa pli meyer direksyon.

Mon dakor ki sa lannen pou bezwen angaz pandan plizyer konversasyon ki neseser e merite, pou ankouraz sa limite

ver desizyon e fason fer pou reste soutenab.

Mr Speaker size lord ek lape dan kominote, i en size ki bezwen ganny koz lo la. Size poursantaz kontribisyon dan Fon Pansyon e laz retret pou bezwen ganny diskit lo la. Nouvo Polisi lakaz osi pou bezwen ek later ganny diskit lo la. Size plan devlopman distrik osi ki bokou distrik pe pran linisyativ, i en lot size ki nou bezwen konmans koz lo la.

Mr Speaker Lotorite Distrik Grand Anse Mahe in konmans pran serten linisyativ. Nou anvi bouze. Nou santi ki tou pouvwar I ankor dan lanmen Gouvernman santral e salye en travay pros e pli souvan sirtou ek distrik ki anvi bouze i bezwen ganny fer pli souvan.

Mr Speaker nou kont lo bann Minis pou konpran nou e pou fasilit gidans direksyon. Mon'n toultan dir ki bokou solisyon i dan distrik. Sa i en realite Mr Speaker. E ou ava dakor avek mon. Mr Speaker mon santi ki en nenport brans Egzekitiv ki pe gouvernen bokou fwa i vwar li tousel, pou plizyer rezon dilon son manda.

Dan en demokrasi i annan plizyer brans gouvernans ek groupman ki reprezent sitwayen lo plizyer nivo.

Wi nou bezwen ki enn a lot nou egzers sa eleman *checks and balances* lo performans Egzekitif. Dan konteks Sesel i pa en leksepsyon.

Dan moman difisil e dan moman botan, i enportan ki tou sa bann lebra zot egzers serten degré solidarité dan edik e enform pep lo realite. Ki nou pa les serten azanda personnel pas par lao tou.

Mr Speaker nou bezwen sa bann langazman. E la Mr Speaker mon anvi propoze ki dan sa bann lespri konsiltasyon ki en komite i ganny formen - en komite pou kapab annan bann konversasyon ki annan tou bann reprezant bann *stakeholder* parey sosyete civil, Zidisyer, Lasanble, Legzekitiv, pou nou kapab regard sa bann size nasyonal, an menm tan ki nou pe demann pep pou diskit lo la.

Mr Speaker i neseser konpran ki plizyer desizyon ki bezwen ganny pran ozordi. Ansyen Gouvernman pa oze azir lo la. Ki prezan ki nou tou annan la nou konnen. Akoz nou tou nou pe ganny afekte dan diferan doz enfizyon avek defi ekonomik. I vreman pridan e sarz pou pep Seselwa reflesir lo la.

Reflesir lo la analize demann plis kestyion si fodre,

rod sipor pou konpran sa realite. Pou byen enformen e pou azir an solidarite san konpromi lo sa size soutenabilite.

Mr Speaker mon rekonnnet e aksepte ki nou annan bokou pou remersi nou Bondye, akoz si pa ti li si pa ti atraver son lagras e faver nou fouti Mr Speaker.

Letan Bondye i dan nou kote e i dir wi lekel ki kapab lager ek son volonte e dir non? Mr Speaker swa i devan nou pou solider ansanm pou delivre ouswa pou *boycott*.

Reisit target 2022 i depan antyerman lo nou Seselwa. Dan sekter piblik e prive. I reste avek nou dan bann diferan brans gouvernans e lezot sekter kle, pou asire ki resours imen e larzan zot ganny byen zere pou realiz sa bann target.

Gouvernman pe angaze dan sa bann legzersis pou revizyon kad saler travayer dan sekter piblik. De lot kote travayer pe aspire pou en Trezyenm Mwan Saler osi. Mr Speaker i bon repete ki se lo siplis ki okenn rekonpans bezwen sorti.

Si ou pe fer defisit setadir ou pe fer ou pa pe fer profi, i pa pridan ouswa sarz pou donn rekonpans gos a drwat. Akoz i

pa soutenab pou depans larzan ki ou napa. Leksperyans 43an in fer novo Gouvernman pridan ek resours Leta. Sirtou dan konteks panse global ver soutenabilite Mr Speaker.

Pou soutenabilite lekonomi osi serten rekonpans apard saler bezwen baze lo merit e zefor travay dir.

En mazorite travayer Seselwa zot travay dir e zot merit ganny rekonpanse. Sa ki pe fye ouswa kale pa kapab ganny menm tretman ler evalyasyon performans onnet i ganny fer.

Mr Speaker sa de mo lo merit, lo merit mon repete. I tre enportan ki travayer Seselwa i ganny li byen dan son vre konteks. Si non serten nou pou kontinyen annan en fo espektasyon an ver Lotorite ouswa anplwayer dan sekter piblik ouswa prive.

E vitman tir konklizyon ki zot pa pe ganny en *fair deal*.

M Speaker mon pe koz ek ou dan lakour, ou dan kominote, ou sa travayer dan sekter prive e servis piblik. Mon pe koz ek ou dan sa groupman sosyete sivil, group medya parmi lezot ,byen koze i fer byen konpran. Mal enterpret keksoz ouswa tir li dan son vre konteks ki senm konfizyon, kree dout e

finalman kree konfli ant ladministrasyon avek travayer.

De lot kote Mr Speaker, anplwayer ziz byen. Valorize e ankouraz ou tim pou reste performan, pa abize me praktik *fairness*, annou senplifye fason panse e fer keksoz, pa met plis travay dan travay ki pa neseser Mr Speaker.

Mr Speaker mon pe met lanfaz lo sa size. En Gouvernman efikas pou bezwen revwar serten son bann prosedir pou fasilit servis. Si non desizyon e aksyon vit pou kontinyen ganny retarde dan sa lanpayaz prosedir.

Akoz nou problem ozordi dan sekter piblik se sa. Sa novo Gouvernman bezwen etabli en novo lapros konpare avek sa ansyen Gouvernman kot sa *result base management* bezwen *kick in* vitman Mr Speaker pou kapab mezire.

I pou neseser osi evalye serten travay ki serten zofisyen Gouvernman pe fer. Evalye kote letan pe gaspiye. Kot ti kapab koupe ouswa serten responsabilite transfer ek en lot ki pli lib pou pran bann desizyon vitman.

Mon ava donn enn de legzanp Mr Speaker. Si en zofisyen ki sipoze pran desizyon i pri dan *meeting* laplipar ditan e vizit, *file* i akimile lo son latab.

Ouswa i pa ganny sans pou egzamin bann *mail* ki antre. Sa i akimile i met retar bann kliyan ki pe espere. Mon pa pe dir ki tou lazans I koumsa.

Me plizer pe fonksyonn dan en kriz ladministrasyon Mr Speaker. Pourtan teknolozi komunikasyon pe kontinyen devlope e plis *training* pe ganny donnen. Efikasite bezwen mars ek standard an loperasyon pou gard son stati si efikasite pour serten se *kill time* dan biro. Vini 8er ler PS en Minis zot dan *meeting*, ouswa zot lo *site* serten i swazir pou ale vini, me solman pa pe vreman fer otan.

Se atraver san etabli target lazournen, lasemann e lemwan ki pou determin vre lefikasite e zizman lo performans pou siport merit ou rekonpans.

Mr Speaker ou demande letan ou e esper dan distrik. si sa i egziste dan plizer lazans Gouvernman. Ouswa serten i ankor pe reazir *business as usual*. Serten bomaten in dir ki Prezidan konmsi i pe dir tou Seselwa pa travay.

Menm dimoun ki annan diplonm se sa menm dimoun ki annan diplonm dan evante tir keksoz dan konteks e spekile pou esey ganny lafeksyon. Bezwen anbelir sa ki byen. Rezet sa ki pa bon. E aplik

nouvo stratezi pou diferansye nou performans nouveau ladministrasyon avek ansyen ladministrasyon.

Kritik pa vedir ganny vwar konman travay zis Lopozisyon, me devret ganny ankouraze e ganny fer dan en konteks realite e konstriktiv ver progre benefis nasyonal. Kritik bezwen swivre ek en lot alternativ propoze fer konparezon lavantaz e benefis.

Parey Onorab *Leader Zafer Gouvernman* i toultan dir, napa personn ki posed tou larepons ouswa annan kontrol lo tou lide.

Sa ki annan limilite pou konpran e aksepte e pou kontinyen aprann. Sa ki konn tou pou sibir le konsekans son linyorans. Pep i apresye zefor ki pe ganny fer pou redres lekonomi par bann diferan bann mezir, par pran menm si i difisil.

Pep in apresye rezulta lafen 2021. Ou bezwen konmans get dan problem spesifik ki pe afekte nou sitwayen kot i kapab e merite ganny fer. Nivo kout lavi e lenflasyon pe limit plizyer fanmir pou viv en lavi dan dinyite saler 6000 ouswa R8000 ozordi ler i tenir kont depans total en fanmir par mwan i demann fer keksoz pou soulaz zot.

Bann Lazans a labaz dan distrik bezwen met zefor ansanm pou evalye aplik pli meyer konsey ki posib pou *deal* ek souris problem.

Serten Lazans Gouvernman zot bezwen revwar zot lapros. Akoz si nou pe dir travay ansam ki mannyer lezot pou ede ler nou dir ansanm epi kontinyen travay tousel dan nou pti rwayonm? I pa mars koumsa Mr Speaker.

Lefikasite pa pou fer progre dan sa fason bezwen aret kasyet par deryer lipokrizi. En legzanp se rezulta nasyonal pa bon. Si rezulta Ledikasyon nasyonal pa bon dir pa bon e aret donn leskiz silvouple.

Annou ozordi menm pran desizyon pou sanz stratezi aret koze e azir. Si zot pa'n kapab attend lobzektif par lekol, dir ki sanzman stratezi zot pe vin avek ! Ou sa ansenyan dan laklas e ou dan Departman skoler dan Minister. Sa i aplik pou mwan, pou nou sa i apli pou mwan pou nou e pou nou tou dan nenport landrwa ki nou ete pe travay. Annou revwar e sanz lapros si napa rannman.

Mr Speaker mon kapab donn ou plizyer legzanp. Parey met nouvo bin dan distrik dan milye lannen. Pran linisyativ pou pran distrik prop kot lezot Lazans i enplike, me solman zot

retard ou letan ou pe pran linisyativ.

E la mon lans en lapel solannel ek nou bann frer ek ser Seselwa ki vizit nou zoli lans dan distrik Grand Anse Mahe, ki ranpli avek potansyel. Ler zot vini silvouple pa zet zot bann salte an bonnavini. I annan bin servi zot byen. Mon remersi zot davans dan sa lespri Sesel pou tou son zanfan.

Mr Speaker i evidan ki sityasyon ant *La Russie* e *Ukraine* pou annan en lefe lo nou performans. I kler parey Prezidan in dir ki serten logmantasyon saler ki pou soulaz en pe lefe lenflasyon e logmantasyon dan kout lavi.

I kapab pa le meyer pozisyon. Me i pa dan en direksyon ki sa pep - se sa dan direksyon ki pep pe regarde. Si nou pe dir ekout sa pep e konpran son soufrans e alor zot oule nou pa fer nanryen parey pou 43an plizyer desizyon enportan ti merit ganny pran ki pa'n ganny fer ?

Ki ozordi bezwen ganny pran pou soutenabilite Mr Speaker. Sa mo soutenabilite bezwen rezonnen dan kwen Sesel Mr Speaker. Mon demande ki Gouvernman dan sa revizyon saler I pa rekompans tou dimoun en sel kou. Sirtou avek sityasyon ki prezant devan

nou. Me rekompans bann travayer ki pe ganny mwens ki R16,000 Mr Speaker. Pli tar nou ava get dan lezot kad saler si sityasyon i deteryore ouswa amelyore.

Pou soutenabilite tou kart lo sa size bezwen ganny met ater parey Fon Pansyon. Lot alternativ se donn en logmantasyon total. Me lans en diskisyon lo konsiderasyon pou pey serten servis ouswa ogmant pri serten servis. Mr Speaker nou bezwen koz lo sa bann size konman en pti pei Sesel.

Mr Speaker bezwen pe angaz pep dan sa kalite konversasyon pou regard bann opsyon. Kot Gouvernman pa vin le sel parti ki pou pran desizyon fonde lo on prop analiz. I pa soutenab letan ou fer li koumsa.

i saler debaz i ganny revwar pou reflekte realite ozordi par fer monte peyman par erdtan travay. Ki sa Lasanble i ganny prezante ek sa plan revizyon saler ver Zen pou diskite e konpran son zistikasyon dan sityasyon ekonomik ki nou ladan.

Distrik i swete ki Departman Lanvironnman e LWMA zot reflesir lo la. Sirtou sa size netwayaz lanmar e larivyer.

Larivyer i konmans en landrwa e i fini dan en lot landrwa Mr Speaker. Kontra i ganny donnen zis pou netway dan plato. Akoz sa kontra pa ganny donnen pou kouver netwayaz larivyer an antye, pou annan en sistem kot netway en bout ou desann. E ler ou bit anba ou remont ankor.

Mr Speaker nou larivyer i ti pou prop. Mr Speaker, kwa ki difisil e konplike dan sa fason vwar keksoz e fason fer? Akoz sizesyon sorti dan distrik i pa ganny konsidere?

Mr Speaker, sa fason ti pou benefisyab pou pei an plis. Zofisye ti pou konn son teren akoz bann zenn ozordi pa konnen vreman teren dan lafore Mr Speaker. E sa ti pou permet zot kapab konpran ki bor larivyer pe ganny polye. Ki bor salte pe ganny zete. Ki bor i annan bann ankonbreman ki bor i demann fer *desilting* Mr Speaker nou ti pou ganny en travay dan larivyer ki konplet.

Lot legzanp ki mon pou donnen, se bann poto ki siport bann laliny elektrik, telefonn e televizyon.

Mr Speaker ozordi I en dezord sa dan distrik. Menm si i annan ki kabannen bann dimoun ki ti sipoze rezourd sa bann problem, zot pas

toulezour Mr Speaker. Me nanryen pa ganny fer.

Pa fasil pou konnen ozordi lekel sa bann lazans ki okip poto, pou fer sir ki bann servis zot fer zot travay byen. Bokou lavans pe fye lo raport sorti kot Administrasyon Distrik. Si Prezidan pa dir, si MNA pa koz lo la Mr Speaker naryen pa ganny fer.

Mr Speaker pou konklir, mon ti a kontan remersi tou mon bann koleg Manm Lasanble ki dan lannen 2021 nou'n solider kanmarad pou nou kapab fer sa travay, e permet Gouvernman pran sa bann mezir, pran desizyon pou amelyor lekonomi Sesel.

Mon anvi remersye Ladministrasyon distrik Grand Anse Mahe e son lekip e osi mon *constituency clerk* Ms Maria Boniface. E tou nou bann lekip dan distrik, bann komite ki'n solider avek mon pou nou kapab fer en travay.

Mr Speaker mon osi anvi remersi ou Mr Speaker pou latolerans e pou osi diriz nou dan en fason ki byen, pou nou kapab fer nou travay an menm tan pou nou kapab edik sa pep deor.

Mr Speaker finalman swa i reste avek pep Seselwa pou nou deside si nou pou bos

ansanm ouswa nou pou bis sakenn son kote.

Mr Speaker ler ou pe azir dan en fason pridan, ler ou pe azir dan en fason sarz i pli meyer Mr Speaker ki nou bos dan menm kote.

Mr Speaker pou terminen menm, mon remersi tou bann endividé ki pe travay a kote mon an sodalite. Ki Bondye i kontinyen beni nou pei sak fanmir Seselwa, nou dirizan ek lespri lasazes e pridans dan zot travay.

Finalman ki tou nou rod gidans Bondye pou en lespri pou fer bon lanaliz e konprenezon pou ini dan sa demars pou sa touzour meyer lavi Sesel.

Tenon kont ki gard latet dan disab pa pou ed nou. Annou pa anbet nou lekor e fer krwar. Annou reste konnekte e enformen. Annou demann kestyón. Annou rod leklersisman kot i fodre. Kontrol nou spekilasyon me pa evant problem.

Finalman konpran ou rol e responsabilite ler ou annan en par ladan. Annou reste pozitiv pou nou zwenn nou bann target 2022. Mersi Mr Speaker.

(APPLAUSE)

MR SPEAKER

Mersi Onorab William. Nou ava pran en poz la. Nou ava repran travay 4er.

(BREAK)

MR DEPUTY SPEAKER

Bonn apre midi tou Manm Onorab e tou dimoun ki pe swiv travay Lasanble Nasional pou sa apre Midi. Nou pou kontinyen avek bann repons lo Leta Lanasyon e mon ava kree Onorab Kelly Samynadin.

HON KELLY SAMYNADIN

Mersi Mr Speaker. Bonn apre midi Mr Speaker, mon bann koleg Onorab, zabitán Au Cap e tou dimoun a lekout.

Mr Speaker, le 22, dezyenm mwan 2022, Prezidan Wavel Ramkalawan ti mark en renouvelman lespwar anver lepep Seselwa. Wi Mr Prezidan parey in dir "i fasil pou oubliy Oktob 2020, me i pli enportan pou gard li devan nou" e pou sa ou annan parfetman rezon. En kantite in ganny akonplir anba sa nouvo ladministrasyon malgre ki i reste ankor en kantite ankor pou nou akonplir.

Seselwa in met tou konfyans dan ou, akoz se ou sa ki ti sa kandida parfe pou kapab redres sa bato dan bon direksyon.

Mr Speaker, diskour Leta Lanasyon 2022, i enn ranpli avek pozitivite akoz i pe rekapitil tou bann lakonplisman nou Gouvernman depi son eleksyon e an menm tan i pe re-affirm e ranfors son langazman anver lepep Seselwa.

Gran filozof franse, Auguste Comte, sa enn ki ti entrodwir doktrin pozitivizm ti dir "*l'amour pour principe, l'ordre pour base, et le progrès pour but*". Mr Speaker, letan mon lir sa i fer mwan realize ki se sa ki nou Gouvernman pe fer. Letan mon get tou sa ki'n ganny fer dan sa kourt lespas letan, mon konvenki ki nou pe al dan direksyon progre.

Finalman nou'n ganny nou en Gouvernman ki serye. Larout i ankor long, i ankor annan bokou laroul pou sirmonte, me avek gidans Gran Met e limite Nasyonal parmi sa pep, napa okenn lobstak ki nou pa pour sirmonte.

Mr Speaker, manifesto *LDS* i deklare ki anba *leadership* en Gouvernman *LDS* nou anvi donn sak nou sitwayen en garanti ki zot annan en plas dan nou pei. Sesel i nou pei e nou anvi ki zot gard li an posesyon. Se sa ki nou pe vwar dousman, dousman, an mezir ki nou pei i

progrese. Sak Seselwa pe ganny sa sans apartenans dan son prop pei, kontrerman a sa ki Lopozisyon pe fer nou krwar. Mon konnen ki pa tou keksoz ki parfe, me zonn pa parfe.

Sa ki mon kapab asire se ki sa Gouvernman pe travay pour byennet son pep. Malgre ki i annan desizyon ki ganny pran ki pa nou tou ki alez avek, me sa ki mon kapab garanti se ki napa en desizyon ki sa Gouvernman i pran ki Lepep Seselwa pa ganny mete an tout priyrite.

Mon bann frer e ser Seselwa, apre sa 16 mwan depi ki Gouvernman *LDS* in pran labar, malgre bokou difikilte, sa lekip ki dan Egzekitiv pe fer en travay ekselan e mon napa okenn doutans ki sa bato pou reisi ariv abor, byensir anba gidans nou Prezidan.

Malgre ki *COVID* in esey met en fren avek plan Gouvernman pou relans nou lekonomi, bann sif i montre lekontrer. Nou lendistri touristik in repran avek en lelan ekstraordiner.

Mr Speaker, zis 1an pase, nou bann lans ti vid, tris e dezerte. Me ozordi, i en plezir pou mwan vvar nou bann lans, pli spesifikman Au Cap, enn parmi nou bann pli zoli lans

dan Sesel, reganny frekante parey avan.

Nou lavil, Victoria, nou bann lotel, *guest house*, sit datraksyon, restoran, *casinos* ek bar ti'n perdi konesans ki savedir resewwar kliyan ek viziter. Get nou ozordi, konman en pti Nasyon ki'n ini e solider ansanm pandan sa moman pandemik difisil, nou pe met *COVID* anba nou lipye e tre byento, Bondye pitye, nou pou dir li orevwar.

Mr Speaker, mon pa pou kapab koz lo *COVID* san dir de pti mo rekonesans anver tou bann travayer Lasante e osi bann ki dan bann servis esansyel. Nou konnen ki zot louvraz pa fasil, zot lavi i a risk osi byen ki sa ki pour zot pros, me zot rezilyans e lanmour pou zot profesyon i depas tou lafreyer e pou sa, mon lev mon sapo anver zot.

Mon pe osi felisit tou bann ki'n pran zot responsabilite pou pran tou zot doz vaksen, akoz zot konnen ki an fezan sa zot pe protez zot lekor osi ki sa ki pou zot konpatriyot e zot pe osi redwir lenpak ki *COVID* i kapab annan lo zot lasante e menm evit lanmor.

Bann ki pa ankor fer zot devwar pou pran zot vaksen ou zot *booster dose*, mon pe demann zot pou silvouple fer li.

Leokri deor se "kan ki Gouvernman pou large ?" Mon totalman dakor avek sa, me si nou annan en kous popilasyon ki pa pe pare pou korpore avek bann mezir e regilasyon an plas, e ki pe azir dan en fason irresponsab, pran an kont ki se sa ki pou toultan pe met nou an retar.

Par kont Mr Speaker, mon rekonforte pou obzerve ki lakantite bann ka *COVID* in desann konsiderableman, sorti 5049 le 17 zanvye pou ariv 540 le 23 fevriye 2022.

Mr Speaker, dan sa lespas 2 mwan, depi ki 2022 in konmanse, nivo krim ek aksidan in desot ekspektasyon. Nou pe nepli annan lanmour e konpasyon fraternel anver enn a lot. Nou lazenes pe perdi lavi an foupanmal. Mon pou profite pou lans en lapel avek nou bann zenn e tou dimoun an zeneral lavi i enn menm, tou aksyon i annan son reaksyon.

Avan ler ou mont lo sa bisiklet, asire ki son fren i bon. Avan ler ou mont lo ou *scooter*, mazinen ki ou pe roul lo grannrout. Avan ou *start* ou transpor, asire ki ou transpor i annord, ou met ou *seat belt*, ou pa dray anba lenfliyans. E avan ou lev en kouto mazinen ki ou pe menas lavi en dimoun e ki ou pou al fini dan prizon.

Mr Speaker, i vreman ankourazan pour mwan pour vwar lakantite zenn ki ozordi i dan en lanplwa ki stab. Malgre leokri abolisyon *URS* boner lannen pase, ozordi nou fyier pour vwar nou lazenes pe epanouir e devlop son lekspertiz dan en lanplwa ki stab, kot zot osi zot pe kontribye dan devlopman ekonomik zot pei. I menm annan ki pe envestir dan en biznes e pe byen progrese.

Mersi a nou Gouvernman pour met konfyans dan nou lazenes, e osi pou kree bann louvertir pou ki zot osi zot kapab epanouir dan en kad profesyonnel.

I osi enportan pou rekonnet travay ki nou, bann *MNAs* pe fer, dan sa demars pour ed nou bann sitwayen dan nou distrik pou ganny en lanplwa. Mon konnen ki i pa toultan fasil pou asir en lanplwa pour nou bann dimoun. Me mon rekonnet sa zefor ki nou pe fer, pour ofer zot en siper ekstra pou zot trouv enn ki dan zot kapasite e kalifikasyon.

Mr Speaker, mon osi rekonnet sa partenarya ki nou bann Lotorite Distrik i annan avek Minister Lanplwa. Mersi pou kontinyelman fer provizyon lalis lanplwa tou le semenn,

pou ki nou bann dimoun i kapab ganny akse avek. Loportinite lanplwa i la a dispozisyon tou dimoun, e mon pe demann zot pour kontinyen konsilte bann diferan opsyon ki a zot laporte.

Mr Speaker, konsekans *COVID* pa'n neseserman dezoryant letid nou bann etidyan parey nou ti pe antisipe an 2021. Laprev i la e sa i atraver rezulta *IGCSE* ek *DELF* ki nou bann etidyan fek resevwar.

Bann rezulta i vreman ankourazan e la mon pou profite pou mwan felisit ankor enn fwa Manmzel Anorah Renaud sorti dan distrik, Au Cap ki'n reisi sorti avek en rezulta vreman ekselan 7 A*. En rezulta ki koz pour li menm, en rezulta ki tre ankourazan, ki anmenn lespwar e ki devret ganny servi konman en sours lenspirasyon pour nou bann lezot etidyan ki pe monte.

Felisitasyon osi pou tou lezot etidyan ki'n sorti avek bann bon rezulta Wi Mr Speaker, parey nou Prezidan in dir "nou bann zenn in prouve ki zot osi zot anvi ede dan rekonstriksyon nou pei e ki zot osi zot form par dan sa pei".

Malgre ki kontak fizik avek zot bann ansennyan i vreman limite, mon rekonforte

pou vvar ki bokou nou bann etidyan pe pran zot letid a ker, e pe profite lo zot menm pou etidye, fer resers pou ki zot kapab obtenir bann bon rezulta.

Mon'n osi konstate ki bann paran pe osi zwe en rol tre efikas par zwe rol ansenyan kot lakour. E asire ki nou bann etidyan pe servi byen zot letan dan lakour pou etidye. Avek lagras Bondye, tre byento, orer nou bann lekol ava retourn normal e nou bann etidyan ava kapab repran zot letid dan laklas parey avan.

Bi nou Gouvernman se pou travay pour obtenir en sistenm ledikasyon de ot standar, ki pour an retour rann nou bann zenn bann partisipan konpetan e bann sitwayen responsab dan en sistenm ekonomik modern, e mon konvenki ki san dout nou pou reisi atenn sa lobzektif.

Mersi a nou bann ansennyen, *Management* bann Lekol e bann lezot *partner* ki travay tre pre avek nou bann etidyan, pou zot rezilyans pandan sa moman pandemik. Nou konnen ki zot osi zot parkour pa enn ki fasil, zot lasante i a risk pandan ki zot pe asire ki *curriculum* i ganny ansennyen, pou ki nou bann etidyan pa perdi.

I annan plis preparasyon ki labitid, pou garanti ki zot annan ase travay skoler dan lakour. E byensir sa travay an plis pour asire ki tou bann mezir sanniter ki rekomande par Minister Lasante i ganny mentenir dan nou bann letablisman skoler. Mon anvi fer zot konnen ki nou rekonnnet zot zefor dan sa travay tre nob ki zot pe fer.

Mr Speaker, Gouvernman *LDS* i reste ferm lo son langazman, pou ki bann lafors ki promouvwar sekirite dan pei i toultan ekipe pou prezerv nou demokrasi, asir son stabilité e sekirite tou son teritwar e son pep ki viv ladan.

Nou Gouvernman i osi mandate pour konstrir en lafors lapolis ki ganny respekte e annan konfyans tou dimoun, gide par profesyonnalizm a tou nivo. I fer lapenn pou tande ki serten nou bann zofisyé dan liniform pe azir dan fason ki pa approprié, ki swa kont manm piblik oubyen kont zot bann koleg ou staff.

Se pou sa rezon ki mon pou kondann sa bann tel lofans e mon priye ki aksyon approprié i ganny pran kont zot.

I malere ki zis en minorité ki pe sey denigre sa liniform vreman nob Mr Speaker. E mon rekonnnet ki en kantite nou

bann zofisyè i travay lebra kase e pe fer zot travay *according to the books* pou asire ki *the rule of law* i ganny met an fors. Mersi Lafors Lapolis Sesel pou kontinyelman travay dir pour asir sekirite nou pep.

Mon pou osi profite pou remersye nou bann zofisyè dan Stasyon Lapolis Anse Aux Pins ek Anse Royale, pou sa travay kordinen ki zot fer dan distrik Au Cap.

Menm si nou napa en Stasyon Lapolis malgre ki nou popilasyon i tre gran, me mon kapab dir ki in annan en gran amelyorasyon lo nivo lentervansyon kan bann lensidan i ganny rapporte.

Mon osi rekonnet ki zot in osi entansifye patrol dan nou bann sou-distrik, malgre ki resours i limite e pou sa mon remersi zot enfiniman.

Kontinyen sa bon travay pou asire ki vvolans e krim dan kominote i ganny met anba kontrol e pou ki nou bann sitwayen i santi zot an sekirite a tou moman.

Mr Speaker, labi drog dan pei i enn ki touzour reste en gran konsern akoz se nou bann zenn ki pli ganny targete. Nou Manifesto i afirmen tre klerman ki labi drog dan pei i problem sosyal pli enportan, ki bezwen latansyon e lentervansyon

imedya. Nou pa pou kapab konstrir sa fitir ki nou anvi san ki nou elimin sa fleo drog danzere dan nou pei.

Mon rekonnet e salye determinasyon nou Gouvernman, pli prensipalman Minister Zafer Entern e biro Anti-Narkotik pou sa travay e zefor kordinen ki zot pe fer pou anpes lenportasyon e trafik drog danzere dan pei. Mon pe demande ki tou bann *partner* konsernen dan sa lalit asarnen kont drog i vin pli angaze dan ledikasyon danze labi e trafik drog danzere.

Bann paran, se nou bann zanfan ki reste pli gran target trafik drog akoz zot vulnerabilite, ki rann li fasil pou zot ganny abize par bann *dealers*. Ki swa dan lizaz pou lavant zot prodwir.

Mon pe enplor zot pou edik zot zanfan plis lo danze ki drog i anmennen lo lavi en endividé. osi byen ki bann lenpak sosyal e ekonomik ki sa i kapab anmennen kot lakour, dan kominote, dan travay e dan pei an zeneral.

Au Cap i sitye avan dernyen lo lalis *methadone users* dan pei, me pou mwan mon reste touzour enkyet, akoz mon pe war bann *ghettos* kontinyelman agrandi anvi ki ti napa preski ditou prezans

Lapolis dan distrik. Me la avek sa nouveau lelan travay ki zot in konmans avek, mon priye ki sa sityasyon drog dan distrik Au Cap i ganny met anba kontrol.

Mon ti ava osi profite remersye Lotorite Prizon pou sa lanmitye ki'n devlope avek distrik Au Cap. Dan nou zefor konman Lotorite Distrik pou lit kont sa fleo drog, nou'n antre an partenarya avek sa Lotorite pou nou netway bann sit kot trafik drog i ganny deroule. E sa i pli prensipalman kot laplenn foutbol prensipal i sitye.

Mon vreman apresye zot sipor e mon priye ki n 2022, sa *partnership* i kontinyen. Mon oule fer sa bann *dealers* konnen ki nou vwar zot, nou pe vey zot e nou pou ganny zot.

Mr Speaker, ozordi mon pou salye travay ki Departman Transpor lo Later pe fer dan nou bann distrik. Lotorite Distrik Au Cap i komann lavites dan zot lentervansyon dan bann ka kot lalimyer, *traffic mirrors*, *zebra crossing*, eksetera i konsernen ki nou met devan zot pour adrese, e mon swete ki zot kontiny sa bon travay an 2022.

Avan Oktob 2020, Au Cap ti dan fernwanr, me la mon kapab dir ki preski tou nou bann sou-distrik i ekipe avek

lalimyer pou permet fasilite ek sekirite zabitan.

Mon osi anvi remersi nou Gouvernman pou ki ozordi nou'n kapab *write-off* R1.5 bilyon det lo ledo *Air Seychelles*. *The Creole spirit will keep on flying indeed, all thanks to the LDS Government!!!*

Mr Speaker, lakonplisman lo lakonplisman. Mon pe profite pou lans en lapel avek lazans ki asir zeson salte dan pei. Mon rekonnet ki nou popilasyon i souvandfwa inyor lafason ki bann bin *sites* dan distrik i sipoze ganny servi. I malere pou vvar karkas loto, masin lave, bann vye bout tol pe ganny zete obor *bins* dan distrik. I menm annan bann boutikye ki vin zet zot bann bwat kartron marsandiz vid dan sa bann bin *sites*.

Mon pe demann avek LWMA pou lans en kanpanny entansif pou edik nou bann sitwayen lo lafason ki bann bin *sites* i sipoze ganny mentenir. Lo nou kote konman Lotorite Distrik nou pe fer nou bout, me i pa sifizan.

Nou bezwen konpran ki nou osi konman sitwayen nou bezwen responsab, ki en kominate pa depan zis lo Gouvernman oubyen Lotorite Distrik pou fonksyonnen, me ki

i pran sakenn de nou pour ede antretenir li.

Mr Speaker, mon'n apresye tann Prezidan dir ki lo kote lagrikiltir pe al annan en nouveau lelan ant bann fermye ek envestiser, e ki pe al annan plis later ki pou ganny met anba kiltivasyon. Sa i tre rekonfortan akoz i pou permet nou bann pti fermye ki anvi agrandi zot biznes, pou kapab fer li par akerir en pli gro bout later pour kiltive ou fer elevaz zannimo e ki an retour zabitant ava benefisy e pei a ganny plis reveni dan sa sekter.

Mr Speaker, malgre ki manifesto *LDS* i en problem pou Lopozisyon, akoz nou tou nou kapab dir ki sa i en zouti vivan ki pe depikte vre portre la demokrasi. I enportan pour note ki sa Gouvernman pe aktyelman travay an lakordans avek sa menm Manifesto.

Dan sa tranzisyon ki nou pe pas atraver, i annan plizyer travay ki Minister pour Later ek Lakaz pe fer pou amelyor sityasyon lozman dan pei.

An 2021, sa menm Minister in konmans en *review* lo bann later ki annan an disponibilite, afen ki Seselwa ava kapab konstrir zot prop lakaz e kre nouveau louvertir pour bann ki'n pare pour fer konstriksyon.

Mr Speaker, i annan plizyer transformasyon ki nou pou temwannyen tre byento dan sa Minister, avek bi pour asire ki sak Seselwa i atitre avek en lozman apropriye pou son fanmir osi byen ki pou son sirkonstans personnel.

Mr Speaker, parey Zafer Gouvernman in dir, in vreman annan en transformasyon lo la fason ki distrik i ganny zere. Mon oule senserman remersye mon DA, Manmzel Sabrina Assary pou sa travay merveye ki i pe fer dan distrik depi son larive tar lannen passe. Ou zefor e dedikasyon pou ou travay pe senserman ganny rekonnet.

Mon oule osi rekonnet travay ant bann lezot *partner* tel ki Brigad Dirzans, bann kontrakter netwayaz, travayer sosyal, zofisy'e *welfare*, zofisy'e *housing* ek *PMC* eksetera pour ede fer distrik marse, i enn ki ekselan e mon swete ki sa lannen i ganny amplifye.

Zis pou note, politik pa en kriter e zanmen i ganny anmenn lo latab parey ti ete avan sa tranzisyon Gouvernman.

Mr Speaker lalis lakonplisman i long. Si mon kontinyen fernwanr pour fer. Me mon rekonnet ki i annan ankor bokou pou akonplir dan sa 3an ki reste pour sa

ladministrasyon travay. Zabitan Au Cap, mon pe demann zot pour reste rezilyan. Kontinyen travay dir e mazinen ki laport biro Lotorite Distrik i toulstan ouver pou okenn konsern ki zot kapab annan.

Malgre ki in napa bokou devlopman dan distrik pandan 2021 anvi kontrent bidzeter kot nou ti vvar en koupir konsiderab dan alokasyon Bidze Gouvernman lokal, an 2022 nou'n relans bann proze dan nou distrik, e nou pe travay tre pre avek bann Minister ek lazans pour ki nou vvar plis devlopman.

Mon pe osi sansibiliz zot pou annan en lespri marsande. Avek lenpak *free market* kot pri kontrol lo marsandiz i preske in egzistan, mon rekonneta zefor ki STC in fer avek lentrodiksyon (*RRP*) *Recommended Retail Price*, ki permet zot annan plis opsyon pou rod valer pou zot larzan. Malgre ki i annan en serten group ki toulstan fristre e rod bann leskiz ler zot tann koz lo (*RRP*).

An konklizyon Mr Speaker, mon oule senserman remersye tou bann endividé ki kontinyelman siport e asiste Lotorite Distrik dan nenport ki fason akoz zot annan zot distrik e pei aker.

Mon swete ki sa lannen i pa ava en leksepsyon e ki sa partenarya i kontinyen.

Finalman Mr Speaker mon ti ava kontan felisit nou Gouvernman dan sa travay ki i pe fer pou fer sir ki tou zanfan Sesel i trouv son vre plas, tout an fezan sir ki sakenn ant nou i fer son devwar personnel konman en sitwayen responsab dan bon lepanouisman, e devlopman ekonomik, sosyal, kiltirel pei.

Mon pou termin mon lervansyon avek en morso parol nou Prezidan dan nou Manifesto pou Eleksyon 2020, ki ozordi mon santi son vre pwisans akoz nou pe aktyelman viv li "ozordi nou kapab zwaye e fyier ki nou'n remet Sesel lo semen laliberte ek la demokrasi.

Nou pep i konnen ki zot kapab koze e ganny tande. E zot konn zot drwa konman bann *être imen osi byen ki bann sitwayen Sesel.*" Avek sa Mr Speaker mon remersye ou.

(APPLAUSE)

MR DEPUTY SPEAKER

Mersi Onorab Samynadin. Mon ava prezant pas laparol avek Onorab Rocky Uranie.

HON ROCKY URANIE

Mersi Mr Speaker. Bonn apre midi tou koleg Onorab. Bonzour tou Seselwa isi aletranze. En bonzour spesyal tou zabitant Zil Pros e tou dimoun a lekout.

Prezidan in delivre son dezyenm ladres lo Leta nou Nasyon apre 16 mwan lo latet nou pti pei Sesel e mwan osi i fer 16 mwan ki mon'n ganny elekte konman MNA Zil Pros.

Mon dir mersi pou sa loportinite spesyal konman reprezantan Zil Pros e pep Seselwa pou mon ganny sans donn mon pwennvi lo sa diskour ki ti sipoze en diskour Leta nou Nasyon, me ki pa'n vreman dir gran keksoz lo vre Leta nou pei. En diskour ki pa'n ganny byen striktire, en diskour kot bokou keksoz, bokou leskiz pe ganny donnen e fer nou krwar ki Sesel napa problemm e ki Gouvernman i vreman efikas.

Nou'n fek tann en Onorab avan mwan ki'n koze de avan mon ki'n koze ki'n nonm bokou defayans. Ki menm poto ki'n kabannen dan distrik, i pa ni menm konnen lekel Lazans k i responsab. Eski sa efikasite?

Seselwa i dezapwente avek sa ki zot in ganny dir e akoz sa ki zot pe trouve, sa ki zot pe santi e sa fason ki zot pe viv i pa'n ganny reflekte dan sa

diskour, o kontrer zot in ganny fer krwar tou i *ok e ki pei i lo bon semen*.

Mr Speaker mwan mon lo semen preski toulezour, mon sorti pou plizer rezon spesifik. Mon koz ek plizer dimoun e tou kous popilasyon pa zis La Digue me lo Praslin, Mahe osi. Seselwa pa *happy*. Seselwa pe soufer e zot pe plenny zot douler ek soufrans, san ganny okenn gran rekour oubyen pa ganny ditou led.

I annan ki ganny anvoye gos/drwat san larepons. Seselwa la deor zot konnen sa ki mon pe dir i laverite. Tou bann ki pe pas ladan zot konnen zot menm kwa ki mon pe koz lo la. Ozordi menm bann ki en pti pe pli eze pe osi san difikilte e soufrans bann ki otour zot.

Mr Speaker an 2020 *COVID* ti ankor ase novo, e lemonn pa ti ankor vreman konn gran keksoz lo la. Sa ti letan ki lekonomi ti lo son vre zenou ti annan *lockdown* e touris pa ti ganny drwa antre dan pei, lemonn ti'n ferm laport me Gouvernman US sa letan ti kapab ed son pep e biznes e kit plis ki \$400 milyon dan rezerv pei.

Madam Gouverner ti menm pronons son lekor lo la lo medya pou konfirmen ki napa

kof vid. Zot dir pa koz mansonz. E fodre fer resers pou dir laverite be pa zot ki ti pe fer krwar kof i vid kantmenm Madanm Gouverner ti pe dir i annan larzan dan rezerv napa kof vid, e rezerv ti kapab anmenn nou pei pou plizyer mwan.

Sanzman in arive Mr Speaker. Me Kwa vreman ki'n sanze? Sanzman i bezwen vin ek fransizm e osi vin avek laverite kot pep Seselwa. Dir nou pep Seselwa sa larzan kot i sorti ki'n fer rezerv monte ? Eski i pa larzan ki *IMF* in pret nou oubyen bann lezot lorganizasyon enternasyonal in met dan rezerv?

Pa blyie i enportan nou konnen akoz ler nou prete tou Seselwa i bezwen donn lanmen rann e sa i en det lo nou latet e posibleman en det lo latet nou zanfan.

Gouvernman pa ankor oule vin kler avek tou bann reform an relasyon avek sa programm *IMF*. Tanzantan zot donn nou en pti kwiyer e toultan nou vvar sa ki pli vilnerab i pey konsekans.

Gouvernman i vin avek bon planifikasyon, bon *management* e pran aksyon konkret, sa dapre zot. Ki nou vvar, plizyer proze pe ganny fer san laprouvasyon Lotorite

Planning e apre zot bezwen sey vin eksplik zot katastrof lo medya. Oli bon planifikasyon? Oli bon *management*? Oli bon komunikasyon? Oli aksyon konkret?

Tou sa la i zis zoli parol pou fer nou krwar ek Seselwa ki sa Leta nou Nasyon i *ok* napa problem e bann Minister pe fonksyon vreman byen.

Sa Gouvernman i konn tre byen egzakteman, sonm egzakt, konbyen larzan ki annan dan Fon *COVID*. Dan diskour ti ganny dir plis ki 60milyon. Sonm egzakt i per pou ganny mansyonnen akoz ti pli o ki 70 milyon pres R80milyon. 16 mwan o pouvwar oli sa larzan?

Detay depans pa kler. Sa i kestyion ki mon souvan ganny demande dan semen, dan laboutik, kot bazar, kot barbye zis pou sit enn de landrwa. Seselwa pe esper laverite ek bon leksplikasyon.

Mr Speaker, Sef Deta in osi koz lo bon *management COVID* e menm nonm sif paysan ki ankor pe ganny trete Lopital Lafanmir pou demonstre ki ka *COVID* in desann. Vre ka in desann akoz Seselwa i konn pran responsabilite.

Me i blyie pou dir sa kantite ki'n mor avek *COVID* e senpati in ganny donnez zis lo konmansman pou serten

fanmir ki'n perdi enn zot pros avek sa maladi. Seselwa ki'n pas ladan zot konn son soufrans perdi enn manm fanmir sirtou enn ki'n mor ek COVID ki douler, soufrans e difikilte ki zot pas ladan.

Nou'n osi ganny dir ki *Platinum* pou rezwenn ankor sa semenn, ankor pou revwar bann restriksyon e soulaz nou pep. Sa i byen akoz nou pep i bezwen byen soulaze e bezwen santi zot en pe pli lib, me pa tir restriksyon akoz nou anvi fer Aksyon De Gras sa wikkenn *State House*.

Mon an faver Aksyon De Gras pou nou remersye e priy nou gran met, me i ti ava pli fezab nou fer li dan en landrwa parey *Palais Des Sports* oubyen Stad Linite, ex *SMB Hall* kot bokou plis larelizyon e dimoun i kapab partisipe.

Mr speaker nou'n osi antann dir ki rezulta IGCSE ki bann etidyan in fer lannen pase i tre bon, e menm non sa zenn fiy sorti Lekol Pointe Larue ti ganny nonmen. Konman en *ex*-ansennyan e osi en paran mon kontan ler mon tann sikse sirtou dan ledikasyon.

Mon konn son paran e mon fyer pou lekol Pointe Larue. Mwan mon pou met lanfaz lo lekol La Digue, kot sa group etidyan in fer osi byen

dan IGCSE sirtou Adrianno Ulcoq e Gael Micock. Adrianno in fer 9 IGCSE kot in ganny 5 A*s, 4A e son koleg Gael in ganny plizyer A*s. Felisitasyon Adrianno, felisitasyon Gael, Felisitasyon paran, ansennyan e *Management* lekol La Digue pou zot bon travay.

Mon mesaz pou bann etidyan pa blye keksoz pa fini la zot bezwen kontinyen renouvele zot zefor pou zot letid pos-segonder. Sa rezulta pa vedir ansennyan e etidyan ti annan ase bon resours pou ed laprantisaz.

Bann letablisman skoler in ganny bokou difikilte pou kapab delivre bann bon lesson e fer etidyan prodwir pli bon rezulta. Lo sa size Gouvernman atraver Minister Ledikasyon i ankor annan bokou pou fer.

Frer e ser Seselwa mon annan detrwa kestyon pou zot. Eski ou santi ou pei i lo bon semen? Eski ou santi sa vre stabilite? Eski ou santi ou an vre sekirite? Eski ou santi ou ki ou pa pe ganny entimide? Eski ou santi ki ou telefond pa pe vreman ganny ekoute?

Wi frer ek ser, Eleksyon i ganny par bwat vote pou demonstre la demokrasi, me eski ou vreman santi ou lib ozordi dan Sesel pou eksprim ou lekor san ki ou ganny targete?

Travayer medya zot in ganny dir pou rod lenformasyon ki korek, kree plis platform e *forum* pou donn lenformasyon korek. Travayer medya eski pa sa ki zot deza pe fer? Konbyen fwa travayer medya in ganny refize *interview*, oubyen tarde oubyen pa ganny repons pou *interview* ki zot demande avek zofisyen Gouvernman?

Si medya i pas lenformasyon ki glorifye Gouvernman sa i ganny aksepte me si i montre defayans la i en problem. Zournalist ozordi zot bezwen byen vey byen zot telefonn akoz zot kapab ganny arase dan zot lanmen.

Avan Eleksyon 2020 dimoun ti lib pou mont lo medya sosyal parey *Facebook* e fer tou komanter ki zot ti anvi. I annan ti servi tou kalite non barok e tou kalite alias, me ozordi ler sa i kontinyen i en problem.

Dimoun nepli kapab fer komanter lib lo medya parey avan. Akoz zot ganny reprimande, zot ganny *warning* in deza vwar menm bann ki ganny met dan kasos. Kote ki Seselwa i lib dan sa pei?

Eski sanmenm sa sanzman e transformasyon? Dan diskour lanfaz ti ganny mete lo linite, lape e respe pou Seselwa kapab viv dan larmoni

e pei kapab progrese. *United Seychelles* ti dir koste pou Sesel e demann linite nasyonal. Ki lot kote ti dir "pil lo li", e ankor nou fek tande la zot kree bann santiman e lenfliyans vyolans e agresivite dan nou pti pei Sesel.

I annan bokou ki pe regrete me sa lanmertim e lentolerans in fini antre dan latet bokou. Avek sa kalite sanzman ki'n anvlop bokou dimoun e zot pa pe ganny sa ki zot ti'n ganny promet tou sa letan pandan bann kanpanny ranpli ek fo promes e mansonz, zot in vin anmer.

Kominote e zonm pe nepli kapab vreman annan tolerans anver kanmarad. Dimoun in vin pli vif, vyolans e krim in ogmante konsiderableman. Fars ki ou ti abitye fer avek en dimoun nepli vin en fars, taler ou perdi ou lavi, en manman i perdi son zanfan.

Fistrasyon lavi ozordi i fer ki bokou dimoun pe viv parey bef dan disab sakenn vey son lizye. Paran, *United Seychelles* i la pou donn ou zanfan e ou lespwar pou en meyer sisyete, en meyer Sesel.

Bann Digwa ki'n vot pou mwan e bann ki pa'n vot pou mwan eski zot in deza vwar agresivite dan mwan. Sa ki zot in vwar i toultan lanmour, konpasyon e kanmaradri.

Bann zenn bon *manners* e savwar viv i enportan, pran e swiv bon legzanp.

Mr speaker 43an ek viktimizasyon in ganny site pou plizyer fwa la isi dan sa Lasamble. Be viktimizasyon pa'n ale i ankor la si ou pa siport sa Gouvernman prepar ou pou ganny met a laport. Si transpor lorganizasyon en Minister pou delivre pa pe fonksyonn byen akoz napa plizyer karakteristik parey bon planifikasyon e bon lorganizasyon, nou oule donn dimoun lenpresyon ki sa drayver i siport *United Seychelles* e se li ki'n met lipye drwat lo fren e lanmen gos lo fren amen.

Seselwa annou get byen si i pa akoz mank leksperyans, mank konpetans par sa ki pli o ki pe fer ki en Minister pa pe delivre parey i fodre. Annou Aret rod fason pou poustravayer ki siport *United Seychelles* dan lanplwa. Sesel i pou tou son zanfan.

Mr Speaker kou lavi in depas nou latet. Seselwa pe kriye e pe demann led ek Gouvernman. Seselwa pe espekte en diskour Leta Lanasyon ki vin ek solisyon pou rezourd, oubyen soulaz kou lavi o kontrer leskiz in bokou.

La, la Digue nou pou mor avek kou lavi. Dimoun napa larzan pou viv konman i fodre. Bann Digwa e operater bato, e la mon siport Onorab Churchill Gill pe demande ki Gouvernman i sibvansyonn zot biznes e redwir larzan ki zot peye par zour pou koste avek Por, koumsa sa i kapab reflekte dan pri komodite pou soulaz Digwa e Pralinwa.

Avek nouveau konstriksyon e agrandisman Por ki sipoze konmanse byento, en deba lo pri avek bann operater i bezwen vin en pwen diskisyon serye, pou ki La Digue e Praslin nou pa kontinyen soufer ek kou lavi.

Prezidan in deza dir dan *interview* ki en dimoun ki pov i viv dan plis lape, ki bann dimoun ki annan bokou larzan. Eski ou sa dimoun ki pov, pli vilnerab eski ler ou napa larzan ou santi ou anpe? Oubyen ou viv avek en stress pe rode ki pou manze demen ? Ki mannyer mon pou pey mon bil? Ki mon pou donn mon zanfan pou li pa ganny enfliyans-e par bann predator. Sa i leskiz Gouvernman pou pa met larzan dan pos Seselwa.

Mr Speaker prosperite i devret pou tou Seselwa. Bokou Seselwa i krwar ki mannyer pei pe deroule sa ki ris i vin pli ris e sa ki pov i vin pli pov.

Seselwa nou'n osi antann dir ki bann Seselwa ki fer byen pou ganny dekore. Sa i byen, mon an faver. La Digue in kree bokou atlet sirtou foutboler. Lannen pase nou lekip foutbol zom ti fer tre byen e rapport laviktwar. La sa lannen nou lekip famm in fer tre byen. Dan tou le de tim ti annan Digwa e Digwaz konpetan.

Me eski ou konnen ki federasyon pa antre an diskisyon pou *release* zwer avek lakonpannyen kot bann zwer i travay? Si en zwer i dan lekip nasyonal i devret devwar Federasyon e NSC ki responsab negosyasyon *release* pou sa bann zwer. Akoz nou vvar zwer pas atraver bokou difikilte e finalman zot *end-up* perdi zot lanplwa. Si vre Gouvernman i annan lanmour pou sport la i en landrwa pou konmanse.

Mr Speaker konmisyon pa pake, mon ti ganny demande pou anmenn en mesaz La Digue konsernan konstriksyon Lopital. Mon en reprezantan Digwa e mon'n fer mon devwar. Mr Prezidan, Gouvernman avan ler ti fer proze dan distrik Sainte Louis kot ou ti ganny elekte pa ti anvoy ou pas mesaz.

Menm kot ou ti perdi dan distrik Larivyer Anglez Gouvernman avan pa ti anvoy ou pas mesaz.

Digwa i dir mwan dir ou ki i fer dezyenm SONA ou koz lo Lopital La Digue. Ou ti dir lopital pou fer dan sis mwan zis apre Eleksyon 2020, apre ti anvoy pou 9 mwan. Zot dir mwan dir ou zot pe *look forward* pou son konstriksyon nouveau Lopital.

Zot ti ava kontan ki sa lopital i enn gran menm ki nou tou La Digue nou kapab antre ladan. Zot osi anvi konnen kote sours sa larzan i sorti e osi oli fon Lopital La Digue ki dapre konpran ti'n ariv plizyer milyon?

Mr Speaker pou konkli Gouvernman i ensiste ki Seselwa i travay dir. Mwan mon pou dir avek Lepep Seselwa travay *smart* e asire ki zot ganny proteksyon neseser dan zot lanplwa. Gouvernman i bezwen rekonnnet ki Seselwa pe travay e alors zot bezwen ganny rekonganse. Get dan *welfare* Seselwa.

Zabitan zil pros mon pou renouvle mon langazman ki mon pou kontinyen travay pour zot e pou Sesel. Zot lavwa pou ganny tande. Mersi Mr Speaker

(APPLAUSE)

MR DEPUTY SPEAKER

Mersi. Onorab Phillip Arissol.

HON PHILLIP ARISSOL

Mersi Mr Speaker. Bonn apre midi Mr Speaker, tou koleg Onorab, tou dimoun spesyalman tou dimoun tou zabitant Anse Boileau.

Mersi Mr. Speaker.

Bonn apre midi Mr. Speaker, tou koleg Onorab, tou dimoun spesyalman tou zabitant Anse Boileau.

Mr Speaker pandan sa dernyen 16 mwan Prezidan Ramkalawan ek Vis-Prezidan Afif pe diriz en tim Egzekitiv ki'n dedye tou zot zefor anver bon gouvernans, pou fer ki ozordi koman Seselwa nou fy, ki apre 43an Sesel in retourn lo semen liberte e nou kapab viv sa vre demokrasi.

Ozordi nou pep i kapab koze, e zot kestyion i annan en larepons. Nou pep i konn son drwa. Koman bann imen e zot konnen ki zot bann sitwayen Seselwa zot lib. Tou sa i fer ki i annan en lelan dan bann aktivite e proze ki Gouvernman pe enplimante. E nou Anse Boileau nou vwar sa sanzman.

Dan distrik travay in komanse lo en de proze, tel ki premye faz lo problem drenaz, ki nou vwar kot nou vwar travay pe byen progrese e nou remersye Bondye ki nou distrik pa'n ganny tro afekte tar an

Zanvye sa lannen, sa voyaz avek sa movetan ki'n pase.

Mr Speaker, travay pou fer en lapas pou bann peser Anse Boileau e Anse La Mouche, en keksoz ki mon'n demande pandan sa dernyen 2 lannen ki mon'n la dan Lasanble, e sa in komanse e in ariv lo en faz tre avanse e tre byento a konplet, avek enstalasyon lalimyer pou demark larantre e lapas pou bann peser kapab servi menm dan lannwit. Sa ava ede pou fasilit lanbarkasyon e debarkasyon ler bann peser i retournen.

Sa lapas i premye faz dan en proze ki pou swiv par konstriksyon fasilite bazar, stor pou bann, peser stor zot bann lekipman e sa i ekspekte demare byento.

Anse Aux Boileau osi in nobou kapab finalman annan li en Lasosyasyon Peser, ki apre en bon pe letan nou pe formen me avek sa bann sanzman ki annan dan pei, bann zenn in pouse e nou'n kapab annou nou en zoli Lasosyasyon Peser ki pe ede dan nou kominote.

Pou bann fermye dan mon distrik, mon kapab dir avek zot ki finalman en sit in fini ganny idantifye kot zot ava kapab ganny en bazar, e sa pou ganny konstri obor kot Ladministrasyon Distrik. Sa i

ava ede pou retir risk aksidan obor semen. E mon swete ki travay lo sa i ava konmanse o pli vit posib, pou ki nou bann fermye ava kapab vann zot bann prodwir zot osi zot a kapab vann zot prodwi dan en fason pli konvenab.

En nouveau baraz Bonne Espoir in konplete e pare pou konmans servi, sa proze irigasyon pou ed fermye dan rezyon Montagne Posée Hermitage.

Mr Speaker, o mwen 11 kare lagrikiltir in pare pou ganny *reallocate* avek fermye e sa i dan rezyon Montagne Posée e Barbarons

Travay lo drenaz fer par Minister Lagrikiltir e lanvironnman, in retir bokou problemm linondasyon ki nou bann fermye ti gannyen dan plato. E nou'n war ki an 2021 bokou fermye ti soufer me sa lannen nou pa'n rankontre sa sityasyon.

Mr Speaker travay pou elev nivo servis Sant Resers Anse Boileau pe kontinyen, sa avek bi elev performans e don fermye lenformasyon ki korek pou ede dan prodiksyon.

E bann rezulta ki bann sant resers i fer sa pou ganny donnen dan bann sesyon diran lannen pou bann fermye kapab

asiste, e landrwa i ava ganny asiste kote ki pou ganny fer.

Mr Speaker si i annan *funding* travay pou fer renovasyon lo bann vye batiman kot stasyon resers, sa bann batiman pou ganny konverti pou fer laklas pou bann etidyan.

Letan mon pe koz lo kondisyon nou bann semen dan distrik travay pou re sirfas nou bann semen segonder dan distrik, travay pou re sirfas nou bann semen pandan 2021 sa in byen ale. Bokou nou bann semen segonder in ganny refer avek en bon sirfas. E la travay pou re-sirfas semen Mont Plaisir sorti anler Mont Plaisir ziska Anse Louis i ekspekte komanse tre byento. Travay preliminer pou tous bann trou in fini konmanse.

Enn nou pli gro problemm se sirfas lo semen lakot was Mahe, ki sorti depi Anse a La Mouche ziska Anse Boileau, e sa mon'n ganny lasirans ki travay pou konmanse dan dezyenm kar sa lannen.

Mr Speaker mon swete ki sa travay ava kapab demare a ler, akoz bann zabitan mon distrik e osi bann motoris ki servi sa semen, i vreman soufer.

Kot i konsern lakaz, e later parey lezot distrik, i ankor annan bokou demann, travay

pe ganny fer pou idantifye en sit pou konstri sa 6 lakaz ki dan proze 24/24 ki Anse Boileau pa ti ankor gannyen, ava kapab sa ava kapab ganny konstri. Menm ki la an se moman napa finansman, me travay preparasyon ava komanse ava konmans bouze e en fwa ki finansman i gannyen, sa proze ava demare.

An sa ki konsern *land bank* dan distrik Anse Boileau sa i *land bank* ex Zelia ek Holden Pierre tou lenfrastruktir setadir semen e drenaz in konplete, plan peyman pou *utilities* ek *PUC* sa in fini ganny agree. Alor travay pou enstal delo ek elektrisite i an progre, e sa de *land bank* i tonm dan sa 100 kare later kot bann aplikan pe ganny zot let e sa bann kare later i ekspekte ganny *allocate* par lafen Mars sa lannen.

I annan ankor lezot *land bank* dan distrik, me pou lemoman finansman pe poz en pe retar an devlopman sa bann proze, dek ki i annan finansman travay pou enstal lenfrastruktir ava komanse, e sa i prodwi ankor 11 kare later pou bann aplikan ki ankor pe spere.

Mr Speaker, tar lannen pase mon ti envit Minis Devika Vidot dan distrik, kot mon ti'n idantifye serten morso later Gouvernman, sa pou ki

ansanm avek son Minister nou ava vwar posibilite pou met an plas lenfrastruktir pou ki bann zabitan ki annan lentere ki kapab lans dan pti biznes zot ava fer li.

Mr Speaker i annan serten nou bann paran ki annan sa persepsyon ki ledikasyon nou bann zanfan i depa zis lo edikater, e lenstitisyon skoler. Wi sa edikater i la pou donn lenstriksyon nou bann zanfan.

Me ledikasyon i pli gran ki sa. I enkli tou dimoun, paran, zanmi e la kominate. Annou aret depa zis lo edikater e lenstitisyon skoler pou fer grandi nou zanfan.

Paran ou osi pran kontrol, vin sa enn ki premye dan ledikasyon ou zanfan, gid li eksplik li ki si i anvi *achieve* en keksoz dan lavi, i pa kapab zis asize e sof ban lekol. I bezwen konsantre e *focus*.

I annan en fason pou ganny sa ki pli meyer dan lavi, eksplik li, ki si i anvi ganny en keksoz dan lavi, i bezwen travay dir pou gannyen. Sa i aplik pou tou keksoz, en bon rezulta, en metye, en kare later, en lakaz, en loto. Akoz fitir ou zanfan i ekstrememan enportan. Ed nou zanfan pou annan en rev.

E ou sa zanfan eski ou pran kont ki ou avi vini dan lavi, eski ou mazinen lekel ki annan

kontrol ou lavi? I vreman enportan pou ou annan en plan pou ou demen, e sa i komans tre boner dan ou lavi.

Ler ou leve bomaten poz ou lekor sa 5 kestyion, ki mon rol dan sa sosyete? Ki mon anvi arive dan lavi? Ki mon bezwen pou mon kapab arive fer sa? Kwa ki mon kapab fer pou ki mon lanvironnman i vin meyer? Kwa ki mon kapab fer pozitiv pou amelyor lavi mon vwazen?

Mr Speaker pa tou nou zanfan ki doue akademikman, mon serten ki sa bann tel zanfan i annan bann lezot abilite ki kapab devlope pou ki zot osi zot a kapab partisipe e kontribye pozitivman dan sosyete.

Sa se nou bann etidyan vokasyonnel e zot, zot dan laklas 2 zour par semen e sa lot 3 zour zot sipoze dan lendistri pou zot aprann sa metye ki zot in swazir.

Me Mr Speaker sa bann etidyan pe rankontre bokou difikilte pou ganny plasman dan lendistri. Pou en rezon ou en lot zot pa gannyen sa plasman. Sa bann zanfan se zot ki pou antre dan lanplwa demen, se zot ki pou ede retir lakantite travayer etranze ki i annan dan pei.

Alor mon pe lans en lapel pou ki sa bann desizyon i ganny

rekonsidere par lendistri. Lendistri fodre annan en plas pou kapab aksepte sa bann zanfan.

Mr Speaker mon vreman fyer pou vwar ki menm avek difikilte sa bann moman difisil ki nou'n pas atraver ki nou bann ansenyan e etidyan e lekol Anse Boileau i pas atraver pandan sa dernyen lannen. Nou bann etidyan S5 dan distrik Anse Boileau in reisi prodwi bon rezulta pou legzanmen enternasyonal, kot tou zanfan - mon repepe tou zanfan ki'n asiz pou legzanmen *IGCSE in pass*, e osi zot in *pass* legzanmen *DELF*.

Lo kote lekol primer zanfan P6 in an zeneral byen travay. Zot in fer zot legzanmen nasyonal e nou pe kontinyen fer progre, nou'n menm annan en etidyan ki parmi se 5 meyer dan pei.

Sa i vin avek bann bon travay, korperasyon bann paran ki met bokou lentere dan travay zot zanfan. Mon ti ava kontan felisit nou bann etidyan primer e segonder, tou bann ansenyan e osi tou bann paran.

Mr Speaker lo kote sekirite pou nou bann zanfan ki al kot lekol, sirtou lekol primer - sa pti semen ki antre obor stasyon desalinasyon. Mon pe demande

ki konstriksyon sa trotwar i ganny fer, sa a garanti ki nou bann zanfan i ava pli an sekirite ler zot pe antre kot lekol dan bomaten letan zot pe sorti apre midi. Sa a osi redwir bokou sirkilasyon trafik lo sa semen kwense e ava pez lenkyetid bann paran.

Mr Speaker, mon rekonnet ki i annan bokou travayer dan mon distrik e lezot distrik ki travay dan Sekter Tourizm e osi ki relye avek tourizm, ki ankor pe ganny difikilte par akse pou ganny akse avek *loan* kot en labank komersyal.

Mon osi rekonnet ki bann labank komersyal pe reakte en pe pridan pou fer sir ki zot protez bann *deposit* kot zot.

Me la avek lekonomi ki pe refer, mon oule lans en lapel avek Labank Santral ek Minister responsab pour Finans, pou travay avek bann Labank Komersyal pou fer ki sa group dimoun i kapab reganny akse avek en *loan* pou zot konstri zot lakaz.

Letan ki mon pe adres Minister Finans e Labank Santral, ankor enn fwa mon pe fer en demann lo lapar zabitan Anse Boileau, ki ankor pe esper enstalasyon en ATM dan nou distrik. Alor mon pe fer sa lapel ek sa ki konsernen pou fer tou

sa ki neseser pou ki zot kapab realiz sa proze dan en landrwa apropriye. E an menm tan mon osi envit tou zabitan Anse Boileau ki ler sa i arive pou zot servi sa masin byen.

Mr Speaker, faktor prensipal ki pe fer ki kou lavi i kontinyelman monte, i an deor kontrol Gouvernman e sa in annan pou fer avek enn bann lefe ki *COVID* in anmennen.

En se logmantasyon dan pri karbiran, ki fer ki an retour nou vvar ki kou pou elektrisite e delo e petrol lo laponp i monte.

Logmantasyon dan kou pou transportasyon komodite ki Sesel i i bezwen, sa in double e menm triple. Sa pa'n afekte zis Sesel me bokou pei dan lemonn. Nou vvar ki avek sa bann logmantasyon tou sa bann kou i ganny passe lo konsonmater.

Me avek lentrodiksyon *Recommended Retail Price* ki STC in entrodwi, nou vvar ki sa i ede pou ki konsonmater i kapab aste serten komodite de baz a en pri abordab. E sa pa zis kot STC me dan bann magazen dan distrik.

Mr Speaker i sagrinan pou dir ki annan Seselwa ki'n perdi tou valer moral, ki nou bann paran e gran paran ti enkilke dan nou. Sa bann valer ti ini

nou e gid nou fason ki nou ti viv koman bann vre Seselwa.

Me egois e vorasite i fer ki i annan bann ki nepli pran kont lasante zot prosen me mazin zis zot pos. Se la ki nou vwar drog ki pe kontinyen propaze dan nou pei sirtou parmi nou bann zenn.

Nou vwar ki krim vol in ogmante, zenn pa dan lanplwa, sa ki pe *kick o bor semen*, menn dan milye semen. Kestyon ki bokou pe demande, se eski nou pou kapab elimin drog dan Sesel?

Mr Speaker mwan, mon dir wi, akoz sa pa devwar zis Prezidan pou anmenn sa lalit, i devwar nou tou. Fodre ki Lapolis i annan plis konfidansyalite, pa pou devwal lenformasyon ki en sivilyen i donn li.

Bann paran ki annan zanfan ki'n tonm da sa fleo, form bann group e montre zot bann mekontantman, montre ki zot pa siport sa bann kalite letid.

Tou sitwayen konsernen ede partisipe e pa ankouraz ou soutir sa bann dimoun ki zot konnen i dan drog. Fodre annan en revizyon dan Lalwa kont drog ki ava fer ki pinisyon pou sa bann ki enporte e trafik drog i vin pli sever.

Annou anmenn en lalit kont bann trafiker drog ki pe detri nou bann zenn zomn e fanm.

Gouvernman in fini konmanse sa latas malgre tou sa difikilte, sa Gouvernman ansanm avek bann *partner*, tel ki *Americain*, *Anglais*, *Francais* e *Indien* ki pe ed nou pou anmenn sa lager e elimin drog dan nou pei, me pandan sa dernyen 16 mwan reisi fer plis la sezi, e lentervansyon kot drog in ganny detri.

Nou bann zenn ki'n tonm dan drog dan lenfliyans, swa drog ouswa lalkol, mon konnen i pa fasil pou sorti, wi mon pa dan ou sa soulye. Ou pa ankor perdi ou lavi, petet ou'n perdi semen, me i annan dimoun, lorganizasyon la deor ki'n pare pou ed ou revwar direksyon.

Mr Speaker, la ki spor pe al repran konpetisyon apre sa long poz, e avek swe Prezidan Ramkalawan, ki lemoman in arive pou ki nou bann atlet Seselwa i travay pou kapab in ler pou bann atlet Seselwa kapab anmenn en premye meday Olenpik Sesel, swa Bronz, Silver, ouswa Lor.

La i loportinite pou Minister Sport pou fer en lodit pou vwar ki disiplin sa i kapab arive?

Kwa ki fodre fer, ki kantite lenvestisman fodre ganny fer, ki kantite atlet ki pou ganny targete, kote nou pou ganny lantrener pou antren sa bann atlet?

Eski i annan okenn plan pou entrodwir novo spor ki ganny fer onivo Olenpik ki Seselwa i kapab fer me nou pa pe pratike Sesel tel ki *Rowing Archery*, sa bann sport endividiyel ki Seselwa i kapab fer.

Bann atlet, zot konnen poudir zot konnen pou kapab arriv lo sa nivo i demann bokou, fodre fer en kantite sakrifis. Pa asize pouse avek perseverans tou i posib. Vin sa premye atlet pou anmenn sa loner pou Sesel.

Mon pe osi lans en lapel avek tou zenn dan mon distrik bann zenn Anse Boileau kot spor ti vreman popiler. Annou rekoste ansanm, regroupe, refer nou bann lekip spor e nou ava fer sa bann dimoun dan bann lezot distrik konnen lekel nou.

Ki Sesel i bezwen plis la ki zanmen, se son pep. Setadir koman en lafors ini, ansanm annou konstri sa pon pou geri tou mal ki'n pase. Non pa kree divizyon. Non pa senm laenn, Sesel i en pti pei kot tou dimoun i konn tou dimoun.

Menm ki nou annan en lopinyon diferan, nou kapab

travay ansanm pou benefis nou pei, apre tou Sesel i nou pei. Parey Prezidan in dir annou fer sa semen ansanm. Fer li pou nou zanfan e pou ou pti zanfan. Mersi Mr Speaker.

(APPLAUSE)

MR DEPUTY SPEAKER

Mersi Onorab Arissol. Ou *timing* i parfe akoz in anmenn ou zis 5er. Donk sa i pou nou dernyen lenthervansyon ozordi. Nou pou *adjourn* la. Mon ava remersi tou Manm pou zot partisipasyon pou ozordi. Fer bon *weekend* e nou ava zwenn Lendi bomaten 9er.

(ADJOURNMENT)

